

**მუდმივმოქმედი არბიტრაჟი „დავების განმხილველი ცენტრი“  
საარბიტრაჟო წარმოების წესები (DRC-ის დებულება)**

**თავი I. ზოგადი წესები**

- მუხლი 1. დავების განმხილველი ცენტრი
- მუხლი 2. მოქმედების ფარგლები
- მუხლი 3. დებულების ინტერპრეტაცია
- მუხლი 4. DRC-ის სასამართლო
- მუხლი 41. DRC-ის სამდივნო
- მუხლი 5. შეტყობინებები
- მუხლი 6. ვადების გამოთვლა

**თავი II. საარბიტრაჟო განხილვის დაწყება**

- მუხლი 7. საარბიტრაჟო სარჩელი (განაცხადი)
- მუხლი 8. შესაგებელი, შემხვედრი საარბიტრაჟო მოთხოვნა
- მუხლი 9. საარბიტრაჟო შეთანხმების შემოწმება
- მუხლი 10. საარბიტრაჟო განხილვაში დამატებითი მხარის ჩართვა
- მუხლი 11. ერთზე მეტი საარბიტრაჟო შეთანხმება
- მუხლი 12. საარბიტრაჟო საქმეების გაერთიანება

**თავი III. საარბიტრაჟო ტრიბუნალი**

- მუხლი 13. ზოგადი ნაწილი
- მუხლი 14. არბიტრთა რაოდენობა
- მუხლი 15. ტრიბუნალის ფორმირება
- მუხლი 16. არბიტრთა დანიშვნა და დამტკიცება
- მუხლი 17. არბიტრის აცილება
- მუხლი 18. არბიტრის შეცვლა

**თავი IV. საარბიტრაჟო განხილვა**

- მუხლი 19. ზოგადი ნაწილი
- მუხლი 20. საარბიტრაჟო განხილვის ადგილი
- მუხლი 21. საარბიტრაჟო განხილვის ენა
- მუხლი 22. სამართლის ნორმათა გამოყენება
- მუხლი 23. საარბიტრაჟო განხილვის საკითხთა შესახებ დადგენილება
- მუხლი 24. პროცედურული სხდომა და პროცედურული განრიგი
- მუხლი 25. მოსარჩელისა და მოპასუხის პოზიციების გაცვლა
- მუხლი 26. საქმის ფაქტობრივი გარემოებების დადგენა
- მუხლი 27. მტკიცებულება

- მუხლი 28. ზეპირი მოსმენა
- მუხლი 29. არბიტრაჟის მიერ დანიშნული ექსპერტი
- მუხლი 30. დოკუმენტის წარუდგენლობა
- მუხლი 31. საარბიტრაჟო განხილვის დასრულება
- მუხლი 32. უზრუნველყოფის ღონისძიებები
- მუხლი 33. დაჩქარებული წესით განხილვის პროცესი

#### **თავი IV<sup>1</sup>.ონლაინ არბიტრაჟი**

- მუხლი 33<sup>1</sup>. ზოგადი დებულებები
- მუხლი 33<sup>2</sup>. „საქმის წარმოების სისტემა“
- მუხლი 33<sup>3</sup>. ვადები
- მუხლი 33<sup>4</sup>. არბიტრის დანიშვნა
- მუხლი 33<sup>5</sup>. საარბიტრაჟო განხილვის დაწყება
- მუხლი 33<sup>6</sup>. შესაგებელი
- მუხლი 33<sup>7</sup>. საარბიტრაჟო განხილვა
- მუხლი 33<sup>8</sup>. საარბიტრაჟო გადაწყვეტილება
- მუხლი 33<sup>9</sup>. საარბიტრაჟო მოსაკრებელი
- მუხლი 33<sup>10</sup>. რეკომენდირებული საარბიტრაჟო შეთანხმება

#### **თავი IV<sup>2</sup>. სადაზღვევო საქმეთა განხილვის წესი**

- მუხლი 33<sup>11</sup>. ზოგადი წესები
- მუხლი 33<sup>12</sup>. საარბიტრაჟო ტრიბუნალის ფორმირება

#### **თავი V. საარბიტრაჟო გადაწყვეტილება**

- მუხლი 34. გადაწყვეტილების მიღება
- მუხლი 35. საბოლოო საარბიტრაჟო გადაწყვეტილების მიღების ვადა
- მუხლი 36. საარბიტრაჟო განხილვის შეჩერება და საარბიტრაჟო განხილვის შეწყვეტა
- მუხლი 37. სამედიაციო შეთანხმების დამტკიცება
- მუხლი 38. საარბიტრაჟო გადაწყვეტილების ფორმა და იურიდიული ძალა
- მუხლი 39. საარბიტრაჟო გადაწყვეტილების ფორმალური შემოწმება
- მუხლი 40. საბოლოო საარბიტრაჟო გადაწყვეტილების დამოწმება
- მუხლი 41. საქმის მასალის შენახვა
- მუხლი 42. საარბიტრაჟო გადაწყვეტილების განმარტება
- მუხლი 43. საარბიტრაჟო გადაწყვეტილების შესწორება
- მუხლი 44. დამატებითი საარბიტრაჟო გადაწყვეტილება

## **თავი VI. ხარჯები**

მუხლი 45. ავანსი საარბიტრაჟო ხარჯების დაფარვისათვის

მუხლი 46. საარბიტრაჟო ხარჯების გაანგარიშება

## **თავი VII. სხვა დებულებები**

მუხლი 47. საარბიტრაჟო განხილვის განახლება

მუხლი 48. ვადების ცვლილება

მუხლი 49. უარი შეპასუხებაზე

მუხლი 50. პასუხისმგებლობის შეზღუდვა

მუხლი 51. გაუთვალისწინებელი გარემოებები

მუხლი 52. დებულებაში ცვლილებებისა და დამატებების შეტანა

მუხლი 53. საარბიტრაჟო გადაწყვეტილებათა გამოქვეყნება

## **დანართი #1. DRC–ის სასამართლოს სტატუსი და შიდა რეგლამენტი**

მუხლი 1. ფუნქციები

მუხლი 2. სასამართლოს შემადგენლობა

მუხლი 3. დანიშვნა

მუხლი 4. სასამართლოს სხდომები

მუხლი 5. სასამართლოს შემადგენლობა სადაზღვევო დავებზე

მუხლი 6. კონფიდენციალურობა

მუხლი 7. ინტერესთა კონფლიქტი

მუხლი 8. სასამართლოს მიერ არბიტრების დანიშვნა

მუხლი 9. წარმომადგენლობა

მუხლი 10. ამოღებულია

## **დანართი #2. საარბიტრაჟო ხარჯი, ჰონორარი და პირობები**

მუხლი 1. მოქმედების სფერო

მუხლი 2. არბიტრის ჰონორარი

მუხლი 3. ტრიბუნალის ხარჯები

მუხლი 4. ადმინისტრაციული ხარჯები

მუხლი 5. სარეგისტრაციო მოსაკრებელი

მუხლი 6. ადმინისტრაციული ხარჯი და არბიტრთა ჰონორარი

მუხლი 7. გადაყენებული არბიტრისათვის საზღაურის გადახდა

მუხლი 8. DRC, როგორც დამნიშვნელი ორგანო

მუხლი 9. ადმინისტრაციული საზღაური სარჩელის უზრუნველყოფის ღონისძიებისათვის

მუხლი 10. ამოღებულია

მუხლი 11. გადაწყვეტილების დაკავება

მუხლი 12. გამოსაყენებელი სამართალი

**ცხრილი #1.** სარეგისტრაციო მოსაკრებელი, ადმინისტრაციული საზღაური და არბიტრთა ჰონორარი

**ცხრილი #2.** საარბიტრაჟო ხარჯი (ადმინისტრაციული საზღაური და არბიტრთა ჰონორარი)

**მუდმივმოქმედი არბიტრაჟი „დავების განმხილველი ცენტრი“  
საარბიტრაჟო წარმოების წესები (DRC-ის დებულება)**

**თავი I. ზოგადი წესები**

**მუხლი 1. დავების განმხილველი ცენტრი DRC**

- 1.1. მუდმივმოქმედი არბიტრაჟი „დავების განმხილველი ცენტრი“ (შემდგომში – DRC) წარმოადგენს არასამეწარმეო იურიდიული პირი „საქართველოს ბიზნეს ასოციაციის“ და პროფესიონალების მიერ შექმნილ ორგანიზაციას, რომლის ფუნქციას მოახდინოს საერთაშორისო და ადგილობრივი საარბიტრაჟო განხილვების ადმინისტრირება - DRC-ის წესების შესაბამისად.
- 1.2. საარბიტრაჟო დავას იხილავს ტრიბუნალი, რომელიც იქმნება კონკრეტული დავის განხილვისათვის.
- 1.3. DRC თავის ფუნქციებს ასრულებს სასამართლოს, დირექტორატისა და სამდივნოს მეშვეობით. DRC-ის სტრუქტურა, ფუნქციები და უფლებამოსილებანი განსაზღვრულია DRC-ის წესდებით და ამ საარბიტრაჟო წესებით (შემდგომში – დებულება).

**მუხლი 2. მოქმედების ფარგლები**

- 2.1. DRC-ის წესების შესაბამისად ტრიბუნალი განიხილავს დავას, თუ მხარეები შეთანხმდებიან, რომ
  - ა) დავა განიხილება DRC -ის წესების შესაბამისად;
  - ბ) დავა განიხილება DRC -ის მიერ ან მსგავსი შინაარსის დათქმით.
- 2.2. DRC დავას განიხილავს იმ შემთხვევაშიც, როდესაც მხარეთა საარბიტრაჟო შეთანხმება შედგა საარბიტრაჟო სარჩელისა და შესაგებლის გაცვლის გზით.

- 2.3. თუ ამ მუხლის 2.1. და 2.2 პუნქტების შესაბამისად მხარეები შეთანხმებულები არიან დავა განხილოს DRC -იმ იგულისხმება, რომ წინამდებარე წესები წარმოადგენს მხარეთა საარბიტრაჟო შეთანხმების ნაწილს.
- 2.4. DRC-ის წესები არ გამოიყენება იმ შემთხვევაში, თუ მხარეები შეთანხმდებიან დავის განხილვაზე UNCITRAL-ის (გაეროს საერთაშორისო სავაჭრო სამართლის კომისიის მიერ მიღებული UNCITRAL-ის საარბიტრაჟო წარმოების წესები) ან მხარეთა მიერ შეთანხმებული სხვა წესების შესაბამისად.
- 2.5. მხარეთა მიერ შეთანხმებული UNCITRAL-ის ან სხვა წესების მიხედვით საარბიტრაჟო დავის განხილვისას, DRC ადმინისტრირებას უწევს სრულ საარბიტრაჟო პროცესს.
- 2.6. საარბიტრაჟო განხილვის პროცესში ტრიბუნალი ხელმძღვანელობს მხარეთა საარბიტრაჟო შეთანხმებით, ამ დებულებით, დებულებით გათვალისწინებული შიდა რეგლამენტით და საქართველოს არბიტრთა ასოციაციის „არბიტრთა ეთიკის კოდექსის“ ნორმებით.
- 2.7. წინამდებარე წესები ძალაშია 2016 წლის 01 ივნისიდან.
- 2.8. საარბიტრაჟო დავის განხილვა წარიმართება წესების იმ რედაქციის მიხედვით, რომელიც მოქმედებს საარბიტრაჟო საქმის განხილვის დაწყების მომენტში.

#### **შენიშვნა: რეკომენდირებული საარბიტრაჟო დათქმა**

ნებისმიერი დავა, წარმოშობილი წინამდებარე ხელშეკრულებიდან ან მასთან დაკავშირებით, მათ შორის ნებისმიერი საკითხი ხელშეკრულების ანდა საარბიტრაჟო შეთანხმების არსებობის, ნამდვილობასა და შეწყვეტის შესახებ განხილვისა და საბოლოო გადაწყვეტილების მიღების მიზნით უნდა გადაეცეს მუდმივმოქმედ არბიტრაჟს „დავების განმხილველ ცენტრს“ DRC-ს, საარბიტრაჟო განხილვის ადგილია საქართველო თბილისი, რომლის სარეგისტრაციო კოდია 204547348; იურიდიული მისამართი ქ. თბილისი ვაჟა-ფშაველას 71, 2 სართული, ოფისი 11. ვებ.გვერდი: WWW.DRC.GE

#### **რეკომენდირებული ონლაინ არბიტრაჟის დათქმა**

ნებისმიერი დავა, წარმოშობილი წინამდებარე ხელშეკრულებიდან ან მასთან დაკავშირებით, მათ შორის ნებისმიერი საკითხი ხელშეკრულების ანდა საარბიტრაჟო შეთანხმების არსებობის, ნამდვილობისა და შეწყვეტის შესახებ, განიხილება და საბოლოოდ წყდება ერთი არბიტრის მიერ მუდმივმოქმედი არბიტრაჟის „დავების განმხილველ ცენტრის“ საქმის წარმოების წესების (დებულების) შესაბამისად. საარბიტრაჟო განხილვის ადგილია (ქვეყანა, ქალაქი) DRC-ს, რომლის სარეგისტრაციო კოდია 204547348;

იურიდიული მისამართი: ქ. თბილისი ვაჟა-ფშაველას 71, მე-2 სართული, ოფისი 11.

ვებგვერდი: (WWW.DRC.GE).

მხარეები თანხმდებიან, დავა ონლაინ საარბიტრაჟო ფორმით განიხილოს.

მხარეები თანხმდებიან, რომ საარბიტრაჟო განხილვისას, როგორც საარბიტრაჟო განხილვის დაწყების შესახებ ინფორმაცია, ასევე საარბიტრაჟო განხილვის პროცესში ნებისმიერი გზავნილი, შეტყობინება, დოკუმენტი მიიღონ ელექტრონული ფოსტის შემდეგ მისამართზე:

1. [მხარის დასახელება], [ელექტრონული ფოსტის მისამართი].

2. [მხარის დასახელება], [ელექტრონული ფოსტის მისამართი].

მხარეები ვალდებულებას იღებენ, მუშა მდგომარეობაში შეინარჩუნონ მითითებული ელექტრონული ფოსტა, რეგულარულად შეამოწმონ და, ასევე, არაუფლებამოსილ პირებს არ გამოაყენებინონ ის.

იმ შემთხვევაში, თუ მხარე ცვლის ელექტრონული ფოსტის მისამართს ან ვერ იყენებს მითითებულ ელექტრონულ ფოსტას, ის ვალდებულია დაუყოვნებლივ აცნობოს ამის შესახებ მეორე მხარეს მითითებულ ელექტრონულ ფოსტაზე, ხოლო, თუ საარბიტრაჟო განხილვა დაწყებულია, ასევე აცნობოს DRC-ის სამდივნოს. წინააღმდეგ შემთხვევაში მხარეს ეკისრება პასუხისმგებლობა ყველა იმ ნეგატიურ შედეგზე, რაც შეიძლება გამოიწვიოს მითითებული ელექტრონული ფოსტის მისამართზე შეტყობინების/გზავნილის გაგზავნამ.

ელექტრონული ფოსტის შეცვლის ან მისი გამოყენების შეუძლებლობის შესახებ შეტყობინების მეორე მხარისათვის, ხოლო საარბიტრაჟო განხილვის დაწყების შემდეგ ასევე DRC-ის სამდივნოსათვის მიწოდებამდე, ზემოაღნიშნულ ელექტრონული ფოსტის მისამართზე შეტყობინების/გზავნილის გაგზავნა განიხილება შესაბამისი მხარისათვის გზავნილის/შეტყობინების სათანადო წესით მიწოდებად ონლაინ საარბიტრაჟო განხილვის ნებისმიერი მიზნისათვის.

მხარეები თანხმდებიან, რომ ზეპირი მოსმენა შესაძლოა ჩატარდეს მხოლოდ იმ შემთხვევაში, თუ ამას არბიტრი მიიჩნევს აუცილებლად.

### **საარბიტრაჟო დათქმა და ელ-ფოსტაზე გაგზავნის შეთანხმება**

ნებისმიერი დავა, წარმოშობილი წინამდებარე ხელშეკრულებიდან ან მასთან დაკავშირებით, მათ შორის ნებისმიერი საკითხი ხელშეკრულების ანდა საარბიტრაჟო შეთანხმების არსებობის, ნამდვილობასა და შეწყვეტის შესახებ განხილვისა და საბოლოო გადაწყვეტილების მიღების მიზნით, უნდა გადაეცეს მუდმივმოქმედ არბიტრაჟს „დავების განმხილველ ცენტრს“ DRC -ს, საარბიტრაჟო განხილვის ადგილია საქართველო თბილისი, რომლის სარეგისტრაციო კოდია 204547348; მის. ქ თბილისი ვაჟა-ფშაველას 71,სართ2, ოფისი 11. ვებ.გვერდი: WWW.DRC.GE.

მხარეები ვთანხმდებიან, რომ მხარეებს შორის, ასევე საარბიტრაჟო დაწესებულებას დავების განმხილველი ცენტრს ს/კ 204547348 შორის კომუნიკაცია შესაძლებელია განხორციელდეს ელექტრონული ფორმით. ამ შემთხვევაში შეტყობინება განხორციელებულად ჩაითვლება, თუ იგი მხარეს ჩაბარდა ელექტრონული ფოსტის მეშვეობით. მხარეები თანხმობას აცხადებენ, რომ ხელშეკრულებით განსაზღვრულ ელ-ფოსტის მისამართზე ელექტრონული ფოსტის საშუალებით გაგზავნილი შეტყობინება მათთვის ჩაბარებულად ითვლება და აღნიშნულთან დაკავშირებით რაიმე სახის პრეტენზია არ ექნებათ.

### **მუხლი 3. დებულების ინტერპრეტაცია**

- 3.1. DRC უფლებამოსილია განმარტოს წინამდებარე დებულების ნებისმიერი ნორმა თავისი ინიციატივით ან ერთ-ერთი მხარის განცხადების საფუძველზე. ტრიბუნალს ასევე შეუძლია განმარტოს დებულების ის ნორმები, რომლებიც ეხება ტრიბუნალის უფლებამოსილებას და ვალდებულებებს. განმარტებებს შორის ნებისმიერი წინააღმდეგობისას, უპირატესობა ენიჭება ტრიბუნალის განმარტებას.
- 3.2. DRC-ის მიერ წინამდებარე წესების შესაბამისად მიღებული ნებისმიერი გადაწყვეტილება არის საბოლოო.
- 3.3. წინამდებარე წესებში, DRC-ზე მითითება წარმოადგენს მითითებას DRC-ის სტრუქტურულ ერთეულზე და/ან თანამდებობის პირზე, რომელიც სპეციალურად შექმნილია ან დანიშნულია წინამდებარე წესებში მოცემული ფუნქციების შესრულების მიზნით.
- 3.4. წინამდებარე წესებში მოცემულ ტერმინებს აქვთ შემდეგი მნიშვნელობა:
  - ა) DRC, მუდმივმოქმედი არბიტრაჟი - შპს „დავების განმხილველი ცენტრი“ (ს/კ 204547348), ინგლისური სახელწოდება - „Dispute Resolution Center“ Ltd;
  - ბ) DRC-ის სასამართლო, სასამართლო –რომელიც წესებით განსაზღვრულ საკითხებზე იღებს გადაწყვეტილებას.
  - გ) ტრიბუნალი, არბიტრაჟი - საარბიტრაჟო დავის განხილვისა და გადაწყვეტის მიზნით დანიშნული ან დამტკიცებული არბიტრი ან არბიტრები;
  - დ) გენერალური მდივანი – DRC-ის სამდივნოს ხელმძღვანელი;
  - ე) სამდივნო- DRC-ის სტრუქტურული ერთეული, რომელიც ახორციელებს საარბიტრაჟო დავის განხილვისა და გადაწყვეტილების მიღების ადმინისტრირებას;
  - ვ) საარბიტრაჟო მოსარჩელე – პირ(ებ)ი, რომელმაც დავის გადასაწყვეტად მიმართა DRC-ს და განაცხადა მოთხოვნ(ებ)ა.
  - ზ) საარბიტრაჟო მოპასუხე – პირ(ებ)ი, რომლის მიმართაც მოსარჩელე აყენებს მოთხოვნ(ებ)ას;

- თ) მხარე ან მხარეები – მოსარჩელე და, მოპასუხე ერთად და დამატებით მხარე ასეთის არსებობის შემთხვევაში;
- ი) მოწმე – პირ(ებ)ი, რომელიც ჩვენებას აძლევს ფაქტობრივი გარემოების შესახებ;
- კ) ექსპერტი – პირ(ებ)ი, რომელსაც გააჩნია სპეციალური ცოდნა;
- ლ) სარჩელი ან შემხვედრი სარჩელი – მოსარჩელის განცხადება, რომელიც მოიცავს მოთხოვნებს მოპასუხის მიმართ;
- მ) შესაგებელი – სარჩელზე ან შემხვედრ სარჩელზე გაკეთებული პასუხი;
- ნ) საარბიტრაჟო გადაწყვეტილება – ტრიბუნალის მიერ საარბიტრაჟო საქმის განხილვის პროცესში მიღებული ნაწილობრივი და/ან საბოლოო გადაწყვეტილება.

#### **მუხლი 4. DRC-ის სასამართლო**

- 4.1. DRC-ის სასამართლო არ ახორციელებს დავების გადაწყვეტას. ის წესებით გათვალისწინებულ საკითხებზე იღებს გადაწყვეტილებას.
- 4.1.1. ეხმარება მხარეებს ტრიბუნალის ფორმირებაში;
- 4.1.2. იღებს გადაწყვეტილებას არბიტრის შეცვლის შესახებ;
- 4.1.3. ახდენს საარბიტრაჟო გადაწყვეტილების ფორმალურ შემოწმებას;
- 4.2. DRC-ის სასამართლო გადაწყვეტილებას იღებს დანართი 1-ის შესაბამისად.
- 4.3. DRC-ის სასამართლოს თავისი საქმიანობის განხორციელებაში დახმარებას უწევს DRC-ის სამდივნო (შემდგომში - სამდივნო) გენერალური მდივნის ხელმძღვანელობით.

#### **მუხლი 41. სამდივნო**

- 1. სამდივნო ადმინისტრირებას უწევს ტრიბუნალის მიერ დავის განხილვისა და გადაწყვეტილების მიღების პროცესს, მათ შორის:
  - ა) ამოწმებს საარბიტრაჟო სარჩელს და/ ან განცხადების შესაბამისობას DRC-ის წესებთან.
  - ბ) არეგისტრირებს საარბიტრაჟო სარჩელს და/ან განცხადებას.
  - გ) DRC -ის წესებით განსაზღვრულ შემთხვევაში ამტკიცებს ტრიბუნალს.
  - დ) ეხმარება ტრიბუნალს მხარეებთან კომუნიკაციაში.
  - ე) ახდენს ზეპირი მოსმენის ჩაწერას .
  - ვ) ახდენს ტრიბუნალის გადაწყვეტილების დადასტურებას .
  - ზ) დოკუმენტების შენახვას.

#### **მუხლი 5. შეტყობინებები და მხარეებთან კომუნიკაცია**

- 5.1. ნებისმიერი შეტყობინება ან კომუნიკაცია მხარესთან უნდა განხორციელდეს წერილობითი ფორმით, გარდა 5.6. პუნქტით გათვალისწინებული შემთხვევისა. შეტყობინება (კომუნიკაცია) უნდა განხორციელდეს ისეთი ფორმით, რომ უზრუნველყოფილი იყოს შეტყობინების ჩაბარების თარიღის შესახებ ჩანაწერი ან დადასტურება.



5.2. ნებისმიერი შეტყობინება ან ნებისმიერი გზავნილი (დოკუმენტები) ჩაითვლება მხარის მიერ მიღებულად, თუ ჩაბარებულია ადრესატისათვის ან მისი წარმომადგენლისათვის უშუალოდ, ფოსტით ან კურიერის მეშვეობით:

ა) არბიტრაჟში წარდგენილ წერილობით დოკუმენტებში მითითებულ იურიდიულ, საცხოვრებელ ან სამუშაო ადგილის მისამართზე; ან

ბ) „ა“ ქვეპუნქტში მითითებული მონაცემების არ არსებობის შემთხვევაში, საარბიტრაჟო დავის მხარეებს შორის ხელშეკრულებაში მითითებულ მისამართზე; ან

გ) ამ პუნქტის „ა“ და „ბ“ ქვეპუნქტებში მითითებული მისამართის არ არსებობის შემთხვევაში, შეტყობინების გაგზავნის მომენტში DRC-სათვის ადრესატის ცნობილ უკანასკნელ მისამართზე (იურიდიული პირის და ინდივიდუალური მეწარმის შემთხვევაში – სამეწარმეო რეესტრში რეგისტრირებულ მისამართზე);

5.3. შეტყობინების/გზავნილის მიწოდება შესაძლოა განხორციელდეს ელექტრონული ფოსტით ან სხვა საკომუნიკაციო საშუალებით, რომელიც იძლევა შეტყობინების მიწოდებისა და ჩაბარების მცდელობის დადასტურებას, მათ შორის ინფორმაციას ჩაბარების თარიღის შესახებ:

ა) არბიტრაჟში წარდგენილ წერილობით დოკუმენტებში მითითებულ ელექტრონული ფოსტის მისამართზე (ან კომუნიკაციის სხვა საშუალებაზე); ან

ბ) ამ პუნქტის „ა“ ქვეპუნქტში მოცემული მონაცემის არარსებობის შემთხვევაში, საარბიტრაჟო დავის მხარეებს შორის ხელშეკრულებაში მითითებული ელექტრონული ფოსტის მისამართზე (ან კომუნიკაციის სხვა საშუალებაზე); ან

გ) ამ პუნქტის „ა“ და „ბ“ ქვეპუნქტებში მითითებული მონაცემების არარსებობის შემთხვევაში, შეტყობინების გაგზავნის მომენტში DRC-სთვის ადრესატის ცნობილ უკანასკნელ ფაქსის ნომერზე ან ელექტრონული ფოსტის მისამართზე (ან მის ექვივალენტზე) (იურიდიული პირის და ინდივიდუალური მეწარმის შემთხვევაში სამეწარმეო რეესტრში რეგისტრირებულ ელექტრონული ფოსტის მისამართზე, ასეთის არსებობის შემთხვევაში).

5.4. შეტყობინება/გზავნილი, ამ მუხლის 5.2 პუნქტის შესაბამისად, ჩაბარებულად ითვლება ადრესატისათვის მისი გადაცემის დღეს ან მისი გადაცემის მცდელობის დღეს. ადრესატისათვის ამ მუხლის 5.2 პუნქტის ა) ან ბ) ქვეპუნქტით გათვალისწინებულ მისამართზე მიწოდებული შეტყობინება ითვლება ჩაბარებულად, მიუხედავად იმისა, ჰქონდა თუ არა მიმღებს უფლებამოსილება მიეღო შეტყობინება ადრესატის სახელით ან მისთვის გადასაცემად. ელექტრონული გზავნილი/შეტყობინება მიღებულად ითვლება მისი გაგზავნის დღეს, გარდა იმ შემთხვევისა, როცა ელექტრონული საშუალებით გზავნილზე იმავე საშუალებით მიღებულია შეტყობინება, რომ ადრესატს ელექტრონული გზავნილი არ მიუვიდა.

5.5. საარბიტრაჟო განხილვის პროცესში ნებისმიერი წერილობითი დოკუმენტი სამდივნოს უნდა გადაეცეს იმდენ ეგზემპლარად, რომ თითოეულმა არბიტრმა, თითოეულმა მხარემ და სამდივნომ მიიღოს თითო ეგზემპლარი. საარბიტრაჟო ტრიბუნალის მიერ

მხარეთათვის მიწოდებული ნებისმიერი შეტყობინების/გზავნილის ასლი უნდა გადაეცეს სამდივნოს.

- 5.6. DRC-ს სამდივნოს შეუძლია შეტყობინება მიაწოდოს ადრესატს ან მის წარმომადგენელს ტელეფონით, რის შესახებაც დგება ოქმი, რაც სათანადო ფორმით განხორციელებულ გადაცემად ჩაითვლება და არ არის აუცილებელი იგივე ინფორმაციის ამ მუხლის 5.2. ან 5.3. პუნქტით გათვალისწინებული სხვა საშუალებით გადაცემა.
- 5.7. DRC-ის სამდივნო თვითონ იღებს გადაწყვეტილებას, შეტყობინების რომელი ფორმა გამოიყენოს, რომელ მისამართზე გააგზავნოს იგი და არ არის ვალდებული დაიცვას თანმიმდევრობა.
- 5.8. ნებისმიერი შეტყობინება/გზავნილი უნდა ჩაითვალოს მიღებულად მაშინ, როცა ადრესატმა პირველად მიიღო შეტყობინება 5.2., 5.3. ან 5.6. პუნქტის შესაბამისად. ამ მიზნებისათვის ვადა დადგენილი უნდა იყოს შეტყობინების მიღების ადგილის ადგილობრივი დროის მიხედვით. როცა ამგვარი შეტყობინება ეგზავნება ერთზე მეტ მხარეს, ამგვარი შეტყობინება თითოეული მხარისათვის უნდა ჩაითვალოს მიღებულად იმ თარიღის მიხედვით, როცა ის გადაეცა ბოლო ადრესატს 5.2., 5.3. ან 5.6. პუნქტის შესაბამისად.
- 5.9. საარბიტრაჟო განხილვის მონაწილე ვალდებულია დაუყოვნებლივ აცნობოს DRC-ის სამდივნოს საქმის წარმოების განმავლობაში მისამართის (მათ შორის ტელეფონის, ელ. ფოსტის მისამართის) შეცვლის და ახალი მისამართის შესახებ.

## **მუხლი 6. ვადების გამოთვლა**

- 6.1. DRC-ის წესებით გათვალისწინებული ვადის დენა იწყება შეტყობინების ჩაბარების დღის მომდევნო დღიდან. გამოსათვლელ ვადაში ითვლება დასვენების და უქმე დღეები. თუ ვადის ბოლო დღე არის ოფიციალური დასვენების ან უქმე დღე იმ სახელმწიფოში, სადაც განხორციელდა შეტყობინების ჩაბარება, ასეთი ვადა დასრულებულად ჩაითვლება მის მომდევნო პირველ სამუშაო დღეს.
- 6.2. წესებში მითითებული ნებისმიერი ვადა გამოითვლება კალენდარული დღეებით.

## **თავი II. საარბიტრაჟო განხილვის დაწყება**

### **მუხლი 7. საარბიტრაჟო სარჩელი (განაცხადი)**

- 7.1. მხარე, რომელსაც სურს დაიწყოს დავის საარბიტრაჟო განხილვა (შემდგომში - მოსარჩელე), საარბიტრაჟო სარჩელს გადასცემს DRC-ის სამდივნოს.
- 7.2. საარბიტრაჟო სარჩელში უნდა აღინიშნოს:
  - ა) მოსარჩელის, სხვა მხარეებისა და მათი წარმომადგენლების (ასეთის არსებობის შემთხვევაში) სრული სახელები და საკონტაქტო ინფორმაცია (მათ შორის მისამართი,

ტელეფონის ნომერი, ელექტრონული ფოსტის მისამართი, (ასეთის არსებობის შემთხვევაში)

ბ) დავის არსი და ის ფაქტობრივი გარემოებები, რომლიდანაც გამომდინარეობს მოთხოვნა;

გ) მტკიცებულებები, რომლებიც ადასტურებს მოსარჩელის მიერ მითითებულ ფაქტობრივ გარემოებებს;

დ) საარბიტრაჟო მოსარჩელის მოთხოვნ(ებ)ა. თუ მოთხოვნ(ებ)ის კონკრეტული თანხით გამოხატვა შეუძლებელია, მოსარჩელემ უნდა მიუთითოს ამ მოთხოვნ(ებ)ის მიახლოებითი ფულადი ღირებულება;

ე) მითითება საარბიტრაჟო შეთანხმების პირობების შესახებ, რომელსაც ეყრდნობა საარბიტრაჟო მოსარჩელე მისი მოთხოვნ(ებ)ის დაყენებისას, აგრეთვე იმ ხელშეკრულების ან სხვა დოკუმენტების ასლი, რომელშიც მოცემულია აღნიშნული საარბიტრაჟო შეთანხმება ან რომლიდანაც გამომდინარეობს საარბიტრაჟო მოსარჩელის მოთხოვნა;

ვ) რამდენიმე საარბიტრაჟო მოთხოვნის შემთხვევაში, მითითება, თუ რომელი საარბიტრაჟო შეთანხმებიდან გამომდინარეობს თითოეული მოთხოვნა;

ზ) დოკუმენტების ნუსხა, რომელიც ერთვის საარბიტრაჟო სარჩელს.

თ) საარბიტრაჟო სარჩელთან ერთად მოსარჩელეს შეუძლია წარადგინოს სხვა ინფორმაცია და დოკუმენტები, რომელსაც ის ჩათვლის საჭიროდ ან რომელთაც შეუძლიათ ხელი შეუწყონ დავის ეფექტურად გადაწყვეტას.

7.2.<sup>1</sup> საარბიტრაჟო შეთანხმებით, ან წესებით გათვალისწინებულ შემთხვევაში, მოსარჩელე უფლებამოსილია საარბიტრაჟო სარჩელთან ერთად წარადგინოს არბიტრობის კანდიდატი, მისი საკონტაქტო მონაცემები, ან მოთხოვნა არბიტრის დანიშვნის შესახებ. არბიტრობის კანდიდატის დასახელებასთან ერთად, მოსარჩელე ვალდებულია წარადგინოს არბიტრობის კანდიდატის დეკლარაცია დამოუკიდებლობისა და მიუკერძოებლობის შესახებ (DRC-ის მიერ დადგენილი ფორმით)

7.3. მოსარჩელემ საარბიტრაჟო სარჩელის წარდგენასთან ერთად უნდა გადაიხადოს საარბიტრაჟო სარჩელის რეგისტრაციის საფასური.

7.4. იმ შემთხვევაში, თუ საარბიტრაჟო სარჩელი არ არის სრულყოფილი, ან არ არის დაცული წესებით გათვალისწინებული მოთხოვნები, DRC-ს სამდივნოს შეუძლია განუსაზღვროს ვადა მოსარჩელეს სარჩელის სრულყოფისათვის, რომლის გაუთვალისწინებლობის შემთხვევაში, სამდივნოს შეუძლია უარი თქვას საარბიტრაჟო სარჩელის რეგისტრაციაზე. უარი სარჩელის რეგისტრაციაზე არ ართმევს მოსარჩელეს უფლებას კვლავ დააყენოს იგივე მოთხოვნ(ებ)ა.

7.5. თანდართულ დოკუმენტებთან ერთად სარჩელის სამდივნოსათვის ელექტრონული ფორმით გადაცემის შემთხვევაში, მოსარჩელე ვალდებულია ამ დოკუმენტების ორიგინალი (ან დამოწმებული ასლი) წარუდგინოს DRC-ის სამდივნოს:

ა) ტრიბუნალის მიერ განსაზღვრულ ვადაში; ან

ბ) DRC-ის სამდივნოს მიერ განსაზღვრულ ვადაში.

7.6. DRC-ს სამდივნო, თუ ჩათვლის, რომ დაცულია ამ მუხლით გათვალისწინებული მოთხოვნები, ახდენს საარბიტრაჟო სარჩელის რეგისტრაციას, რის შემდეგაც საარბიტრაჟო სარჩელს და მის დანართ(ებ)ს უგზავნის მოპასუხე(ებ)ს.

## **მუხლი 8. შესაგებელი, შემხვედრი საარბიტრაჟო მოთხოვნა**

8.1. საარბიტრაჟო სარჩელის მიღებიდან 15 (თხუთმეტი) დღის ვადაში მოპასუხემ უნდა წარუდგინოს DRC-ის სამდივნოს შესაგებელი საარბიტრაჟო სარჩელზე (შემდგომში – შესაგებელი). შესაგებელში უნდა აღინიშნოს:

ა) მოპასუხის და მისი წარმომადგენლის სახელი, გვარი, საკონტაქტო ინფორმაცია (მათ შორის მისამართი, ტელეფონის ნომერი, ელექტრონული ფოსტის მისამართი);

ბ) მოსაზრება საარბიტრაჟო მოსარჩელის მოთხოვნასთან (მოთხოვნებთან) და იმ ფაქტებთან დაკავშირებით, რომლებიდანაც გამომდინარეობს დავა;

გ) დოკუმენტების ნუსხა, რომელიც ერთვის შესაგებელს.

დ) მოპასუხეს შეუძლია შესაგებელთან ერთად DRC-ის სამდივნოს წარუდგინოს სხვა ინფორმაცია და დოკუმენტები იმ კონკრეტული ფაქტებისა და გარემოებების შესახებ, რომელზეც ამყარებს თავის შესაგებელს.

8.1.<sup>1</sup> საარბიტრაჟო შეთანხმებით, ან წესებით გათვალისწინებულ შემთხვევაში, მოპასუხე უფლებამოსილია საარბიტრაჟო შესაგებელთან ერთად წარადგინოს არბიტრობის კანდიდატი, მისი საკონტაქტო მონაცემები, ან მოთხოვნა არბიტრის დანიშვნის შესახებ. არბიტრობის კანდიდატის დასახელებასთან ერთად, მოპასუხე ვალდებულია წარადგინოს არბიტრობის კანდიდატის დეკლარაცია დამოუკიდებლობისა და მიუკერძოებლობის შესახებ (DRC-ის მიერ დადგენილი ფორმით)“.

8.2. თუ საარბიტრაჟო მოპასუხე არ წარადგენს შესაგებელს საარბიტრაჟო სარჩელზე, ტრიბუნალი განაგრძობს საქმის განხილვას. შესაგებლის წარუდგენლობა არ შეიძლება ჩაითვალოს სასარჩელო მოთხოვნის ცნობად.

8.3. მოპასუხემ შესაგებელი და მისი დანართი იმდენ ეგზემპლარად უნდა გადასცეს DRC-ს სამდივნოს, როგორც ეს მითითებულია ამ დებულების 5 მუხლის 5.5 პუნქტში.

8.4. DRC-ის სამდივნოს, ხოლო თუ საარბიტრაჟო ტრიბუნალი ფორმირებულია - ტრიბუნალს, დასაბუთებული შუამდგომლობის საფუძველზე, შეუძლია გაზარდოს შესაგებლის წარდგენის ვადა.

8.5. DRC-ის სამდივნო შესაგებელს უგზავნის ყველა სხვა მხარეს.

8.6. შემხვედრი საარბიტრაჟო სარჩელის მიმართ ვრცელდება დებულების 7 მუხლის მოთხოვნები.

8.7. მოსარჩელემ, შემხვედრი საარბიტრაჟო მოთხოვნის მიღებიდან 15 (თხუთმეტი) დღის ვადაში, უნდა წარუდგინოს DRC-ის სამდივნოს შესაგებელი შემხვედრ საარბიტრაჟო სარჩელზე ამ მუხლის შესაბამისად. DRC-ის სამდივნოს, ხოლო თუ საარბიტრაჟო

ტრიბუნალი ფორმირებულია - ტრიბუნალს, დასაბუთებული შუამდგომლობის საფუძველზე, შეუძლია გაუგრძელოს მოსარჩელეს შესაგებლის წარდგენის ვადა.

## **მუხლი 9. საარბიტრაჟო შეთანხმების შემოწმება**

- 9.1. თუ მხარე, რომელსაც წაეყენა საარბიტრაჟო მოთხოვნა, არ წარადგენს შესაგებელს, ან დააყენებს ერთ ან რამდენიმე პრეტენზიას საარბიტრაჟო შეთანხმების არსებობის, ნამდვილობის ან საარბიტრაჟო შეთანხმების შინაარსის შესახებ, ან აყენებს საკითხს ერთ საარბიტრაჟო განხილვაში ყველა მოთხოვნის გადაწყვეტის შეუძლებლობის შესახებ, საარბიტრაჟო განხილვა გაგრძელდება და გადაწყვეტილებას იღებს ტრიბუნალი. გარდა იმ შემთხვევისა, როცა ტრიბუნალი არ არის დაკომპლექტებული და სამდივნო ამ საკითხებს გადასაწყვეტად გადასცემს DRC-ის სასამართლოს ამ მუხლის 9.2. პუნქტის შესაბამისად.
- 9.2. DRC-ის სასამართლო მიიღებს გადაწყვეტილებას საარბიტრაჟო პროცესის შეწყვეტის შესახებ მხოლოდ იმ შემთხვევაში, თუ აშკარაა DRC-ის იურისდიქციის არარსებობა.
- 9.3. იმ შემთხვევაში, თუ სასამართლომ მიიღო გადაწყვეტილება ამ მუხლის 9.2. პუნქტის შესაბამისად საარბიტრაჟო განხილვის შეწყვეტის თაობაზე რომელიმე საარბიტრაჟო მოთხოვნასთან დაკავშირებით, ასეთი გადაწყვეტილება არ ართმევს მხარეს უფლებას, საარბიტრაჟო პროცესის შეწყვეტის საფუძველად არსებული გარემოებების აღმოფხვრის შემთხვევაში, თავიდან დააყენოს იგივე საარბიტრაჟო მოთხოვნა.
- 9.4. თუ სათანადოდ ინფორმირებული მხარე საარბიტრაჟო განხილვაში არ მიიღებს მონაწილეობას ან უარს ამბობს მონაწილეობის მიღებაზე, საარბიტრაჟო განხილვა გაგრძელდება, მიუხედავად ამგვარი უარისა ან მონაწილეობის მიუღებლობისა.
- 9.5. არბიტრაჟს უნარჩუნდება კომპეტენცია განიხილოს დავა იმ შემთხვევაშიც, თუ გაცხადებული იქნება, რომ ხელშეკრულება არ არსებობს ან ბათილია, იმ პირობით, რომ ტრიბუნალი მხარეთა საარბიტრაჟო შეთანხმებას ჩათვლის ნამდვილად.
- 9.6. არბიტრაჟის კომპეტენციის შესახებ პრეტენზია შეიძლება გაკეთდეს შესაგებელთან ერთად ან შესაგებლის წარუდგენლობის შემთხვევაში მისი წარდგენისათვის განსაზღვრულ ვადაში.
- 9.7. განცხადება ტრიბუნალის კომპეტენციის გადაჭარბების შესახებ უნდა გაკეთდეს მხარის მიერ შესაბამის გარემოებებზე ინფორმაციის მიღებიდან 7 დღის ვადაში.
- 9.8. განცხადება არბიტრაჟის კომპეტენციის შესახებ შესაძლებელია გაკეთდეს ამ მუხლის 9.6. და 9.7. პუნქტებით განსაზღვრული ვადის გასვლის შემდეგაც, თუ აღნიშნული ვადის გასვლას არბიტრაჟი საპატიოდ მიიჩნევს.

## **მუხლი 10. საარბიტრაჟო განხილვაში დამატებითი მხარის ჩართვა**

10.1. მხარეს, რომელსაც სურს საარბიტრაჟო განხილვაში ჩართოს დამატებითი მხარე, დამატებითი მხარის წინააღმდეგ საარბიტრაჟო სარჩელით უნდა მიმართოს DRC-ის სამდივნოს დებულების მე-7 მუხლის შესაბამისად და გადაიხადოს სარჩელის რეგისტრაციის საფასური და საარბიტრაჟო მოსაკრებელი. დამატებითი მხარის მიმართ საარბიტრაჟო განხილვა ითვლება დაწყებულად სამდივნოს მიერ სარჩელის მიღების დღიდან და მასზე სრულად ვრცელდება დებულების მე-9 მუხლის მოთხოვნები. საარბიტრაჟო ტრიბუნალის ფორმირების შემდეგ საარბიტრაჟო განხილვაში დამატებითი მხარის ჩართვა არ დაიშვება, თუ საარბიტრაჟო განხილვის ყველა მხარე, მათ შორის დამატებითი მხარე, სხვა რამეზე არ შეთანხმდებიან. DRC-ის სამდივნოს შეუძლია მხარეებს განუსაზღვროს ვადა დამატებითი მხარის განხილვაში ჩართვის შესახებ სარჩელის წარდგენისათვის.

10.2. საარბიტრაჟო განხილვაში დამატებითი მხარის ჩართვისათვის აუცილებელია შემდეგი წინაპირობების არსებობა:

ა). დამატებით მხარესთან საარბიტრაჟო შეთანხმების არსებობა;

ბ). საარბიტრაჟო ტრიბუნალის ფორმირება არ უნდა იყო დასრულებული.

გ) ამ წინაპირობების არსებობის შემთხვევაში, DRC-ის სამდივნო მიღებულ სარჩელს დამატებითი მხარის წინააღმდეგ უგზავნის ყველა სხვა მხარეს და ასევე, დამატებით მხარეს. დამატებითმა მხარემ შესაგებელი უნდა წარადგინოს ამ დებულების მე-8 მუხლის შესაბამისად.

10.3. დამატებით მხარეს შეუძლია წარადგინოს საარბიტრაჟო სარჩელი საარბიტრაჟო განხილვის ნებისმიერი მხარის წინააღმდეგ.

## **მუხლი 11. ერთზე მეტი საარბიტრაჟო შეთანხმება**

მოთხოვნები, რომლებიც გამომდინარეობს ერთზე მეტი საარბიტრაჟო შეთანხმებიდან, შესაძლებელია განხილული იქნეს ერთ საარბიტრაჟო წარმოებაში, დებულების მე-9 მუხლის და 23.5. პუნქტის გათვალისწინებით.

## **მუხლი 12. საარბიტრაჟო საქმეების გაერთიანება**

12.1. მხარის შუამდგომლობის საფუძველზე, DRC-ის სასამართლოს შეუძლია მიიღოს გადაწყვეტილება ორი ან მეტი საარბიტრაჟო სარჩელის ერთ საარბიტრაჟო საქმეში გაერთიანების შესახებ, როცა:

ა) მხარეები შეთანხმდნენ საარბიტრაჟო საქმეთა გაერთიანების შესახებ,

ბ) ყველა მოთხოვნა ერთი და იმავე საარბიტრაჟო შეთანხმებას ეფუძნება,

გ) საარბიტრაჟო მოთხოვნები სხვადასხვა საარბიტრაჟო შეთანხმებას ეფუძნება, მაგრამ საარბიტრაჟო განხილვა მიმდინარეობს ერთი და იმავე მხარეებს შორის,

დ) დავა წარმოშობილია ერთი და იმავე სამართლებრივი ურთიერთობიდან და DRC–ის სასამართლო ჩათვლის, რომ საარბიტრაჟო შეთანხმებები თავსებადია.

12.2. საარბიტრაჟო საქმეების გაერთიანების საკითხის გადაწყვეტისას DRC–ის სასამართლომ შესაძლებელია მხედველობაში მიიღოს ნებისმიერი გარემოება, რომელსაც ის ჩათვლის საქმესთან კავშირში, მათ შორის თუ რა ეტაპზეა საარბიტრაჟო განხილვა, დანიშნულია თუ არა ტრიბუნალი და ა.შ.

12.3. საარბიტრაჟო საქმეების გაერთიანებისას, ისინი ერთიანდებიან იმ საარბიტრაჟო საქმეში, რომელიც უფრო ადრე დაიწყო, თუ ყველა მხარე სხვა რამეზე არ შეთანხმდა.

### **თავი III. საარბიტრაჟო ტრიბუნალი**

#### **მუხლი 13. ზოგადი ნაწილი**

13.1. თითოეული არბიტრი უნდა იყოს საარბიტრაჟო განხილვის მხარეებისაგან დამოუკიდებელი, მიუკერძოებელი და დარჩეს ასეთად მთელი საარბიტრაჟო განხილვის განმავლობაში.

13.2. დანიშნამდე ან დამტკიცებამდე არბიტრობის კანდიდატმა უნდა მოაწეროს ხელი დეკლარაციას, რომ მას აქვს სათანადო დრო საარბიტრაჟო დავის განხილვისათვის, არის დამოუკიდებელი და მიუკერძოებელი, ასევე უნდა მიუთითოს თავისი საკონტაქტო მონაცემები, რომელიც კონკრეტული დავის განხილვის პროცესში გამოყენებული იქნება გზავნილის/შეტყობინების მისაღებად. არბიტრობის კანდიდატმა DRC–ის სამდივნოს წერილობით უნდა აცნობოს ნებისმიერი ფაქტისა და გარემოების შესახებ, რომელმაც შეიძლება წარმოშვას დასაბუთებული ეჭვი არბიტრის მიუკერძოებლობისა და დამოუკიდებლობის თაობაზე. სამდივნო არბიტრობის კანდიდატის ამ განაცხადს უგზავნის ტრიბუნალის სხვა წევრებს და საარბიტრაჟო განხილვის მხარეებს. სამდივნოს შეუძლია განუსაზღვროს მხარეებს დრო მოსაზრებების წარმოსადგენად.

13.3. არბიტრი ვალდებულია სამდივნოს, ტრიბუნალის სხვა წევრებს და მხარეებს დაუყოვნებლივ წერილობით აცნობოს საარბიტრაჟო ტრიბუნალის ფორმირების შემდეგ წარმოშობილი ფაქტისა და გარემოების შესახებ, რომელმაც შეიძლება წარმოშვას დასაბუთებული ეჭვი არბიტრის მიუკერძოებლობისა და დამოუკიდებლობის თაობაზე.

13.4. არც ერთ მხარეს ან მხარის წარმომადგენელს არა აქვს უფლება, საარბიტრაჟო საქმესთან დაკავშირებით, სხვა მხარეებისაგან ან მხარეთა წარმომადგენლებისაგან დამოუკიდებლად ჰქონდეს კომუნიკაცია ტრიბუნალთან ან არბიტრობის ნებისმიერ კანდიდატთან, გარდა იმ შემთხვევისა, როცა კანდიდატის ინფორმირება ხდება დავის ზოგადი არსის შესახებ, რათა განხილულ იქნას საკითხი, თუ რამდენად აქვს მას სათანადო დრო საქმის განხილვისათვის, ან შესაძლებლობა იყოს დამოუკიდებელი და მხარეების მიმართ მიუკერძოებელი, ასევე, შეესაბამებოდეს საარბიტრაჟო შეთანხმებით გათვალისწინებულ მოთხოვნებს (ასეთის არსებობის შემთხვევაში). არც ერთ მხარეს და მის წარმომადგენელს არა აქვს უფლება, სხვა მხარეებისაგან ან მხარეთა

წარმომადგენლებისაგან დამოუკიდებლად ჰქონდეს კომუნიკაცია ტრიბუნალის თავმჯდომარეობის კანდიდატთან.

- 13.5. არბიტრები ვალდებული არიან თავიანთი საქმიანობა განახორციელონ DRC-ის წესების, საქართველოს არბიტრთა ასოციაციის მიერ დამტკიცებული „არბიტრთა ეთიკის კოდექსის“ და მხარეთა შეთანხმების შესაბამისად.
- 13.6. თუ მხარეებმა შეთანხმებით სხვა რამე არ გაითვალისწინეს, ტრიბუნალის ფორმირება ხდება მე-15 და მე-16 მუხლების შესაბამისად.

#### **მუხლი 14. არბიტრთა რაოდენობა**

- 14.1. დავა განიხილება ერთი ან სამი არბიტრისაგან შემდგარი ტრიბუნალის მიერ.
- 14.2. იმ შემთხვევაში, თუ მხარეები არ არიან შეთანხმებულნი არბიტრთა რაოდენობაზე, დავა განიხილება ერთი არბიტრით ფორმირებული ტრიბუნალის მიერ, გარდა 14.3. პუნქტით გათვალისწინებული შემთხვევისა.
- 14.3. თუ საარბიტრაჟო მოთხოვნების ჯამი შეადგენს 2,000,000 ლარს ან მეტს და მხარეები არ არიან შეთანხმებული არბიტრთა რაოდენობაზე, დავა განიხილება სამი არბიტრით ფორმირებული საარბიტრაჟო ტრიბუნალის მიერ.

#### **მუხლი 15. ტრიბუნალის ფორმირება**

- 15.1. მხარეებს შეუძლიათ შეთანხმდნენ ტრიბუნალის ფორმირების ამ მუხლით გათვალისწინებულისაგან განსხვავებულ პროცედურაზე. იმ შემთხვევაში, თუ მხარეები ასეთ პროცედურაზე არ შეთანხმებულან ან ტრიბუნალის ფორმირების შეთანხმებული პროცედურა საკმარისად ნათელი არ არის, ტრიბუნალის ფორმირება ხდება ამ მუხლის 15.2.– 15.6. პუნქტების შესაბამისად.
- 15.2. იმ შემთხვევაში, თუ დავა უნდა განიხილოს ერთმა არბიტრმა, მხარეებს შეუძლიათ ერთობლივად დაასახელონ არბიტრის კანდიდატურა 15 დღის განმავლობაში იმ დღიდან, როდესაც მოპასუხეს ჩაბარდა საარბიტრაჟო სარჩელი. თუ ამ პროცედურის დაცვით ვერ მოხდება არბიტრის კანდიდატურის წარდგენა, არბიტრს ნიშნავს DRC-ის სასამართლო.
- 15.3. იმ შემთხვევაში, თუ საარბიტრაჟო შეთანხმება ითვალისწინებს სამი არბიტრით ფორმირებული ტრიბუნალის მიერ დავის განხილვას, თითოეულმა მხარემ საარბიტრაჟო სარჩელის რეგისტრაციის შესახებ შეტყობინების მიღებიდან 15 დღის ვადაში უნდა წარადგინოს არბიტრობის თითო კანდიდატი. არბიტრობის კანდიდატის დასახელებასთან ერთად, მხარე ვალდებულია წარადგინოს არბიტრობის კანდიდატის რეზიუმე და დეკლარაცია დამოუკიდებლობისა და მიუკერძოებლობის შესახებ (DRC-ის მიერ დადგენილი ფორმით). თუ რომელიმე მხარე არ წარადგენს არბიტრობის კანდიდატს, შესაბამისი მხარის ნაცვლად არბიტრს ნიშნავს DRC-ის სასამართლო.



- 15.4. როდესაც დავა განხილული უნდა იქნას სამი არბიტრით ფორმირებული ტრიბუნალის მიერ, თუ მხარეები სხვა პროცედურაზე არ შეთანხმდებიან, უკვე დანიშნული ორი არბიტრი მათი დანიშვნიდან 10 (ათი) დღის ვადაში შეთანხმებულად ასახელებენ მესამე არბიტრის კანდიდატურას, რომელიც DRC-ის სამდივნოს ხელმძღვანელის მიერ დამტკიცების შემთხვევაში იქნება ტრიბუნალის თავმჯდომარე. თუ მოცემულ ვადაში ან მხარეთა მიერ შეთანხმებულ სხვა ვადაში, ამ პუნქტის მიხედვით არ მოხდება მესამე არბიტრის კანდიდატურის დასახელება, მესამე არბიტრს ნიშნავს DRC-ის სასამართლო.
- 15.5. მოსარჩელეთა ან მოპასუხეთა სიმრავლის შემთხვევაში და როცა დავა განხილული უნდა იქნას სამ არბიტრიანი ტრიბუნალის მიერ, თანამოსარჩელებმა ერთობლივად და თანამოპასუხეებმა ერთობლივად უნდა დაასახელონ არბიტრობის თითო კანდიდატურა ამ მუხლით გათვალისწინებულ ვადებში.
- 15.6. დამატებითი მხარის საარბიტრაჟო განხილვაში ჩართვის შემთხვევაში, მხარეებმა ერთობლივად უნდა დაასახელონ არბიტრობის კანდიდატები, დამატებითი მხარის საარბიტრაჟო განხილვაში ჩართვიდან 15 დღის ვადაში, თუ მხარეები სხვა რამეზე არ შეთანხმდებიან.
- 15.7. იმ შემთხვევაში თუ ამ მუხლის 15.6. და 15.7. პუნქტების შესაბამისად არ ხდება არბიტრობის კანდიდატის შეთანხმებულად დასახელება, DRC-ის სასამართლოს შეუძლია დანიშნოს ტრიბუნალის თითოეული წევრი, მათ შორის ტრიბუნალის თავმჯდომარე.
- 15.8. სადაზღვევო დავებზე, DRC-ის სასამართლო როგორც წესი, არბიტრად ნიშნავს პირს, რომელიც DRC-ის არბიტრთა სიაში რეგისტრირებულია სადაზღვევო სფეროში არსებული დავების განხილველ არბიტრად.

## **მუხლი 16. არბიტრთა დანიშვნა და დამტკიცება**

- 16.1. არბიტრთა დანიშვნის ან დამტკიცების საკითხის გადაწყვეტისას DRC-ის სასამართლო ითვალისწინებს დავის ხასიათს, საარბიტრაჟო განხილვის ადგილს, ენას და გამოსაყენებელ სამართალს. არბიტრობის კანდიდატის რეზიდენტობას, მის საცხოვრებელ ადგილს და სხვა შესაძლო კავშირებს იმ ქვეყნებთან, რომლის რეზიდენტებიც არიან მხარეები ან სხვა არბიტრები, ასევე, აქვს თუ არა არბიტრობის კანდიდატს სათანადო დრო და შესაძლებლობა განიხილოს დავა DRC-ის წესების შესაბამისად. იგივე წესი გამოიყენება მაშინაც, როდესაც სამდივნოს ხელმძღვანელი იღებს გადაწყვეტილებას არბიტრად დამტკიცების შესახებ ამ მუხლის 16.2. პუნქტის შესაბამისად.
- 16.2. სამდივნოს ხელმძღვანელი ამტკიცებს მხარეების მიერ შემოთავაზებულ კანდიდატს. იმ შემთხვევაში, თუ სამდივნოს ხელმძღვანელი ჩათვლის, რომ არბიტრობის კანდიდატი არ უნდა იქნას დამტკიცებული, საკითხი განსახილველად გადაეცემა DRC-ის სასამართლოს.

- 16.3. არბიტრობის კანდიდატის დანიშვნა ან დამტკიცება ხდება დებულების დანართ #2-ში (საარბიტრაჟო ტრიბუნალის ჰონორარი, ხარჯები, პირობები) მითითებული პირობებით.
- 16.4. DRC-ის სასამართლოს მიერ ერთპიროვნული არბიტრის ან ტრიბუნალის თავმჯდომარის დებულების მე-15 მუხლის შესაბამისად დანიშვნის შემთხვევაში, თუ გაცხადებული საარბიტრაჟო მოთხოვნის ჯამი აღემატება 2,000,000 (ორი მილიონი) ლარს, დანიშვნა ხდება შემდეგი პროცედურების გათვალისწინებით:
- ა) DRC-ის **სამდივნო** მხარეებს აწვდის სიას არბიტრობის 3 კანდიდატის მითითებით და თითოეული კანდიდატის განცხადებას, რომ მას აქვს სათანადო დრო საარბიტრაჟო დავის განხილვისათვის, არის დამოუკიდებელი და მიუკერძოებელი;
  - ბ) საარბიტრაჟო განხილვის თითოეულმა მხარემ ამ პუნქტის „ა“ ქვეპუნქტში მითითებული განცხადების მიღებიდან 15 დღის ვადაში უნდა წარუდგინოს DRC-ს თავისი მოსაზრება წარდგენილ კანდიდატებთან დაკავშირებით შემდეგი წესის დაცვით: 1) სიაში უნდა გამორიცხოს 1 კანდიდატი, რომლის დანიშვნის წინააღმდეგაცაა; და 2) სიაში დარჩენილ თითოეულ კანდიდატს უნდა მიანიჭოს ორი ან ერთი ქულა იმის მიხედვით თუ ვის ანიჭებს უპირატესობას (არ შეიძლება ერთი დაიგივე ქულის მინიჭება კანდიდატისათვის). თუ მხარე (მხარეები) არ წარადგენს თავის პოზიციას ამ პუნქტით გათვალისწინებული წესით, ჩაითვლება, რომ მან არბიტრობის თითოეულ კანდიდატს მიანიჭა ერთი ქულა;
  - გ) მიღებული ინფორმაციის საფუძველზე DRC-ის სასამართლო ერთპიროვნულ არბიტრად ან ტრიბუნალის თავმჯდომარედ ნიშნავს იმ კანდიდატს, რომელსაც მხარეებისაგან მიღებული შეფასების გათვალისწინებით აქვს ყველაზე მაღალი ჯამური ქულა;
  - დ) კანდიდატებისათვის თანაბარი ქულების მინიჭების შემთხვევაში, DRC-ის სასამართლო თავისი შეხედულებისამებრ ნიშნავს არბიტრს ან ტრიბუნალის თავმჯდომარეს, რის შესახებაც აცნობებს მხარეებს;
  - ე) იმ შემთხვევაში თუ ამ მუხლის 16.4 პუნქტით გათვალისწინებული პროცედურის შესაბამისად არბიტრის ან საარბიტრაჟო ტრიბუნალის თავმჯდომარის დანიშვნა არ განხორციელდება, დანიშვნას განახორციელებს DRC-ის სასამართლო თავისი შეხედულებისამებრ.

## **მუხლი 17. არბიტრის აცილება**

- 17.1. მხარეს უფლება აქვს მოითხოვოს არბიტრის აცილება თუ მიიჩნევს, რომ ის არ არის დამოუკიდებელი ან/და მიუკერძოებელი, ან რაიმე სხვა საფუძველით (მათ შორის თუ არბიტრი არ შეესაბამება მხარეთა შეთანხმებულ კვალიფიკაციას; ან არბიტრი ფაქტობრივად ან იურიდიულად შეზღუდულია თავისი ფუნქციის შესრულებაში; ან არბიტრი არ ავლენს სათანადო ყურადღებას დავის სწრაფი და ნაკლები დანახარჯებით განხილვისათვის), DRC-ის სამდივნოსათვის არბიტრის აცილების შესახებ წერილობითი მიმართვით.

- 17.2. წესების 17.1 პუნქტით გათვალისწინებულ რომელიმე გარემოების არსებობისას მხარის შუამდგომლობის საფუძველზე ან საკუთარი ინიციატივით DRC-ის სადვინოს შეუძლია მიმართოს DRC-ის სასამართლოს არბიტრის აცილების შუამდგომლობით.
- 17.3. მხარეს, მის მიერ წარდგენილი კანდიდატურის აცილების მოთხოვნის უფლება გააჩნია იმ შემთხვევაში თუ აცილების საფუძველი მისთვის ცნობილი გახდა არბიტრის დანიშვნის შემდეგ.
- 17.4. მხარე კარგავს არბიტრის აცილების უფლებას თუ მან აცილების შესახებ განცხადებით არ მიმართა DRC-ის სამდვინოს 15 დღის ვადაში იმ დღიდან, როდესაც მისთვის ცნობილი გახდა აცილების საფუძველების შესახებ.
- 17.5. სამდვინო არბიტრის აცილების შესახებ მხარის განაცხადს უგზავნის სხვა მხარე(ებ)ს და ტრიბუნალის წევრებს და მათ აქვთ საშუალება 15 (თხუთმეტი) დღის ვადაში წარადგინონ წერილობითი მოსაზრებები. სამდვინოს შეუძლია დაადგინოს განსხვავებული ვადა წერილობითი მოსაზრებების წარდგენისათვის.
- 17.6. თუ არბიტრი, რომლის აცილების საკითხიც განიხილება, არ გადადგა მისი აცილების საკითხის დაყენებიდან 15 დღის ვადაში და თუ მეორე მხარე არ დაეთანხმა აცილებას ამ მუხლის 17.4. პუნქტით განსაზღვრულ ვადაში, ამ ვადის ამოწურვიდან 15 დღის ვადაში არბიტრის აცილების შესახებ საკითხს გადაწყვეტს DRC-ის სასამართლო.
- 17.7. თუ არბიტრი მოახდენს თვითაცილებას, ან თუ მეორე მხარე დაეთანხმება არბიტრის აცილებას, არბიტრი ჩაითვლება აცილებულად.

## **მუხლი 18. არბიტრის შეცვლა**

- 18.1. არბიტრი შეიცვლება, თუ:
- ა) არბიტრი გარდაიცვალა;
  - ბ) არბიტრის მიმართ დაყენებული აცილების მოთხოვნა დაკმაყოფილდა;
  - გ) არბიტრი ნებაყოფლობით გადადგა;
  - დ) DRC-ის სასამართლო სამდვინოს ან მხარის მოთხოვნის საფუძველზე გადაწყვეტს, რომ არბიტრი ფაქტობრივად ან იურიდიულად შეზღუდულია თავისი ფუნქციების შესრულებაში, ან არბიტრი არ ასრულებს თავის ფუნქციებს.
  - ე) არბიტრი დაინიშნა ან არჩეულ იქნა თანამდებობაზე, რომელთანაც არბიტრის ფუნქციის შესრულება წარმოშობს ინტერესთა კონფლიქტს.
- 18.2. ამ მუხლის 18.1. პუნქტის დ) ქვეპუნქტების საფუძველზე არბიტრის შეცვლის საკითხზე DRC-ის სასამართლო გადაწყვეტილებას იღებს არბიტრ(ებ)ის და მხარეების მოსაზრებების გათვალისწინებით.
- 18.3. შეცვლილი არბიტრის ნაცვლად არბიტრის დანიშვნას განახორციელებს DRC-ის სასამართლო.
- 18.4. თუ საარბიტრაჟო მოსმენის დასრულების და მხარეებისაგან დავასთან დაკავშირებით ბოლო მოსაზრებების მიღების შემდეგ წარმოიშვა საკითხი არბიტრის შეცვლის შესახებ ტრიბუნალის ერთ-ერთი არბიტრის გარდაცვალების, ან არბიტრის

უფლებამოსილების ამ მუხლის 18.1. პუნქტით გათვალისწინებული სხვა საფუძვლით შეწყვეტის გამო, DRC-ის სასამართლოს, თუ ის ჩათვლის მიზანშეწონილად, შეუძლია მიიღოს გადაწყვეტილება არბიტრის შეცვლის ნაცვლად დარჩენილმა არბიტრებმა გააგრძელონ საარბიტრაჟო განხილვა და მიიღონ გადაწყვეტილება. DRC-ის სასამართლომ საკითხის გადაწყვეტისას უნდა გაითვალისწინოს არბიტრების და საარბიტრაჟო განხილვის მხარეების მოსაზრებები და დავასთან დაკავშირებული სხვა გარემოებები.

## თავი IV. საარბიტრაჟო განხილვა

### მუხლი 19. ზოგადი ნაწილი

- 19.1. ტრიბუნალმა უნდა უზრუნველყოს საარბიტრაჟო დავის სწრაფი და ნაკლები დანახარჯებით განხილვა.
- 19.2. საარბიტრაჟო განხილვისას ტრიბუნალი პირველ რიგში ხელმძღვანელობს ამ წესებით, და საარბიტრაჟო შეთანხმებით, ხოლო იმ საკითხებთან დაკავშირებით, რომელიც არ არის ამ ფორმით მოწესრიგებული, იმ წესებით, რომელსაც დაადგენს ტრიბუნალი.
- 19.3. საარბიტრაჟო განხილვის ეფექტურად წარმართვის მიზნით, ტრიბუნალმა თავისი შეხედულებისამებრ შეიძლება დაადგინოს პროცედურული ზომები, რომლებიც უზრუნველყოფენ მხარეთათვის თანაბარი შესაძლებლობების მიცემას დაიცვან საკუთარი ინტერესები და წარმოდგინონ თავიანთი პოზიციები. პროცედურული ზომების დადგენამდე ტრიბუნალს შეუძლია გამართოს კონსულტაციები მხარეებთან.
- 19.4. საარბიტრაჟო განხილვის დაწყების დღედ ითვლება DRC-ის სამდივნოს მიერ სარჩელის მიღების (რეგისტრაციის) დღე.
- 19.5. საარბიტრაჟო განხილვის საწყის სტადიაზე და/ან მხარეებთან კონსულტაციის შემდეგ, ტრიბუნალს შეუძლია მოამზადოს საარბიტრაჟო განხილვის პროცედურული განრიგი.
- 19.6. მხარის მოთხოვნის საფუძველზე, ტრიბუნალს შეუძლია მიიღოს გადაწყვეტილება საარბიტრაჟო განხილვის ან საარბიტრაჟო განხილვასთან დაკავშირებული ნებისმიერი საკითხის კონფიდენციალურობასთან დაკავშირებით და მიიღოს ზომები კომერციული საიდუმლოების და ინფორმაციის დაცვის მიზნით.
- 19.7. მხარეს, რომელსაც სურს საარბიტრაჟო განხილვის პროცესში ინფორმაციის ან დოკუმენტების მიწოდება ტრიბუნალისა და საარბიტრაჟო განხილვის მხარეებისათვის, ეს ინფორმაცია და დოკუმენტები უნდა გადასცეს DRC-ის სამდივნოს, რომელიც თავის მხრივ უზრუნველყოფს ამ დოკუმენტებისა და ინფორმაციის საარბიტრაჟო განხილვის სხვა მხარეებისა და ტრიბუნალისათვის გადაცემას.
- 19.8. მხარე შესაძლებელია წარმოდგენილი იქნას ნებისმიერი პირით. წარმომადგენლის სახელი, ფაქტობრივი მისამართი, ტელეფონის ნომერი და ელექტრონული ფოსტის მისამართი მხარემ უნდა მიაწოდოს სამდივნოს, რომელიც ამ ინფორმაციას უგზავნის

საარბიტრაჟო განხილვის სხვა მხარეებს და არბიტრებს. DRC-ს სამდივნოს ან ტრიბუნალს შეუძლია ნებისმიერ დროს მოსთხოვოს მხარეს წარმომადგენლის უფლებამოსილების დადასტურება.

19.9. მხარეები ვალდებული არიან შეასრულონ ტრიბუნალის მიერ მიღებული გადაწყვეტილება.

## **მუხლი 20. საარბიტრაჟო განხილვის ადგილი**

20.1. საარბიტრაჟო განხილვის ადგილია თბილისი, თუ მხარეები საარბიტრაჟო განხილვის სხვა ადგილზე არ შეთანხმდებიან.

20.2. საარბიტრაჟო დავის ზეპირი მოსმენა, როგორც წესი, იმართება DRC-ის ადგილსამყოფელის მიხედვით. ამასთან, ტრიბუნალს, მხარეებთან კონსულტაციის შემდეგ, შეუძლია მხარეთა ზეპირი მოსმენა და სხვა შეხვედრები გამართოს სხვა ადგილას.

20.3. ტრიბუნალს შეუძლია მხარეებთან კონსულტაციები გამართოს ნებისმიერ ადგილას.

20.4. ნებისმიერ შემთხვევაში და ნებისმიერი მიზნებისათვის მიიჩნევა, რომ საარბიტრაჟო განხილვა მიმდინარეობს და საარბიტრაჟო გადაწყვეტილება მიიღება 20.1. პუნქტით განსაზღვრულ საარბიტრაჟო განხილვის ადგილზე.

## **მუხლი 21. საარბიტრაჟო განხილვის ენა**

21.1. მხარეებს შეუძლიათ განსაზღვრონ საარბიტრაჟო განხილვის ენა. ამგვარი შეთანხმების არ არსებობისას საარბიტრაჟო განხილვის ენას ადგენს ტრიბუნალი ყველა გარემოების, მათ შორის, ხელშეკრულების ენის გათვალისწინებით.

21.2. მხარეთა შეთანხმება ან ტრიბუნალის გადაწყვეტილება საარბიტრაჟო განხილვის ენასთან დაკავშირებით, თუ მხარეთა შეთანხმებით სხვა რამ არ არის გათვალისწინებული, ეხება აგრეთვე მხარეთა წერილობით განცხადებას, საარბიტრაჟო გადაწყვეტილებას, დადგენილებასა და საარბიტრაჟო წარმოებაში გამოყენებულ სხვა დოკუმენტს, ასევე ზეპირ მოსმენას, თუკი ასეთს ექნება ადგილი.

21.3. ტრიბუნალს შეუძლია დაადგინოს, რომ დოკუმენტს, რომელიც შესრულებულია საარბიტრაჟო განხილვის ენისაგან განსხვავებულ ენაზე, უნდა ახლდეს საარბიტრაჟო განხილვის ენაზე შესრულებული თარგმანი.

## **მუხლი 22. სამართლის ნორმათა გამოყენება**

22.1. მხარეებს შეუძლიათ თავისუფლად აირჩიონ სამართლის ნორმები, რომლის მიხედვითაც დავა უნდა გადაწყდეს არსებითად. ამგვარი შეთანხმების არარსებობის შემთხვევაში, ტრიბუნალი იყენებს სამართლის იმ ნორმებს, რომელსაც დავის არსიდან გამომდინარე ყველაზე მიზანშეწონილად მიიჩნევს.

- 22.2. ნებისმიერი მითითება რომელიმე ქვეყნის კანონმდებლობაზე ან სამართლებრივ სისტემაზე გულისხმობს ამ ქვეყნის მატერიალურ სამართალს და არა მის საპროცესო და კოლიზიურ ნორმებს.
- 22.3. გადაწყვეტილების დასაბუთებისას ტრიბუნალს შეუძლია ხელშეკრულების პირობების გარდა, გაითვალისწინოს ის სავაჭრო ჩვეულებები და ტრადიციები, რომლებიც ასეთი ხელშეკრულების მიმართ გამოიყენება.

### **უხლი 23. საარბიტრაჟო განხილვის საკითხთა შესახებ დადგენილება**

- 23.1. ტრიბუნალი, სამდივნოს მიერ საქმისა და თანდართული დოკუმენტების მისთვის გადაცემიდან არაუგვიანეს 25 (ოცდახუთი) დღის ვადაში ადგენს და მხარეებს გადასცემს საარბიტრაჟო განხილვის საკითხთა შესახებ დადგენილების პროექტს. დოკუმენტი უნდა შეიცავდეს:
- ა) საარბიტრაჟო განხილვის თითოეული მხარის და მისი წარმომადგენლის სახელს, მისამართს და სხვა საკონტაქტო მონაცემებს;
  - ბ) თითოეული არბიტრის სახელს და გვარს
  - გ) მხარეთა სამართლებრივი ინტერესების და მოთხოვნების აღწერას, აგრეთვე საარბიტრაჟო დავის ღირებულებას;
  - დ) საარბიტრაჟო განხილვის ენას, ადგილს და გამოსაყენებელ სამართალს;
  - ე) საარბიტრაჟო განხილვის შედეგად გადასაწყვეტ საკითხებს, თუ ამას მიზანშეწონილად ჩათვლის საარბიტრაჟო ტრიბუნალი;
  - ვ) პროცედურულ წესებს, რომლებმაც დებულებასთან ერთად უნდა დაარეგულირონ საარბიტრაჟო განხილვის ცალკეული პროცესუალური საკითხები.
- 23.2. მხარეებმა და ტრიბუნალმა სამდივნოს მიერ საქმისა და თანდართული დოკუმენტების გადაცემიდან არაუგვიანეს 35 (ოცდაათხუთმეტი) დღის ვადაში ხელი უნდა მოაწერონ საარბიტრაჟო განხილვის საკითხთა შესახებ დადგენილებას და გადასცენ ის DRC-ის სამდივნოს. DRC-ის **სამდივნოს** შეუძლია გაზარდოს ეს ვადა, ტრიბუნალის მოტივირებული განცხადების საფუძველზე, თუ ამას ჩათვლის საჭიროდ.
- 23.3. თუ რომელიმე მხარე უარს იტყვის საარბიტრაჟო განხილვის საკითხთა შესახებ დადგენილების შედგენაში მონაწილეობაზე ან მისი ხელმოწერით დადასტურებაზე, დადგენილება გადაეცემა DRC-ის სასამართლოს დასამტკიცებლად.
- 23.4. საარბიტრაჟო განხილვის საკითხთა შესახებ დადგენილებაზე მხარეთა ხელმოწერის ან DRC-ის სასამართლოს მიერ მისი დამტკიცების შემდეგ, საარბიტრაჟო განხილვა გაგრძელდება.
- 23.5. საარბიტრაჟო განხილვის საკითხთა შესახებ დადგენილების ხელმოწერის/დამტკიცების შემდეგ მხარეს ახალი მოთხოვნის (მოთხოვნების) დაყენების უფლება აქვს მხოლოდ ტრიბუნალის თანხმობით. ტრიბუნალი საკითხის გადაწყვეტისას ითვალისწინებს ახალი მოთხოვნ(ებ)ის არსს, საარბიტრაჟო განხილვის მიმდინარე ეტაპს და დავასთან დაკავშირებულ სხვა გარემოებებს.

23.6. საარბიტრაჟო განხილვის საკითხთა შესახებ დადგენილების შედგენა არ არის სავალდებულო დებულების 33-ე მუხლით განსაზღვრულ საქმეებზე.

#### **მუხლი 24. პროცედურული სხდომა და პროცედურული განრიგი**

- 24.1. საარბიტრაჟო განხილვის მართებულად და ეფექტურად წარმართვის მიზნით, საარბიტრაჟო ტრიბუნალი საქმისა და თანდართული დოკუმენტების მისთვის გადაცემიდან უმოკლეს ვადაში მხარეებისაგან იღებს წერილობით პოზიციებს პროცედურულ საკითხებთან და პროცედურულ განრიგთან დაკავშირებით ან/და მართავს სხდომას მხარეებთან პროცედურულ საკითხებზე კონსულტაციის მიზნით, რის შემდეგაც გამოაქვს დადგენილება პროცედურული ზომებისა და პროცედურული განრიგის შესახებ.
- 24.2. საარბიტრაჟო განხილვის ეფექტურობის უზრუნველყოფის მიზნით, ტრიბუნალს მხარეებთან კონსულტაციის შემდეგ, შეუძლია მიიღოს დამატებითი პროცედურული ზომები ან შეიტანოს ცვლილებები პროცედურულ განრიგში.
- 24.3. პროცედურული განრიგი და მასში შეტანილი ნებისმიერი ცვლილება ეცნობება DRC-ის სამდივნოს და მხარეებს.
- 24.4. პროცედურულ საკითხებზე სხდომის ჩატარება ან პროცედურული განრიგის შედგენა არ არის სავალდებულო დებულების 33-ე მუხლით განსაზღვრულ საქმეებზე.

#### **მუხლი 25. მოსარჩელისა და მოპასუხის პოზიციების გაცვლა**

- 25.1. თუ ტრიბუნალი ჩათვლის, რომ საარბიტრაჟო სარჩელში/შესაგებელში არ არის სრულყოფილად წარმოდგენილი ყველა ფაქტობრივი გარემოება, სამართლებრივი არგუმენტაცია, მტკიცებულებები ან მოთხოვნები, მას შეუძლია, საარბიტრაჟო საქმის პროცედურული განრიგით ან სხვაგვარად შესაბამის მხარეს განუსაზღვროს ვადა სრულყოფილი პოზიციის წარმოსადგენად.
- 25.2. იმ შემთხვევაში თუ ტრიბუნალი საქმის სწრაფად განხილვის მიზნით პროცედურულ განრიგში გაითვალისწინებს ერთი და იმავე ვადას ამ მუხლის 25.1. პუნქტში მითითებული პოზიციის/დოკუმენტების წარმოსადგენად, DRC-ის სამდივნო მხარეებისაგან მიღებულ წერილობით მოსაზრებებსა და დოკუმენტებს ერთდროულად გადასცემს ტრიბუნალს და საარბიტრაჟო განხილვის სხვა მხარეებს.
- 25.3. პროცედურული განრიგით შესაძლებელია, ასევე გათვალისწინებულ იქნას ვადები მოსარჩელის მოთხოვნაზე პასუხის და მიღებულ პასუხზე მოსარჩელის წერილობითი პოზიციის წარმოდგენისათვის.

25.4. ტრიბუნალს კონკრეტული საქმის სპეციფიკიდან გამომდინარე შეუძლია, ამ საქმის განხილვის მიმდინარეობისას მოსთხოვოს მხარეებს ცალკეულ საკითხებზე მოსაზრების წერილობით წარმოდგენა.

## **მუხლი 26. საქმის ფაქტობრივი გარემოებების დადგენა**

26.1. ტრიბუნალმა დავის გარემოებათა დადგენა უნდა დაიწყოს მაქსიმალურად მოკლე ვადაში.

26.2. ტრიბუნალს უფლება აქვს ზეპირი მოსმენის გარეშე მიიღოს საქმეზე საბოლოო გადაწყვეტილება მხარეთა მიერ წარმოდგენილ მტკიცებულებებზე დაყრდნობით. ამასთან, თუ რომელიმე მხარე საარბიტრაჟო განხილვის შესაბამის სტადიაზე შუამდგომლობს ზეპირ განხილვას, ტრიბუნალს შეუძლია დანიშნოს ზეპირი მოსმენა. ტრიბუნალს უფლება აქვს ზეპირ მოსმენაზე დაუსვას კითხვები მოწმე(ებ)ს, ექსპერტ(ებ)ს და სპეციალისტ(ებ)ს. ასევე, მხარეებს მისცეს კითხვების დასმის თანაბარი შესაძლებლობა.

26.3. ტრიბუნალი უფლებამოსილია წინასწარ, ზეპირ მოსმენამდე მოსთხოვოს მხარეებს ინფორმაცია იმ მოწმე(ებ)ის ან/და მხარეთა მიერ მოწვეული ექსპერტ(ებ)ის, სპეციალისტ(ებ)ის შესახებ, რომელთა წარდგენასაც ისინი გეგმავენ.

26.4. საარბიტრაჟო განხილვის ნებისმიერ ეტაპზე ტრიბუნალი უფლებამოსილია:

- ა) მხარეებთან კონსულტაციის შემდეგ დანიშნოს ერთი ან რამდენიმე ექსპერტი ტრიბუნალის მიერ განსაზღვრულ კონკრეტულ საკითხებზე დასკვნის წარმოსადგენად;
- ბ) გამოიძახოს ნებისმიერი მხარის მოწმე ჩვენების, ასევე ექსპერტი და სპეციალისტი ახსნა-განმარტების მისაცემად და უხელმძღვანელოს მათთვის შეკითხვების დასმის პროცესს;
- გ) საარბიტრაჟო განხილვის ნებისმიერ სტადიაზე მოსთხოვოს მხარეს წარადგინოს საქმესთან დაკავშირებული ნებისმიერი საბუთი ან ნივთმტკიცება.

26.5. ტრიბუნალს უფლება აქვს მოუსმინოს მოწმე(ებ)ს, სპეციალისტ(ებ)ს, მხარეთა მიერ მოწვეულ ექსპერტ(ებ)ს, ტრიბუნალის მიერ დანიშნულ ექსპერტ(ებ)ს ან ნებისმიერ სხვა პირს დებულების 28-ე მუხლის შესაბამისად.

26.6. მოწმეთა, ექსპერტთა და სპეციალისტთა დაკითხვა შესაძლებელია ტრიბუნალმა ჩაატაროს დისტანციურად (ტექნიკური საშუალების გამოყენებით).

## **მუხლი 27. მტკიცებულება**

27.1. თითოეული მხარე ვალდებულია დაამტკიცოს ის გარემოებები, რომელზეც ის აფუძნებს თავის საარბიტრაჟო მოთხოვნას ან მოთხოვნაზე შესაგებელს.



27.2. ტრიბუნალის უფლებამოსილებას განეკუთვნება ნებისმიერი მტკიცებულების დასაშვებობის შემოწმება და მტკიცებულებათა შეფასება.

## **მუხლი 28. ზეპირი მოსმენა**

- 28.1. ტრიბუნალი უფლებამოსილია საარბიტრაჟო განხილვის ნებისმიერ ეტაზე საკუთარი ინიციატივით ან ერთ–ერთი მხარის მოთხოვნის საფუძველზე, ჩაატაროს ზეპირი მოსმენა მხარეთა მონაწილეობით.
- 28.2. ზეპირი მოსმენის დროისა და ადგილის შესახებ მხარეებს ეცნობებათ გონივრულ ვადაში.
- 28.3. საარბიტრაჟო ტრიბუნალს შეუძლია ჩაატაროს ზეპირი მოსმენა და მიიღოს საარბიტრაჟო გადაწყვეტილება იმ მხარის მონაწილეობის გარეშე, რომელსაც სათანადო წესით ეცნობა ზეპირი მოსმენის თარიღისა და დროის შესახებ და არ გამოცხადდა საპატიო მიზეზის გარეშე.
- 28.4. ტრიბუნალის თავმჯდომარე ხელმძღვანელობს ზეპირი მოსმენის პროცესს, ის წარმართავს სხდომას და შეკითხვების დასმის პროცესს.
- 28.5. პირები, რომლებიც არ მონაწილეობენ საარბიტრაჟო განხილვაში, ტრიბუნალისა და ყველა მხარის თანხმობის გარეშე, არა აქვთ უფლება დაესწრონ ზეპირ მოსმენას. საარბიტრაჟო დავის განხილვასთან დაკავშირებული ინფორმაცია და ჩანაწერი კონფიდენციალურია, თუ მხარეები სხვა რამეზე არ შეთანხმდებიან.
- 28.6. მხარეებს უფლება აქვთ ზეპირ მოსმენაში მონაწილეობა მიიღონ პირადად ან წარმომადგენლის მეშვეობით.
- 28.7. საარბიტრაჟო სხდომას შესაძლოა დაესწროს სამდივნოს წარმომადგენელი, რომელიც დახმარებას უწევს ტრიბუნალს საორგანიზაციო და ტექნიკური ხასიათის საკითხების გადაწყვეტაში, ასევე შესაძლებელია განხორციელდეს ზეპირი მოსმენის ჩაწერა.

## **მუხლი 29. არბიტრაჟის მიერ დანიშნული ექსპერტი**

- 29.1. მხარეებთან კონსულტაციის შემდეგ ტრიბუნალს შეუძლია დანიშნოს ერთი ან რამდენიმე დამოუკიდებელი ექსპერტი კონკრეტულ საკითხ(ებ)ზე წერილობითი დასკვნის მისაღებად. ექსპერტის დანიშვნის შესახებ ტრიბუნალის გადაწყვეტილების ასლი გადაეცემათ მხარეებს.
- 29.2. დანიშვნის საკითხის გადაწყვეტამდე, ექსპერტმა როგორც წესი, არბიტრაჟს და მხარეებს უნდა წარუდგინოს ინფორმაცია მისი კვალიფიკაციის, დამოუკიდებლობისა და მიუკერძოებლობის შესახებ. ტრიბუნალის მიერ განსაზღვრულ ვადაში მხარეებმა არბიტრაჟს უნდა შეატყობინონ, აყენებენ თუ არა ექსპერტის აცილების საკითხს მისი კვალიფიკაციის, მიუკერძოებლობის ან დამოუკიდებლობის მიმართ დასაბუთებული პრეტენზიის გამო. ტრიბუნალი განიხილავს მხარეთა განცხადებებს და იღებს გადაწყვეტილებას ექსპერტის აცილებასთან დაკავშირებით. ექსპერტის დანიშვნის

შემდეგ, მისი აცილების საკითხის დაყენება დასაშვებია მხოლოდ იმ შემთხვევაში, თუ აცილების საფუძველი მხარისათვის ცნობილი გახდა პირის ექსპერტად დანიშვნის შემდეგ.

- 29.3. მხარე ვალდებულია ექსპერტის მოთხოვნის საფუძველზე მიაწოდოს მას დავასთან დაკავშირებული ნებისმიერი ინფორმაცია, ნებისმიერი დოკუმენტი ან/და ნივთი გაცნობის მიზნით. ნებისმიერი უთანხმოება ექსპერტსა და მხარეს შორის, ან მხარეთა შორის ექსპერტისათვის ინფორმაციის, დოკუმენტების ან ნივთის გადაცემასთან დაკავშირებით გადაწყდება ტრიბუნალის მიერ.
- 29.4. ექსპერტის დასკვნის მიღების შემდეგ, დასკვნის ასლი მიეწოდებათ მხარეებს, რათა მათ მიეცეთ საშუალება წერილობითი ფორმით გამოხატონ თავიანთი მოსაზრებები ექსპერტის დასკვნასთან დაკავშირებით. მხარეს უფლება აქვს გაეცნოს იმ დოკუმენტ(ებ)ს, რომელზეც მითითებულია დასკვნაში.
- 29.5. მხარის მოთხოვნის საფუძველზე შესაძლებელია ექსპერტის მოწვევა ზეპირი მოსმენის სხდომაზე, რათა მხარეებს მიეცეთ ექსპერტისათვის კითხვების დასმის საშუალება. მხარე(ებ)ს უფლება აქვს(თ) წარადგინოს(ნ) სპეციალისტი სადაო საკითხზე განმარტების მისაცემად. ამ პროცედურის მიმართ გამოიყენება დებულების 28-ე მუხლი.

### **მუხლი 30. დოკუმენტის წარუდგენლობა**

- 30.1. თუ წესებით გათვალისწინებულ ვადაში, საპატიო მიზეზ(ებ)ის გარეშე, მოპასუხე არ წარმოადგენს შესაგებელს საარბიტრაჟო სარჩელზე, ტრიბუნალი განაგრძობს საარბიტრაჟო განხილვას და სარჩელზე შესაგებლის წარუდგენლობა არ განიხილება მოსარჩელის მოთხოვნების აღიარებად. იგივე წესი გამოიყენება, თუ მოსარჩელე არ წარადგენს შესაგებელს მოპასუხის შემხვედრ საარბიტრაჟო სარჩელზე.
- 30.2. თუ მხარე, წესებით გათვალისწინებულ ან ტრიბუნალის მიერ განსაზღვრულ ვადაში არ წარადგენს წერილობით ან სხვა სახის მტკიცებულებებს, ტრიბუნალი მიიღებს გადაწყვეტილებას მის ხელთ არსებული მტკიცებულებების საფუძველზე.

### **მუხლი 31. საარბიტრაჟო განხილვის დასრულება**

- 31.1. ზეპირი მოსმენის ბოლო სხდომის შემდეგ ან ტრიბუნალის მიერ განსაზღვრულ ვადაში მხარეთა წერილობითი პოზიციის მიღების შემდეგ, საარბიტრაჟო ტრიბუნალმა დროის გაჭიანურების გარეშე უნდა გამოაცხადოს:
- ა) საარბიტრაჟო განხილვის დასრულების შესახებ;
  - ბ) აცნობოს სამდივნოსა და მხარეებს სავარაუდო თარიღი, როცა დებულების 39-ე მუხლის შესაბამისად საარბიტრაჟო გადაწყვეტილების პროექტს გადასცემს DRC-ის სასამართლოს ფორმალური შემოწმებისათვის.

31.2. ამ მუხლის 31.1., „ა“ პუნქტი არ გამოიყენება დებულების 33-ე მუხლით გათვალისწინებულ საქმეებზე.

31.3. განსაკუთრებული გარემოებებიდან გამომდინარე, ტრიბუნალს შეუძლია თავისი ინიციატივით ან მხარის შუამდგომლობის საფუძველზე განაახლოს საარბიტრაჟო განხილვა ნებისმიერ დროს საბოლოო საარბიტრაჟო გადაწყვეტილებაზე ხელმოწერამდე.

## **მუხლი 32. უზრუნველყოფის ღონისძიებები**

32.1. საარბიტრაჟო განხილვის დაწყებამდე ან განხილვის ნებისმიერ სტადიაზე, საბოლოო საარბიტრაჟო გადაწყვეტილების გამოტანამდე, მხარეს შეუძლია შუამდგომლობით მიმართოს DRC-ს სამდივნოს საარბიტრაჟო სარჩელის უზრუნველყოფის ღონისძიებ(ებ)ის გამოყენების შესახებ, თუ ეს არ ეწინააღმდეგება საარბიტრაჟო შეთანხმებას.

32.2. მხარის მიმართვის საფუძველზე, ტრიბუნალს, ხოლო მის ფორმირებამდე DRC-ის სასამართლოს თავმჯდომარეს, რომელიც ამ შემთხვევაში მოქმედებს როგორც საგანგებო არბიტრი, მაქსიმალურად მოკლე ვადაში შეუძლია წერილობითი გადაწყვეტილებით დაავალოს მხარეს:

ა) საბოლოო საარბიტრაჟო გადაწყვეტილების გამოტანამდე პირვანდელი მდგომარეობის შენარჩუნება;

ბ) ისეთი ზომების მიღება, რომლებიც უკავშირდება მეორე მხარისთვის ზიანის მიყენების თავიდან აცილებას;

გ) ღონისძიებების განხორციელება იმ აქტივების შესანარჩუნებლად, რომლებიდანაც შესაძლებელია აღსრულდეს შემდგომში საარბიტრაჟო გადაწყვეტილება;

32.3. მხარე, რომელიც შუამდგომლობით მიმართავს DRC-ს (ან ტრიბუნალს) ამ მუხლის 32.2. პუნქტის „ა.“-„გ.“ ქვეპუნქტებით გათვალისწინებული უზრუნველყოფის ღონისძიებ(ებ)ის გამოყენების შესახებ, უნდა დაასაბუთოს შემდეგი გარემოებების არსებობა:

ა) საარბიტრაჟო სარჩელის უზრუნველყოფის ღონისძიებების გამოუყენებლობამ შეიძლება გამოიწვიოს ისეთი ზიანი, რომლის თავიდან აცილება შეუძლებელი იქნება მეორე მხარისთვის ზიანის ანაზღაურების დაკისრებით;

ბ) საარბიტრაჟო სარჩელის უზრუნველყოფის ღონისძიებების გამოუყენებლობით გამოწვეული ზიანი მნიშვნელოვნად აღემატება იმ ზიანს, რომელიც შესაძლოა მიადგეს იმ მხარეს, რომლის წინააღმდეგაც მიმართულია საარბიტრაჟო სარჩელის უზრუნველყოფის ღონისძიებები, ამ ღონისძიებების გამოყენების შემთხვევაში;

გ) არსებობს საფუძველიანი ვარაუდი იმის შესახებ, რომ სასარჩელო მოთხოვნა დაკმაყოფილდება. აღნიშნული ვარაუდი გავლენას არ ახდენს ტრიბუნალის მიერ შემდგომი გადაწყვეტილების გამოტანაზე.

- 32.4. არბიტრაჟი უფლებამოსილია, მოთხოვოს მხარეს, რომელიც შუამდგომლობს საარბიტრაჟო სარჩელის უზრუნველყოფის ღონისძიებების გამოყენებაზე, აღნიშნული უზრუნველყოფის ღონისძიების გამოყენების შედეგად მეორე მხარისათვის მოსალოდნელი ზარალის ანაზღაურების უზრუნველყოფა.
- 32.5. მხარეს, რომელიც შუამდგომლობს საარბიტრაჟო სარჩელის უზრუნველყოფის ღონისძიებების გამოყენებაზე, ეკისრება პასუხისმგებლობა ნებისმიერი ხარჯისა და ზიანისათვის, რომლებიც გამოწვეულია ამ მხარის მიერ მოთხოვნილი საარბიტრაჟო სარჩელის უზრუნველყოფის ღონისძიებების გამოყენებით, თუ არბიტრაჟი დაადგენს, რომ აღნიშნულ გარემოებებში საარბიტრაჟო სარჩელის უზრუნველყოფის მოცემული ღონისძიებები არ უნდა ყოფილიყო გამოყენებული. არბიტრაჟი უფლებამოსილია მხარეს ხარჯებისა და ზიანის ანაზღაურება საარბიტრაჟო განხილვის ნებისმიერ სტადიაზე დააკისროს.
- 32.6. არბიტრის მიერ საარბიტრაჟო სარჩელის უზრუნველყოფის ღონისძიებების გამოყენების შესახებ მიღებულ გადაწყვეტილებას საარბიტრაჟო განხილვის მხარისათვის აქვს სავალდებულო ძალა გადაწყვეტილების მისთვის გადაცემის დღიდან.
- 32.7. ტრიბუნალი უფლებამოსილია შეცვალოს, შეაჩეროს ან გააუქმოს მის მიერ ან საგანგებო არბიტრის მიერ გამოყენებული საარბიტრაჟო სარჩელის უზრუნველყოფის ღონისძიება.
- 32.8. იმ შემთხვევაში, თუ მოსარჩელე დადგენილ ვადაში არ წარადგენს საარბიტრაჟო სარჩელს ან უარს იტყვის ამ მუხლის შესაბამისად უზრუნველყოფილ საარბიტრაჟო მოთხოვნაზე, ტრიბუნალი მიიღებს გადაწყვეტილებას გამოყენებული უზრუნველყოფის ღონისძიებ(ებ)ის გაუქმების შესახებ მეორე მხარის მოთხოვნის საფუძველზე ან საკუთარი ინიციატივით.

### **მუხლი 33. დაჩქარებული წესით განხილვის პროცესი**

- 33.1. არბიტრაჟი დავას იხილავს დაჩქარებული წესით თუ:
- ა) სარჩელითა და შემხვედრი სარჩელით გათვალისწინებულ მოთხოვნათა ჯამი არ აღემატება 100,000 (ასი ათასი) ლარს;
  - ბ) საარბიტრაჟო დავა წარმოშობილია საბაკო გარანტიის, საკრედიტო, ან/და მასთან დაკავშირებული სამართლებრივი ურთიერთობიდან (გირაო, იპოთეკა, თავდებობა, მოვალის გარანტია და სხვ.) მიუხედავად სასარჩელო მოთხოვნის ოდენობისა.
  - გ) მხარეები საარბიტრაჟო ტრიბუნალის ფორმირების შემდეგ შეთანხმდებიან საარბიტრაჟო განხილვა წარიმართოს ამ მუხლით გათვალისწინებული წესით და მიიღებენ საარბიტრაჟო ტრიბუნალის თანხმობას.
  - დ) სადაზღვევო პოლისის პრემიის გადახდასთან და მისი უზრუნველყოფის საშუალებებთან დაკავშირებული დავები, მიუხედავად სასარჩელო მოთხოვნის ოდენობისა.
- 33.2. იმ შემთხვევაში, თუ 33.1. პუნქტის „ა.“ ქვეპუნქტით გათვალისწინებულ შემთხვევაში სარჩელითა და შემხვედრი სარჩელით გათვალისწინებული მოთხოვნების ჯამი

აღემატება 100 000 (ასი ათასი) ლარს, საარბიტრაჟო დავის განხილვისას ეს მუხლი არ გამოიყენება.

33.3. საარბიტრაჟო განხილვა წარიმართება ამ წესებისა და ქვემოთ მოცემული სპეციალური წესების შესაბამისად, რომელთა შორის წინააღმდეგობის შემთხვევაში გამოიყენება ამ მუხლში მოცემული წესები.

33.4. ამ მუხლის მიზანია უზრუნველყოს დავის განხილვა მარტივად, ნაკლები ხარჯით და მოკლე დროში, დავის განხილვის ქვემოთ მოცემული გამარტივებული პროცედურებით:

ა) საარბიტრაჟო სარჩელის მიღებიდან 10 დღის ვადაში DRC-ის სასამართლოს თავმჯდომარე ნიშნავს არბიტრს DRC-ის მიერ დამტკიცებულ არბიტრთა სიიდან. სასამართლოს თავმჯდომარის არყოფნისას ან ინტერესთა კონფლიქტის შემთხვევაში, DRC-ის სამდივნოს ხელმძღვანელი (გენერალური მდივანი) დანიშნავს არბიტრს DRC-ის არბიტრთა სიიდან.

ბ) იმ შემთხვევაში თუ მხარეთა საარბიტრაჟო შეთანხმება ითვალისწინებს საარბიტრაჟო ტრიბუნალის ფორმირებას 3 არბიტრით, თითოეულმა მხარემ არბიტრობის ერთი კანდიდატი უნდა წარადგინოს სარჩელის რეგისტრაციის შესახებ შეტყობინების მიღებიდან 10 დღის ვადაში. კანდიდატის არბიტრად დამტკიცებაზე გადაწყვეტილებას იღებს DRC-ის სასამართლოს თავმჯდომარე ან სამდივნოს ხელმძღვანელი, რომელიც ასევე ნიშნავს მესამე არბიტრს - საარბიტრაჟო ტრიბუნალის თავმჯდომარეს. იმ შემთხვევაში თუ არც ერთი მხარე არ წარადგენს არბიტრობის კანდიდატს ჩაითვლება, რომ მხარეებმა მიიღეს ახალი გადაწყვეტილება საარბიტრაჟო დავა განიხილოს ერთმა არბიტრმა, რომელიც დაინიშნება ამ პუნქტის „ა.“ ქვეპუნქტის შესაბამისად.

გ) ტრიბუნალს უფლება აქვს გადაწყვიტოს პროცედურული საკითხები, მათ შორის შეუძლია განსაზღვროს პროცედურული ზომები და პროცედურული განრიგი. ასევე, შეუძლია ცალკეული პროცედურული საკითხისათვის გაითვალისწინოს ამ დებულებით გათვალისწინებულზე უფრო მცირე ვადები.

დ) მხარეებმა საარბიტრაჟო სარჩელი და შესაგებელი უნდა შეადგინონ დებულების მე-7 და მე-8 მუხლების შესაბამისად, სრულყოფილად უნდა ასახონ ფაქტობრივი გარემოებები, სამართლებრივი არგუმენტები და მოთხოვნები.

ე) საარბიტრაჟო სარჩელის მიღებიდან 10 დღის ვადაში მოპასუხემ უნდა წარუდგინოს DRC-ის სამდივნოს საარბიტრაჟო სარჩელზე შესაგებელი. ამასთან, მოსარჩელემ შემხვედრი საარბიტრაჟო მოთხოვნის მიღებიდან 10 დღის ვადაში უნდა წარუდგინოს DRC-ის სამდივნოს შესაგებელი შემხვედრ საარბიტრაჟო სარჩელზე.

ვ) მხარეებმა წერილობითი მტკიცებულებები, ასევე წესებით გათვალისწინებული საარბიტრაჟო ხარჯის გაწევის დამადასტურებელი დოკუმენტი უნდა წარადგინონ სარჩელთან და შემხვედრ სარჩელთან ერთად.

ზ) საარბიტრაჟო განხილვის დროს ყველა შეტყობინების/გზავნილის მიწოდება ხორციელდება ელექტრონული ფორმით დებულების მე-5 მუხლის 5.3. პუნქტის შესაბამისად. ელექტრონული ფორმით შეტყობინების/გზავნილის მიწოდების

შეუძლებლობის შემთხვევაში, შეტყობინების/გზავნილის მიწოდება განხორციელდება დებულების მე-5 მუხლის შესაბამისად.

თ) თუ მხარეები შეთანხმებული არ არიან დავის განხილვის ფორმაზე და სასარჩელო მოთხოვნების ღირებულება არ აღემატება 100,000 ლარს, ტრიბუნალს შეუძლია გადაწყვეტილება მიიღოს მხარეთა ზეპირი მოსმენის გარეშე, წარდგენილი წერილობითი დოკუმენტების საფუძველზე.

ი) ტრიბუნალს შეუძლია ცალკეულ საკითხებთან დაკავშირებით მხარეებს მოსთხოვოს წერილობითი პოზიციის წარდგენა ან მოიწვიოს სხდომა მხარეთა პოზიციების მისაღებად.

კ) მხარეებს აქვთ შესაძლებლობა სარჩელი და მასზე შესაგებელი, ასევე წერილობითი მტკიცებულებები წარუდგინონ DRC-ის სამდივნოს ელექტრონული ფორმით, DRC-ის ელექტრონული საქმის წარმოების პროგრამის მეშვეობით.

ლ) ტრიბუნალმა უნდა გადაწყვიტოს საარბიტრაჟო დავის მხარისათვის ხარჯების ანაზღაურების საკითხი.

მ) ტრიბუნალმა საარბიტრაჟო გადაწყვეტილებაში მოკლედ უნდა მიუთითოს იმ გარემოებებსა და სამართლებრივ საფუძველებზე, რომლებსაც დაეყრდნო გადაწყვეტილების მიღებისას. გარდა იმ შემთხვევისა, **თუ მხარეები არიან შეთანხმებული, რომ საფუძველების მითითება (სამოტივაციო ნაწილი) არ არის აუცილებელი.**

ნ) ტრიბუნალმა საარბიტრაჟო განხილვა უნდა დაასრულოს მისთვის საქმის გადაცემიდან 90 დღის ვადაში. გამონაკლის შემთხვევებში, ტრიბუნალს შეუძლია გააგრძელოს ეს ვადა.

ო) ტრიბუნალმა საარბიტრაჟო განხილვის დასრულების თარიღის შესახებ უნდა აცნობოს DRC-ის სამდივნოს და შემდგომი ათი დღის ვადაში მიაწოდოს საარბიტრაჟო გადაწყვეტილების პროექტი ფორმალური შემოწმებისათვის. ფორმალური შემოწმების დასრულების შემდეგ ტრიბუნალმა საარბიტრაჟო გადაწყვეტილებას უნდა მოაწეროს ხელი, მიუთითოს გადაწყვეტილების მიღების ადგილი და თარიღი.

#### თავი IV<sup>1</sup>. ონლაინ არბიტრაჟი

##### მუხლი 33<sup>1</sup>. ზოგადი დებულებები

33<sup>1</sup>.1. ამ მუხლით განსაზღვრული წესით არბიტრაჟი დავას იხილავს იმ შემთხვევაში, თუ მხარეები შეთანხმებული არიან დავის ონლაინ განხილვაზე;

33<sup>1</sup>.2. DRC-ის სამდივნო საარბიტრაჟო განხილვის ადმინისტრირებას ახორციელებს ამ თავში მოცემული იმ ნორმების შესაბამისად, რომელიც მოქმედებს საარბიტრაჟო განხილვის დაწყების დროისათვის.

33<sup>1</sup>.3. ამ თავში მოცემულ ნორმებსა და წესების სხვა ნორმებს შორის წინააღმდეგობისას, საარბიტრაჟო განხილვის ონლაინ წარმოების ადმინისტრირების მიზნებისათვის, გამოიყენება ამ თავში მოცემული წესები.

### **მუხლი 33<sup>2</sup>. „საქმის წარმოების სისტემა“**

33<sup>2</sup>.1. „საქმის წარმოების სისტემა“, ამ თავის შესაბამისად, დავათა გადაწყვეტის მიზნით დოკუმენტების ელექტრონული წარდგენის, განხილვის პროცესში შექმნილი დოკუმენტების, შენახვისა და გადაცემის დაცული საინფორმაციო სისტემაა.

33<sup>2</sup>.2. „საქმის წარმოების სისტემის“ გამოყენებისათვის მხარეებმა, არბიტრებმა და განხილვაში ჩართულმა პირებმა უნდა გამოიყენონ „ინტერნეტის“ გლობალური ქსელი, ამ თავის მოთხოვნათა შესაბამისად.

33<sup>2</sup>.3. „საქმის წარმოების სისტემაში“ DRC-ის წარმოადგენს სამდივნოს ხელმძღვანელი ან მის მიერ დანიშნული უფლებამოსილი პირი.

33<sup>2</sup>.4. „საქმის წარმოების სისტემაში“ ჩართვის მიზნით თითოეულმა მხარემ DRC-ის ვებგვერდზე უნდა გაიაროს რეგისტრაცია მარტივი ელექტრონული ხელმოწერის გასაღებით (მომხმარებლის სახელი და პაროლი). მხარეს, შესაძლებელია, ჰყავდეს რამდენიმე წარმომადგენელი და თითოეულს სისტემაში შესასვლელად ჰქონდეს საკუთარი მომხმარებლის სახელი და პაროლი. რეგისტრაციის დასრულების შემდეგ, შესაძლებელია, საარბიტრაჟო განხილვის დაწყების ინიციატორმა მხარემ „საქმის წარმოების სისტემაში“ წარადგინოს განაცხადი (სარჩელი) საარბიტრაჟო განხილვის დაწყების მოთხოვნით. ამ შემთხვევაში საარბიტრაჟო განხილვაში ჩართულ პირებს მიეწოდებათ პერსონალური ათ (10) ნიშნა კოდი, რომლის მეშვეობითაც შესაძლებელია დოკუმენტების წარდგენა, გაცნობა, მიღება.

33<sup>2</sup>.5. თითოეული პირი, რომელიც „საქმის წარმოების სისტემაში“ მოქმედებს საარბიტრაჟო განხილვის მხარის სახელით, მომხმარებლის სახელისა და პაროლის გამოყენებით, განიხილება თავდაპირველად რეგისტრირებულ პირად, ხოლო შესაბამისი მომხმარებლის სახელის, პაროლის მიმღები თითოეული პირი იდენტიფიცირდება როგორც საარბიტრაჟო განხილვის შესაბამისი მხარე. „საქმის წარმოების სისტემაში“ ამ პირის ნებისმიერი ქმედება განიხილება საარბიტრაჟო განხილვის შესაბამისი მხარის ქმედებად.

33<sup>2</sup>.6. „საქმის წარმოების სისტემაში“ შესაბამისი საქმე არბიტრად დანიშნული პირისთვის ხელმისაწვდომი გახდება მის ელექტრონულ ფოსტაზე სათანადო შეტყობინებისა და საქმის 10- ნიშნა კოდის მიწოდების შემთხვევაში.

33<sup>2</sup>.7. „საქმის წარმოების სისტემაში“ დოკუმენტების წარდგენა შესაძლებელია საარბიტრაჟო განხილვის მხარის ან მისი წარმომადგენლის მიერ მხოლოდ ელექტრონული იდენტიფიცირების შემდეგ. DRC-ის სამდივნო ამოწმებს ონლაინ წარდგენილი დოკუმენტაციის შესაბამისობას, ხსნის და ტვირთავს „საქმის წარმოების სისტემაში“, ანიჭებს პერსონალურ ათნიშნა კოდს, რის შესახებაც აცნობებს მხარეებს.

33<sup>2</sup>.8. ონლაინ საარბიტრაჟო განხილვის მხარეები და მათი წარმომადგენლები პასუხისმგებელი არიან, კონფიდენციალურად დაიცვან „საქმის წარმოების სისტემაში“

რეგისტრირებული ელექტრონული ფოსტა და „საქმის წარმოების სისტემაში“ შესვლისათვის საჭირო მომხმარებლის სახელი და პაროლი, ამასთან, თავად არიან უფლებამოსილი ნებისმიერ დროს შეცვალონ მომხმარებლის სახელი და პაროლი. იმ შემთხვევაში, თუ სისტემაში შესასვლელი მომხმარებლის სახელი და პაროლი და სისტემაში რეგისტრირებული ელექტრონული ფოსტა ცნობილი გახდა არაუფლებამოსილი პირისათვის, შესაბამისმა მხარემ დაუყოვნებლივ უნდა აცნობოს ამის შესახებ DRC-ის სამდივნოს. ასეთ შემთხვევაში ონლაინ საარბიტრაჟო განხილვის ნებისმიერი მხარე თავადაა პასუხისმგებელი ყველა იმ ნეგატიურ შედეგზე, რომელიც შეიძლება მოჰყვეს არაუფლებამოსილი პირის მიერ სისტემაში დაფიქსირებული ელექტრონული ფოსტისა და სისტემაში შესასვლელი მომხმარებლის სახელისა და პაროლის გამოყენებას.

33<sup>2</sup>.9. იმ შემთხვევაში, თუ შეწყდება ონლაინ საარბიტრაჟო განხილვაში ჩართული პირის „საქმის წარმოების სისტემაში“ რეგისტრირებული წარმომადგენლის უფლებამოსილება, რეგისტრირებული პირი ვალდებულია, დაუყოვნებლივ აცნობოს ამის შესახებ DRC-ის სამდივნოს და დანიშნოს ახალი წარმომადგენელი, რომლის რეკვიზიტები, მათ შორის ელექტრონული ფოსტის მისამართი, მიაწოდოს DRC-ის სამდივნოს. ამ შემთხვევაში DRC-ის სამდივნო საქმის 10- ნიშნა კოდს ელექტრონული ფოსტით გაუგზავნის ახლადდანიშნულ წარმომადგენელს, რათა ამ უკანასკნელს ხელი მიუწვდებოდეს „საქმის წარმოების სისტემაში“ არსებულ შესაბამის დოკუმენტებსა და ინფორმაციაზე.

33<sup>2</sup>.10. ონლაინ საარბიტრაჟო განხილვის თითოეულმა მხარემ სისტემატურად უნდა შეამოწმოს, თუ რამდენად გამართულად მუშაობს ელექტრონული ფოსტა, ასევე დაიცვას „საქმის წარმოების სისტემაში“ შესასვლელი პაროლის, მომხმარებლის სახელისა და საქმისათვის მინიჭებული 10- ნიშნა კოდის კონფიდენციალურობა.

33<sup>2</sup>.11. ელექტრონული ფოსტის მისამართის შეცვლის შემთხვევაში, მხარე ვალდებულია, ამის შესახებ დაუყოვნებლივ აცნობოს მეორე მხარეს და მიაწოდოს ელექტრონული ფოსტის ახალი მისამართი, ხოლო ონლაინ საარბიტრაჟო განხილვის დაწყების შემდეგ, ასევე, აცნობოს DRC-ის სამდივნოს. წინააღმდეგ შემთხვევაში, თავად მხარე იღებს პასუხისმგებლობას ყველა უარყოფით შედეგზე, რომელიც გზავნილების ადრე მითითებულ ელექტრონულ ფოსტის მისამართზე მიწოდებას მოჰყვება.

33<sup>2</sup>.12. ამ მუხლის 33<sup>2</sup>.11. პუნქტის შესაბამისად, ელექტრონული ფოსტის ახალი მისამართის შესახებ ინფორმაციის მიღებამდე, „საქმის წარმოების სისტემაში“ ადრე მითითებულ ელექტრონულ ფოსტაზე გაგზავნილი შეტყობინებები ონლაინ საარბიტრაჟო განხილვის ნებისმიერი მიზნებისათვის განიხილება მხარისათვის გზავნილის შესაბამისი ფორმით მიწოდებად. თუ მოპასუხე ფიზიკური პირია, DRC-ის სამდივნო ეცდება დავის დაწყების შესახებ ინფორმაცია მიაწოდოს მოპასუხეს ხელშეკრულებაში მითითებულ ტელეფონის ნომერზე.

**მუხლი 33<sup>3</sup>. ვადები**



33<sup>3</sup>.1. ონლაინ საარბიტრაჟო განხილვის დაწყების თარიღად მიიჩნევა „საქმის წარმოების სისტემაში“ DRC-ის სამდივნოს მიერ ონლაინ საარბიტრაჟო სარჩელზე სარეგისტრაციო კოდის მინიჭების თარიღი.

33<sup>3</sup>.2. საარბიტრაჟო შეთანხმებაში მითითებული ელექტრონული ფოსტის მისამართზე გზავნილისა და სხვა დოკუმენტების მიწოდება განიხილება ონლაინ საარბიტრაჟო განხილვის მიზნებისათვის სათანადო მიწოდებად და მიიჩნევა ადრესატის მიერ მიღებულად ელექტრონული ფოსტით გაგზავნის დღეს.

33<sup>3</sup>.3. ვადების ათვლა იწყება გზავნილის ან სხვა დოკუმენტების ელექტრონული ფოსტით გაგზავნის მომდევნო დღიდან.

33<sup>3</sup>.4. ტრიბუნალს, სათანადო საფუძვლის არსებობისას, შეუძლია გააგრძელოს ამ თავით გათვალისწინებული ნებისმიერი ვადა.

#### **მუხლი 33<sup>4</sup>. არბიტრის დანიშვნა**

33<sup>4</sup>.1. ონლაინ საარბიტრაჟო საქმეს განიხილავს ერთი არბიტრისაგან შემდგარი ტრიბუნალი. „საქმის წარმოების სისტემაში“ სარჩელის რეგისტრაციიდან 3 სამუშაო დღის ვადაში DRC-ის სასამართლოს თავმჯდომარე ნიშნავს არბიტრს DRC-ის მიერ დამტკიცებულ არბიტრთა სიიდან. სასამართლოს თავმჯდომარის არყოფნისას ან ინტერესთა კონფლიქტის შემთხვევაში, DRC-ის სამდივნოს ხელმძღვანელი (გენერალური მდივანი) დანიშნავს არბიტრს DRC-ის არბიტრთა სიიდან.

33<sup>4</sup>.2. არბიტრი, როგორც წესი, ინიშნება DRC-ის არბიტრთა სიიდან, თუმცა, შესაძლებელია, დანიშნოს სხვა პირიც, რომელიც თანხმდება დავის დამოუკიდებლად, მიუკერძოებლად, DRC-ის საქმის წარმოების წესების, არბიტრთა ეთიკის კოდექსისა და ამ თავით დადგენილი წესების შესაბამისად განხილვაზე.

33<sup>4</sup>.3. არბიტრის დანიშვნისას გაითვალისწინება:

- ა) საარბიტრაჟო შეთანხმებით არბიტრის მიმართ გათვალისწინებული მოთხოვნები;
- ბ) საარბიტრაჟო განხილვის ენა;
- გ) გამოსაყენებელი სამართალი;
- დ) დავის არსი;
- ე) დავის გადაწყვეტისათვის მნიშვნელოვანი სხვა ფაქტორები;
- ვ) არბიტრობის კანდიდატის კვალიფიკაცია;

33<sup>4</sup>.4. ტრიბუნალი ვალდებულია, დაიცვას ამ თავით და წესებით გათვალისწინებული მოთხოვნები და არბიტრთა ასოციაციის მიერ დამტკიცებული „არბიტრთა ეთიკის კოდექსის“ პრინციპები.

33<sup>4</sup>.5. არბიტრის აცილების ან არბიტრის გადადგომის შემთხვევაში, არბიტრი ინიშნება 33<sup>4</sup>.1 და 33<sup>4</sup>.2 უნქტით განსაზღვრული წესით.

### **მუხლი 33<sup>5</sup>. საარბიტრაჟო განხილვის დაწყება**

33<sup>5</sup>.1. ონლაინ საარბიტრაჟო განხილვის ინიციატორი მხარე „საქმის წარმოების სისტემაში“ წარადგენს სარჩელსა და თანდართულ დოკუმენტებს PDF ფაილების სახით.

33<sup>5</sup>.2. საარბიტრაჟო სარჩელში უნდა აღინიშნოს:

ა) მოსარჩელის, სხვა მხარეებისა და მათი წარმომადგენლების (ასეთის არსებობის შემთხვევაში) სრული სახელები და საკონტაქტო ინფორმაცია (მათ შორის - მისამართი, ტელეფონის ნომერი, ელექტრონული ფოსტის მისამართი).

ბ) დავის არსი და ის ფაქტობრივი გარემოებები, რომელთაგან გამომდინარეობს მოთხოვნა;

გ) მტკიცებულებები, რომლებიც ადასტურებს მოსარჩელის მიერ მითითებულ ფაქტობრივ გარემოებებს;

დ) საარბიტრაჟო მოსარჩელის მოთხოვნ(ებ)ა. თუ მოთხოვნ(ებ)ის კონკრეტული თანხით გამოხატვა შეუძლებელია, ამ მოთხოვნ(ებ)ის მიახლოებითი ფულადი ღირებულება;

ე) რამდენიმე საარბიტრაჟო მოთხოვნის შემთხვევაში, მითითება, თუ რომელი საარბიტრაჟო შეთანხმებიდან გამომდინარეობს თითოეული მოთხოვნა;

ვ) დოკუმენტების ნუსხა, რომელიც ერთვის საარბიტრაჟო სარჩელს.

ზ) საარბიტრაჟო სარჩელთან ერთად მოსარჩელეს შეუძლია წარადგინოს სხვა ინფორმაცია და დოკუმენტები, რომელთაც თავად მიიჩნევს საჭიროდ ან რომელთაც შეუძლია ხელი შეუწყოს დავის ეფექტურად გადაწყვეტას.

33<sup>5</sup>.3. საარბიტრაჟო სარჩელთან ერთად წარდგენილი უნდა იყოს:

ა) საარბიტრაჟო შეთანხმება, სადაც განსაზღვრული იქნება დავის ონლაინ განხილვა;

ბ) საარბიტრაჟო მოსაკრებლის გადახდის დამადასტურებელი დოკუმენტი;

გ) წარმომადგენლის უფლებამოსილების დამადასტურებელი დოკუმენტი (წარმომადგენლის არსებობის შემთხვევაში);

დ) დოკუმენტები და სხვა მტკიცებულებები, რომლებიც ადასტურებს მოთხოვნას მოპასუხის მიმართ.

33<sup>5</sup>.4. DRC-ის სამდივნო ამოწმებს სარჩელის წარდგენისათვის გათვალისწინებულ მოთხოვნებს და საარბიტრაჟო მოსაკრებლის გადახდას, რის შემდეგ „საქმის წარმოების სისტემაში“ ააქტიურებს ონლაინ საარბიტრაჟო საქმის რეგისტრაციას და „საქმის წარმოების სისტემა“ საქმეს რეგისტრაციასთან ერთად ანიჭებს 10 - ნიშნა პერსონალურ კოდს. DRC-ის სასამართლოს თავმჯდომარე საქმის რეგისტრაციის დღიდან 3 სამუშაო დღის განმავლობაში იღებს დადგენილებას ონლაინ საარბიტრაჟო საქმის წარმოებაში მიღების შესახებ, უთითებს, რომ დავა განიხილება ონლაინ, უთითებს დანიშნული არბიტრის რეკვიზიტებს, საქმისათვის მინიჭებულ 10- ნიშნა კოდს და აგზავნის საარბიტრაჟო შეთანხმებაში მითითებულ და/ან მოსარჩელის მიერ მითითებულ ელექტრონული ფოსტის მისამართებზე, რაც განიხილება საარბიტრაჟო განხილვის მხარეებისათვის გზავნილის სათანადო წესით მიწოდებად.

33<sup>5</sup>.5. იმ შემთხვევაში, თუ საარბიტრაჟო სარჩელი არ აკმაყოფილებს დებულებით გათვალისწინებულ მოთხოვნებს, DRC სამდივნო ადგენს ხარვეზს და არ ანიჭებს საქმის წარმოების სარეგისტრაციო კოდს, ხარვეზის აღმოიფხვრამდე. თუ სარჩელის წარდგენასთან დაკავშირებით დადგენილი ხარვეზი არ გასწორება 30 დღის ვადაში, DRC-ის სამდივნო უარს ეტყვის მხარეს საქმის მიღებასა და რეგისტრაციაზე, ხოლო მხარეს დაუბრუნდება გადახდილი საარბიტრაჟო მოსაკრებლის 90%. აღნიშნული მხარეს ხელს არ უშლის, თავიდან წარადგინოს სარჩელი.

### **მუხლი 33<sup>6</sup>. შესაგებელი**

33<sup>6</sup>.1. მოპასუხე ვალდებულია, DRC-ის მიერ 33<sup>5</sup> მუხლის 33<sup>5</sup>.3. პუნქტის შესაბამისად, საარბიტრაჟო განხილვის დაწყების შესახებ ელექტრონულ ფოსტაზე გზავნილის მიწოდებიდან 10 დღის განმავლობაში, წარადგინოს საარბიტრაჟო სარჩელზე შესაგებელი. ტრიბუნალს მოპასუხის დასაბუთებული შუამდგომლობის საფუძველზე შეუძლია ამ ვადის გაგრძელება.

33<sup>6</sup>.2. შესაგებელში უნდა აღინიშნოს:

- ა) მოპასუხის და მისი წარმომადგენლის სახელი, გვარი, საკონტაქტო ინფორმაცია (მათ შორის- მისამართი, ტელეფონის ნომერი, ელექტრონული ფოსტის მისამართი);
- ბ) მოსაზრება საარბიტრაჟო მოსარჩელის მოთხოვნასთან და იმ ფაქტებთან დაკავშირებით, რომლიდანაც გამომდინარეობს დავა;
- გ) დოკუმენტების ნუსხა, რომელიც ერთვის შესაგებელს.
- დ) მოპასუხე ვალდებულია, შესაგებელთან ერთად წარადგინოს ინფორმაცია და დოკუმენტები იმ კონკრეტული ფაქტებისა და გარემოებების შესახებ, რომელზეც ამყარებს თავის შესაგებელს.

33<sup>6</sup>.3. შესაგებელი უნდა განთავსდეს „საქმის წარმოების სისტემაში“ . იმ შემთხვევაში, თუ მოპასუხე ვერ შეძლებს „საქმის წარმოების სისტემაში“ შესაგებლის და მტკიცებულებების

განთავსებას, ის ვალდებულია, ამ მუხლით გათვალისწინებულ ვადაში მიაწოდოს შესაგებელი და თანდართული მტკიცებულებები DRC-ის სამდივნოს ელექტრონულ ფოსტაზე. [info@drc.ge](mailto:info@drc.ge)

DRC-ის სამდივნო მიღებულ შესაგებელსა და თანდართულ დოკუმენტებს განათავსებს „საქმის წარმოების სისტემაში“ (შესაბამის საქმეში).

33<sup>6</sup>.4. მოპასუხის მიერ შესაგებლის წარუდგენლობა არ განიხილება სარჩელის ცნობად და გაგრძელდება საარბიტრაჟო განხილვა.

33<sup>6</sup>.5. მოპასუხეს შეუძლია, შესაგებლის წარსაგენად გათვალისწინებულ ვადაში წარადგინოს შემხვედრი საარბიტრაჟო სარჩელი, რომელიც უნდა პასუხობდეს 33<sup>5</sup>. მუხლის მოთხოვნებს. თავდაპირველ მოსარჩელეს შეუძლია, წარადგინოს შესაგებელი შემხვედრ საარბიტრაჟო სარჩელზე სარჩელის სისტემაში განთავსებიდან 10 დღის განმავლობაში, ამ მუხლით გათვალისწინებული მოთხოვნების დაცვითა და შესაგებლის „საქმის წარმოების სისტემაში“ განთავსებით. ამ შემთხვევაში საქმეზე საბოლოო გადაწყვეტილების მისაღებად გათვალისწინებული ვადაც შესაბამისად გაიზრდება.

### **მუხლი 337. ონლაინ საარბიტრაჟო განხილვა**

337.1. ონლაინ საარბიტრაჟო განხილვა მიმდინარეობს მხოლოდ „საქმის წარმოების სისტემაში“ ონლაინ წარდგენილი დოკუმენტების საფუძველზე და ივარაუდება როგორც ორიგინალი დოკუმენტები.

337.2. ონლაინ საარბიტრაჟო განხილვის მხარეს შეუძლია დააყენოს შუამდგომლობა, მეორე მხარის მიერ წარდგენილი დოკუმენტის ორიგინალ დოკუმენტთან შესაბამისობის თაობაზე მხოლოდ მას შემდეგ, რაც ის გადაიხდის დამატებით საარბიტრაჟო მოსაკრებელს, დავის საგნის ღირებულების 0,5 %-ის ოდენობით, მაგრამ არანაკლებ 100 ლარისა. ამგვარი განცხადების მიღების შემთხვევაში, ტრიბუნალს შეუძლია მოითხოვოს შესაბამისი მხარისგან ორიგინალი დოკუმენტის ან მისი დამოწმებული ასლის წარდგენა.

337.3. იმ შემთხვევაში, თუ განცხადება ონლაინ საარბიტრაჟო განხილვაში წარდგენილი დოკუმენტის ორიგინალ დოკუმენტთან შეუსაბამობის შესახებ არ დადასტურდება, დოკუმენტის ნამდვილობასთან დაკავშირებული ნებისმიერი ხარჯი დაეკისრება განმცხადებელ მხარეს მიუხედავად იმისა, თუ როგორ გადაწყდება დავა.

337.3. იმ შემთხვევაში, თუ განცხადება ონლაინ საარბიტრაჟო განხილვაში წარდგენილი დოკუმენტის ორიგინალ დოკუმენტთან შეუსაბამობის შესახებ დადასტურდება, დოკუმენტის ნამდვილობასთან დაკავშირებული ნებისმიერი ხარჯი დაეკისრება მოწინააღმდეგე მხარეს მიუხედავად იმისა, თუ როგორ გადაწყდება დავა.

337.4. ტრიბუნალს შეუძლია მხარეებისაგან გამოითხოვოს დამატებითი დოკუმენტები, ახსნა-განმარტება ან ცალკეულ საკითხებზე პოზიციის წარდგენა.

337.5. ონლაინ საარბიტრაჟო განხილვაში მხარის მიერ პოზიციის წარუდგენლობა არ აბრკოლებს საარბიტრაჟო განხილვას და ტრიბუნალს შეუძლია საარბიტრაჟო გადაწყვეტილება მიიღოს საქმეში წარმოდგენილი დოკუმენტების საფუძველზე.

337.6. თუ მხარე, რომელსაც ტრიბუნალმა მოსთხოვა დოკუმენტების ან სხვა მტკიცებულებების წარდგენა, არ წარადგენს მათ საპატიო მიზეზის გარეშე, ტრიბუნალი გადაწყვეტილებას იღებს საქმეში არსებული მტკიცებულებების საფუძველზე.

337.7. ონლაინ საარბიტრაჟო განხილვა სრულდება შესაგებლის წარდგენიდან ან წარდგენისათვის გათვალისწინებული ვადის ამოწურვიდან მე-15 დღეს, ან ტრიბუნალის მიერ განსაზღვრული დამატებითი ვადის გასვლისას, რის შემდეგაც საქმეში დამატებითი პოზიციების, ახსნა-განმარტების ან მტკიცებულებების მიღება არ დაიშვება.

337.8. ონლაინ საარბიტრაჟო განხილვა ტარდება მხარეთა მოსმენის გარეშე, მხარეთა მიერ წარმოდგენილი დოკუმენტების საფუძველზე.

337.9. ტრიბუნალი უფლებამოსილია, საქმეში არსებული მასალის საფუძველზე მიიღოს გადაწყვეტილება ონლაინ საარბიტრაჟო საქმეზე ზეპირი მოსმენის გამართვის შესახებ, აღნიშნულ შემთხვევაში დამატებითი საარბიტრაჟო ხარჯი არ გადაიხდება.

337.10. მხარე(ებ)ს შეუძლია დააყენოს შუამდგომლობა ონლაინ საარბიტრაჟო საქმეზე ზეპირი მოსმენის დანიშვნის შესახებ, შესაგებლის წარმოდგენიდან 5 დღის ვადაში. იმ შემთხვევაში, როცა მხარე ითხოვს ზეპირი მოსმენის დანიშვნას, მან ამისათვის უნდა გადაიხადოს ზეპირი მოსმენის გამართვისათვის დაწესებული დამატებითი საარბიტრაჟო ხარჯი დავის საგნის ღირებულების 1 %-ის ოდენობით, მაგრამ არანაკლებ 100 ლარისა. ზეპირი მოსმენის დანიშვნის საკითხს წყვეტს ტრიბუნალი.

337.11. ტრიბუნალი თუ საჭიროდ მიიჩნევს, შეიძლება მხარეებს მოუსმინოს ვიდეოკონფერენციის ან ტელეკონფერენციის საშუალებების დახმარებით. გამონაკლის შემთხვევაში, ასევე შეუძლია, DRC-ის ოფისში ან სხვა ადგილას მოიწვიოს მხარეები და მოუსმინოს მათ.

337.12. მხარეთა მოსმენის შესახებ ტრიბუნალმა მხარეებს უნდა შეატყობინოს მინიმუმ 3 სამუშაო დღით ადრე.

337.13. ზეპირი მოსმენის დროს, სამდივნო ახორციელებს ჩაწერას.

337.14. საპატიო მიზეზით მტკიცებულებათა წარუდგენლობის შემთხვევაში, ტრიბუნალს შეუძლია განაახლოს ონლაინ საარბიტრაჟო განხილვა, თუ მიიჩნევს, რომ ეს აუცილებელია საქმის გარემოებათა გამოსაკვლევად.

**მუხლი 338. საარბიტრაჟო გადაწყვეტილება**

33<sup>8</sup>.1. ონლაინ საარბიტრაჟო განხილვის შედეგად ტრიბუნალმა უნდა მიიღოს საარბიტრაჟო გადაწყვეტილება წერილობითი ფორმით, რომელიც საბოლოოა და სავალდებულოა შესასრულებლად საარბიტრაჟო განხილვის მხარეებისათვის.

33<sup>8</sup>.2. ტრიბუნალმა საარბიტრაჟო გადაწყვეტილება უნდა მიიღოს და მისი პროექტი ფორმალური შემოწმების მიზნით მიაწოდოს DRC-ის სამდივნოს საარბიტრაჟო განხილვის დასრულებიდან 10 დღის ვადაში. ტრიბუნალის დასაბუთებული განცხადების საფუძველზე DRC-ის სამდივნოს შეუძლია ამ ვადის გაზრდა, რის თაობაზეც ინფორმაცია მიეწოდებათ მხარეებს.

33<sup>8</sup>.3. საარბიტრაჟო გადაწყვეტილების ფორმალური შემოწმების დასრულების შემდეგ ტრიბუნალი ვალდებულია, ხელი მოაწეროს საარბიტრაჟო გადაწყვეტილებას და გადასცეს DRC-ის სამდივნოს, რომელიც საარბიტრაჟო გადაწყვეტილების ელექტრონულ ვერსიას განათავსებს „საქმის წარმოების სისტემაში“ და ასევე მიაწვდის მხარეებს ელექტრონულ ფოსტაზე. სამდივნოს მიერ დამოწმებული საარბიტრაჟო გადაწყვეტილება ან საარბიტრაჟო საქმეში არსებული დოკუმენტების დამოწმებული ასლი, შესაძლოა, გადაეცეს მხოლოდ საარბიტრაჟო დავის მხარეს და მის წარმომადგენელს.

### **მუხლი 33<sup>9</sup>. საარბიტრაჟო მოსაკრებელი**

33<sup>9</sup>.1. საარბიტრაჟო მოსაკრებელი ონლაინ საარბიტრაჟო დავებისათვის გათვალისწინებულია დებულების დანართი 2-ში მოცემული ცხრილით ( №2 პუნქტი 11).

33<sup>9</sup>.2. საარბიტრაჟო მოსაკრებელი სრულად უნდა გადაიხადოს მოსარჩელემ „საქმის წარმოების სისტემაში“ სპეციალური კოდის მინიჭებამდე.

33<sup>9</sup>.3. მოპასუხემ შემხვედრი საარბიტრაჟო სარჩელის წარდგენამდე უნდა გადაიხადოს საარბიტრაჟო მოსაკრებელი. ტრიბუნალი არ განიხილავს შემხვედრ საარბიტრაჟო სარჩელს საარბიტრაჟო მოსაკრებლის სრულად გადახდამდე.

33<sup>9</sup>.4. ონლაინ საარბიტრაჟო განხილვასთან დაკავშირებით მხარეთა მიერ გაწეული ხარჯების განაწილების შესახებ გადაწყვეტილებას ტრიბუნალი ასახავს საბოლოო საარბიტრაჟო გადაწყვეტილებაში.

## **თავი IV<sup>2</sup>. სადაზღვევო საქმეთა განხილვის წესი**

### **მუხლი 33<sup>11</sup> . ზოგადი წესები**

33<sup>11</sup>.1. თავი განსაზღვრავს დაზღვევისა და გადაზღვევის ურთიერთობებიდან წარმოშობილი დავების განხილვის წესს.

33<sup>11</sup>.2. თუ ამ თავით სხვა რამ არ არის გათვალისწინებული, სადაზღვევო საქმეთა საარბიტრაჟო განხილვისას გამოიყენება წესების ზოგადი ნორმები.

33<sup>11</sup>.3. თუ მხარეები სხვა რამეზე არ შეთანხმებულან საარბიტრაჟო დავა სადაზღვევო პოლისის პრემიასთან, საბანკო გარანტიასთან და უზრუნველყოფის საშუალებებთან დაკავშირებით განიხილება დებულების 33-ე მუხლის შესაბამისად.

### **მუხლი 33<sup>12</sup>. საარბიტრაჟო ტრიბუნალის ფორმირება**

თუ მხარეები სხვა რამეზე არ შეთანხმებულან, ან მხარეებმა არ ისარგებლეს არბიტრის დანიშვნის უფლებით, DRC-ის სასამართლოს თავმჯდომარე როგორც წესი არბიტრად ნიშნავს პირს, რომელიც DRC-ის არბიტრთა სიაში რეგისტრირებულია სადაზღვევო სფეროში არსებული დავების განმხილველ არბიტრად.

## **თავი V. საარბიტრაჟო გადაწყვეტილება**

### **მუხლი 34. გადაწყვეტილების მიღება**

34.1. ერთზე მეტი არბიტრით ფორმირებული ტრიბუნალის შემთხვევაში გადაწყვეტილება მიიღება ხმათა უმრავლესობით. თუ შეთანხმება არ იქნა მიღწეული, მაშინ თავმჯდომარის ხმა გადამწყვეტია.

34.2. პროცედურული საკითხების გადაწყვეტისას, ტრიბუნალის თავმჯდომარეს შეუძლია მიიღოს გადაწყვეტილება ერთპიროვნულად, იმ პირობით, რომ მიღებული გადაწყვეტილების შესახებ დაუყოვნებლივ აცნობებს ტრიბუნალის სხვა წევრებს. ტრიბუნალს შეუძლია, ამ გადაწყვეტილების შეცვლა ან გაუქმება.

34.3. ტრიბუნალს შეუძლია საარბიტრაჟო განხილვის პროცესში მიიღოს ნაწილობრივი საარბიტრაჟო გადაწყვეტილება.

34.4. საარბიტრაჟო გადაწყვეტილება ითვლება მიღებულად გადაწყვეტილებაში მითითებულ დღეს.

34.5. საარბიტრაჟო გადაწყვეტილება შესაძლებელია გამოქვეყნდეს ყველა მხარის თანხმობით, ან იმ შემთხვევაში და იმ ფარგლებში, რომელშიც საარბიტრაჟო გადაწყვეტილების შესახებ ინფორმაციის გასაჯაროება აუცილებელია მხარეზე დაკისრებული ვალდებულების შესრულების, სამართლებრივი უფლების დაცვის, შენარჩუნების, ან სასამართლოში მიმდინარე განხილვასთან დაკავშირებით.

### **მუხლი 35. საბოლოო საარბიტრაჟო გადაწყვეტილების მიღების ვადა**

- 35.1. ტრიბუნალმა საბოლოო საარბიტრაჟო გადაწყვეტილება უნდა მიიღოს მისთვის საარბიტრაჟო საქმის გადაცემიდან 180 დღის ვადაში, თუ პროცედურული განრიგის საფუძველზე სხვა ვადა არ იქნება დადგენილი.
- 35.2. საარბიტრაჟო განხილვის დასრულებიდან 20 დღის ვადაში, ხოლო დებულების 33-ე მუხლით გათვალისწინებული დავებისათვის საარბიტრაჟო განხილვის დასრულებიდან 10 დღის ვადაში, ტრიბუნალმა საარბიტრაჟო გადაწყვეტილება უნდა გადასცეს DRC-ის სამდივნოს მისი ფორმალური შემოწმების მიზნით. DRC-ის სამდივნოს შეუძლია ამ ვადის გაგრძელება, ტრიბუნალის მოტივირებული თხოვნის ან საკუთარი ინიციატივის საფუძველზე.

### **მუხლი 36. საარბიტრაჟო განხილვის შეჩერება და საარბიტრაჟო განხილვის შეწყვეტა**

36.1. საარბიტრაჟო ტრიბუნალს შეუძლია შეაჩეროს საარბიტრაჟო განხილვა:

- ა) მხარეთა განცხადების საფუძველზე;
- ბ) ექსპერტიზის დანიშვნის შემთხვევაში;
- გ) საარბიტრაჟო განხილვის შეუძლებლობის შემთხვევაში, მათ შორის იმ შემთხვევაში, როცა მხარის უფლებამონაცვლეობის საკითხი არ არის გადაწყვეტილი.

36.2. საარბიტრაჟო განხილვა განახლდება:

- ა) რომელიმე მხარის განცხადებით, თუ საარბიტრაჟო განხილვა შეჩერებული იყო მხარეთა შეთანხმების საფუძველზე;
- ბ) იმ გარემოების აღმოფხვრის შემდეგ, რომელიც საფუძველად დაედო საარბიტრაჟო განხილვის შეჩერებას.

36.3. იმ შემთხვევაში, როცა საარბიტრაჟო განხილვა შეჩერებული იქნა მხარეთა შეთანხმების საფუძველზე და საარბიტრაჟო განხილვის შეჩერების დღიდან 6 თვის განმავლობაში DRC-ის სამდივნოს არ მიუღია მხარ(ებ)ის განაცხადი საარბიტრაჟო განხილვის განახლების შესახებ, საარბიტრაჟო განხილვის შეჩერება უქმდება და საარბიტრაჟო განხილვა განახლდება. სხვა საფუძველით შეჩერებული საარბიტრაჟო განხილვის 1 წლის ვადაში განუახლებლობის შემთხვევაში, ტრიბუნალს შეუძლია მიიღოს გადაწყვეტილება საარბიტრაჟო მოთხოვნის განუხილველად დატოვების შესახებ.

36.4. ტრიბუნალისათვის საქმის გადაცემის შემდეგ, მხარეებს შორის შეთანხმების მიღწევის საფუძველით საარბიტრაჟო განხილვის შეწყვეტის მოთხოვნისას, ტრიბუნალი იღებს გადაწყვეტილებას საარბიტრაჟო განხილვის შეწყვეტის შესახებ. იმ შემთხვევაში თუ მხარეები შუამდგომლობენ შეთანხმებული პირობების დამტკიცებას საარბიტრაჟო გადაწყვეტილებით და საარბიტრაჟო ტრიბუნალი ამას ეთანხმება, მიიღება საარბიტრაჟო გადაწყვეტილება მხარეთა შეთანხმებული პირობებით დამტკიცებისა და საარბიტრაჟო განხილვის შეწყვეტის შესახებ. ამ შემთხვევაში ტრიბუნალი არ არის ვალდებული ჩამოაყალიბოს გადაწყვეტილების სამოტივაციო ნაწილი.



36.5. თუ საარბიტრაჟო გადაწყვეტილების მიღებამდე აღმოჩნდება, რომ საარბიტრაჟო განხილვის გაგრძელება არ არის საჭირო, დავის საგნის არარსებობის გამო ან მისი გაგრძელება შეუძლებელია 36.1.გ. ქვეპუნქტით გათვალისწინებული საფუძვლით და/ან მოსარჩელე გაიხმობს საარბიტრაჟო სარჩელს, ტრიბუნალი ატყობინებს მხარეებს საარბიტრაჟო განხილვის შეწყვეტაზე თავისი განზრახვის შესახებ. ტრიბუნალს მხოლოდ მაშინ შეუძლია ამგვარი გადაწყვეტილების მიღება, თუ არ რჩება საკითხი, რომელზეც საჭიროა გადაწყვეტილების მიღება და იგი მიზანშეწონილად ჩათვლის საარბიტრაჟო განხილვის შეწყვეტას.

36.6. საარბიტრაჟო განხილვა შესაძლებელია ასევე შეწყდეს წესებით გათვალისწინებულ სხვა შემთხვევებში.

### **მუხლი 37. მხარეთა შეთანხმების დამტკიცება**

37.1. თუ მხარეები მორიგდნენ საარბიტრაჟო ტრიბუნალისათვის საქმის გადაცემის შემდეგ, მათ შეუძლიათ მოითხოვონ მხარეთა შეთანხმებით მიღებული მორიგების დამტკიცება საარბიტრაჟო გადაწყვეტილების ფორმით.

37.2. თუ საქმე არ გადასცემა საარბიტრაჟო ტრიბუნალს, ან საქმეზე დასრულებულია საარბიტრაჟო განხილვა და მიღებულია საარბიტრაჟო გადაწყვეტილება, რომლის ცნობა-აღსრულება არ მომხდარა და DRC-ის სამდივნო მიიღებს მხარის/მხარეთა შუამდგომლობას მორიგების საარბიტრაჟო გადაწყვეტილებით დამტკიცების შესახებ, სამდივნო საქმეს გადასცემს ტრიბუნალს.

37.3. DRC-ის სასამართლოს თავმჯდომარე საქმეს გადასცემს ტრიბუნალს, ხოლო თუ საარბიტრაჟო ტრიბუნალი არ არის ფორმირებული, DRC-ის სასამართლოს თავმჯდომარე ნიშნავს არბიტრს იმ მორიგების პირობების დასამტკიცებლად, რომელიც მხარეთა შორის მიღწეული იქნა საქმეზე საარბიტრაჟო გადაწყვეტილების მიღების შემდეგ, არბიტრად შეიძლება დაინიშნოს საარბიტრაჟო გადაწყვეტილების მიმღები პირიც.

37.4. ამ მუხლით გათვალისწინებული განხილვისას არ მოქმედებს საარბიტრაჟო სარჩელთან და შესაგებელთან დაკავშირებული დებულების ნორმები.

37.5. ტრიბუნალი უფლებამოსილია თავისი შეხედულებისამებრ გადაწყვიტოს დააკმაყოფილოს თუ არა მხარ(ებ)ის შუამდგომლობა მორიგების საარბიტრაჟო გადაწყვეტილებით დამტკიცებისა და საქმის წარმოების შეწყვეტის შესახებ. გადაწყვეტილების მიღებისას ითვალისწინებს მხარეთა მიერ წარმოდგენილ დოკუმენტებს, ხოლო საჭიროებისას შეუძლია გამართოს ზეპირი მოსმენა წესების 28-ე მუხლით გათვალისწინებული წესით.

### **მუხლი 38. საარბიტრაჟო გადაწყვეტილების ფორმა და იურიდიული ძალა**

- 38.1. ნებისმიერი საარბიტრაჟო გადაწყვეტილება შედგენილი უნდა იქნას წერილობითი ფორმით და უნდა შეიცავდეს დასაბუთებას, რომელზეც საარბიტრაჟო ტრიბუნალი ამყარებს თავის გადაწყვეტილებას, გარდა იმ შემთხვევისა, როცა მხარეები შეთანხმდნენ, რომ საარბიტრაჟო გადაწყვეტილება არ უნდა იყოს დასაბუთებული.
- 38.2. საარბიტრაჟო გადაწყვეტილებას ხელი უნდა მოაწეროს ტრიბუნალმა, მითითებული უნდა იყოს საარბიტრაჟო გადაწყვეტილების მიღების თარიღი და არბიტრაჟის ადგილი.
- 38.3. საქმის რამდენიმე არბიტრისაგან შემდგარი ტრიბუნალის მიერ განხილვისას გადაწყვეტილებას, ხელი უნდა მოაწეროს არბიტრების უმრავლესობამ. თუ ტრიბუნალის წევრი უარს აცხადებს საარბიტრაჟო გადაწყვეტილების ხელმოწერაზე ან/და განსხვავებული აზრი აქვს, საარბიტრაჟო გადაწყვეტილებაში უნდა გაკეთდეს შესაბამისი ჩანაწერი.

### **მუხლი 39. საარბიტრაჟო გადაწყვეტილების ფორმალური შემოწმება**

- 39.1. ტრიბუნალი ვალდებულია საარბიტრაჟო გადაწყვეტილების პროექტი, მასზე ხელმოწერამდე, გადასცეს DRC-ის სამდივნოს.
- 39.2. DRC-ის სასამართლოს შეუძლია საარბიტრაჟო ტრიბუნალს შესთავაზოს ცვლილებების შეტანა გადაწყვეტილების პროექტში, ტრიბუნალის გადაწყვეტილების თავისუფლების პრინციპის დარღვევის გარეშე, ტრიბუნალს ყურადღება გაამახვილებინოს გადაწყვეტილების არსებით ნაწილში აღმოჩენილ ფორმალური ხასიათის ხარვეზებზე ან/და შეცდომებზე.
- 39.3. ტრიბუნალი ვალდებულია არ მოაწეროს ხელი საარბიტრაჟო გადაწყვეტილებას, DRC-ის სასამართლოს მიერ მისი ფორმალური შემოწმების დასრულებამდე.
- 39.4. საარბიტრაჟო გადაწყვეტილების ფორმალური შემოწმების დასრულება დასტურდება DRC-ის სამდივნოს მიერ გადაწყვეტილებაზე ბეჭდის დასმით და ხელის მოწერით;

### **მუხლი 40. საბოლოო საარბიტრაჟო გადაწყვეტილების დამოწმება**

- 40.1. DRC-ის სამდივნო საარბიტრაჟო გადაწყვეტილების დამტკიცებამდე ამოწმებს იყვნენ თუ არა საარბიტრაჟო მხარეები ჯეროვნად ინფორმირებულები საარბიტრაჟო განხილვის დაწყებისა და ზეპირი მოსმენის (სხდომის მოწვევის) თაობაზე.
- 40.2. ტრიბუნალის შუამდგომლობის საფუძველზე DRC-ის სამდივნოს ასევე შეუძლია დაადასტუროს სხვა ტიპის დოკუმენტებიც, რომელსაც გამოსცემს ტრიბუნალი.

40.3. სამდივნოს მიერ დამოწმებული საარბიტრაჟო გადაწყვეტილების, ან საარბიტრაჟო საქმეში არსებული დოკუმენტების დამოწმებული ასლი შესაძლოა გადაეცეს მხოლოდ საარბიტრაჟო დავის მხარეს ან მის წარმომადგენელს.

40.4. DRC-ის სამდივნო, საჭიროების შემთხვევაში, დახმარებას გაუწევს საარბიტრაჟო დავის მხარეს ყველა შემდგომი ფორმალობის შესასრულებლად.

#### **მუხლი 41. საქმის მასალის შენახვა**

41.1. ტრიბუნალი საბოლოო საარბიტრაჟო გადაწყვეტილების ყველა ეგზემპლარს გადასცემს DRC-ის სამდივნოს, რომელიც საარბიტრაჟო გადაწყვეტილებას გადასცემს მხარეებს მხოლოდ მას შემდეგ, რაც შეამოწმებს, რომ საარბიტრაჟო დავის მხარეთა მიერ სრულადაა დაფარული საარბიტრაჟო ხარჯი დებულების 46-ე მუხლის შესაბამისად.

41.2. DRC-ის სამდივნო ინახავს ტრიბუნალის მიერ საბოლოო საარბიტრაჟო გადაწყვეტილების ხელმოწერიდან 1 წლის განმავლობაში.

#### **მუხლი 42. საარბიტრაჟო გადაწყვეტილების განმარტება**

42.1. თუ საარბიტრაჟო გადაწყვეტილება არ არის აღსრულებული, მხარეს უფლება აქვს მიმართოს განცხადებით DRC-ის სამდივნოს და ტრიბუნალისაგან მოითხოვოს საარბიტრაჟო გადაწყვეტილების სარეზოლუციო ნაწილის, ან მისი რომელიმე პუნქტის განმარტება. DRC-ის სამდივნო მიღებულ განცხადებას უგზავნის საარბიტრაჟო ტრიბუნალის წევრებს.

42.2. ტრიბუნალი, თუ მხარის მოთხოვნას დასაბუთებულად მიიჩნევს, არაუგვიანეს განცხადების მიღებიდან 30-ე დღისა, განმარტავს გადაწყვეტილებას.

42.3. ტრიბუნალის განმარტება საარბიტრაჟო გადაწყვეტილების შემადგენელი ნაწილია და მის მიმართ ვრცელდება დებულების 38-41 მუხლები.

42.4. DRC-ის სამდივნოს, თავისი ინიციატივით ან ტრიბუნალის მოთხოვნის საფუძველზე, შეუძლია გააგრძელოს ამ მუხლის 42.2.-ე პუნქტით გათვალისწინებული ვადა არაუმეტეს 30 დღით.

#### **მუხლი 43. საარბიტრაჟო გადაწყვეტილების შესწორება**

43.1. თუ საარბიტრაჟო გადაწყვეტილება არ არის აღსრულებული მხარეს უფლება აქვს მიმართოს DRC-ის სამდივნოს განცხადებით და მოითხოვოს საარბიტრაჟო გადაწყვეტილებაში დაშვებული შეცდომების, მათ შორის, არასწორი გაანგარიშებების, ბეჭდვითი და ტექნიკური შეცდომებისა და ხარვეზების გასწორება.

- 43.2. ტრიბუნალი, თუ იგი მხარის მოთხოვნას დასაბუთებულად მიიჩნევს, განცხადების მიღებიდან 30-ე დღის ვადაში იღებს გადაწყვეტილებას უსწორობის გასწორებასთან დაკავშირებით.
- 43.3. ტრიბუნალი უფლებამოსილია, თავისი ინიციატივით გაასწოროს ამ მუხლის 43.1. პუნქტში მითითებული შეცდომა.
- 43.4. ტრიბუნალის მიერ საარბიტრაჟო გადაწყვეტილებაში შეტანილი შესწორება, საარბიტრაჟო გადაწყვეტილების შემადგენელი ნაწილია და მის მიმართ ვრცელდება დებულების 38–41 მუხლები.
- 43.5. DRC-ის სამდივნოს, თავისი ინიციატივით ან ტრიბუნალის მოთხოვნის საფუძველზე, შეუძლია გააგრძელოს ამ მუხლის 43.1., 43.2. ან 43.3. პუნქტით გათვალისწინებული ვადა.

#### **მუხლი 44. დამატებითი საარბიტრაჟო გადაწყვეტილება**

- 44.1. საარბიტრაჟო გადაწყვეტილების მიღებიდან 60 დღის განმავლობაში, მხარეს უფლება აქვს მიმართოს DRC-ის სამდივნოს განცხადებით და ტრიბუნალისაგან მოითხოვოს დამატებითი საარბიტრაჟო გადაწყვეტილების მიღება იმ მოთხოვნებთან დაკავშირებით, რომლებიც განცხადებული იყო საარბიტრაჟო განხილვის პროცესში, მაგრამ არ იქნა ასახული გადაწყვეტილებაში. DRC-ის სამდივნო მიღებულ განცხადებას უგზავნის ტრიბუნალს და საარბიტრაჟო დავის სხვა მხარეებს, რომელთაც შეუძლიათ თავიანთი მოსაზრებები წარმოადგინონ შესაბამისი განცხადების მიღებიდან 10 დღის ვადაში.
- 44.2. ტრიბუნალმა, თუ იგი მხარის მოთხოვნას დასაბუთებულად მიიჩნევს, სხვა მხარეთა მოსაზრებების მიღების ან ამ მოსაზრებების წარმოდგენისათვის გათვალისწინებული ვადის ამოწურვის შემდეგ, მაგრამ არაუგვიანეს განცხადების მიღებიდან 30 დღისა, უნდა მიიღოს დამატებითი საარბიტრაჟო გადაწყვეტილება.
- 44.3. DRC-ის სამდივნოს, თავისი ინიციატივით ან ტრიბუნალის მომართვის საფუძველზე შეუძლია გააგრძელოს ამ მუხლის 44.2. პუნქტით გათვალისწინებული ვადა არა უმეტეს 30 დღით.
- 44.4. დამატებითი საარბიტრაჟო გადაწყვეტილება საარბიტრაჟო გადაწყვეტილების შემადგენელი ნაწილია და მის მიმართ ვრცელდება დებულების 38–41 მუხლები.

## **თავი VI. ხარჯები**

#### **მუხლი 45. ავანსი საარბიტრაჟო ხარჯების დაფარვისათვის**

- 45.1. DRC-ის სამდივნო საარბიტრაჟო სარჩელში ჩამოყალიბებული მოთხოვნების მიხედვით განსაზღვრავს წინასწარ გადასახდელ საარბიტრაჟო ხარჯს, რაც არის მიახლოებითი

თანხა, რომელიც გამიზნულია დებულების 46-ე მუხლის პირველი პუნქტით გათვალისწინებული საარბიტრაჟო ხარჯის დასაფარად და უგზავნის მოთხოვნას მოსარჩელეს, რომ მან გადაიხადოს წინასწარი საარბიტრაჟო ხარჯი.

- 45.2. თუ მოპასუხის მიერ შემხვედრი მოთხოვნა დაყენებულია დებულების მე-8 მუხლის შესაბამისად, DRC-ის სამდივნოს შეუძლია განსაზღვროს წინასწარ გადასახდელი საარბიტრაჟო ხარჯი საარბიტრაჟო მოთხოვნისა და შემხვედრი მოთხოვნისათვის. თუ DRC-ის სამდივნომ ამ პუნქტის შესაბამისად დაადგინა წინასწარ გადასახდელი საარბიტრაჟო ხარჯები, თითოეული მხარე იხდის ხარჯების იმ ნაწილს, რომელიც შეესაბამება მის მოთხოვნას.
- 45.3. თუ საარბიტრაჟო მოთხოვნა დაყენებულია ამ დებულების მე-10 მუხლის შესაბამისად, DRC-ის სამდივნო ადგენს წინასწარ გადასახდელ საარბიტრაჟო ხარჯს, რომელიც მხარეებმა უნდა გადაიხადონ დებულებით გათვალისწინებულ ან DRC-ის სამდივნოს მიერ განსაზღვრულ ვადაში.
- 45.4. დებულების მე-12 მუხლის შესაბამისად, რამდენიმე საარბიტრაჟო საქმის გაერთიანების შემთხვევაში და თუ წინასწარ გადასახდელი საარბიტრაჟო ხარჯი უკვე განსაზღვრული იყო, მას ამ მუხლით გათვალისწინებული გადასახდელი საარბიტრაჟო ხარჯი ჩაანაცვლებს. რომელიმე მხარის მიერ ადრე გადახდილი ავანსი ჩაითვლება მხარის მიერ დებულების ამ პუნქტით გათვალისწინებული წინასწარ გადასახდელი ხარჯის ნაწილის გადახდად.
- 45.5. ამ მუხლის შესაბამისად, DRC-ის სამდივნოს მიერ განსაზღვრული წინასწარ გადასახდელი ხარჯი შესაძლებელია დაზუსტდეს საარბიტრაჟო განხილვის ნებისმიერ სტადიაზე. საქმის განხილვის გაჭიანურების თავიდან აცილების მიზნით, მხარეს უფლება აქვს გადაიხადოს ხარჯის ის ნაწილი, რომელიც სხვა მხარის გადასახდელია, თუ ეს სხვა მხარე არ იხდის საარბიტრაჟო ხარჯის თავის წილს. მხარის მოთხოვნის საფუძველზე, ტრიბუნალი ამ გარემოებას გაითვალისწინებს საბოლოო საარბიტრაჟო გადაწყვეტილების გამოტანისას.
- 45.6. თუ მოთხოვნილი საარბიტრაჟო ხარჯი არ იქნება სრულად გადახდილი დებულებით განსაზღვრულ ვადაში, საარბიტრაჟო სარჩელი დარჩება განუხილველი. საარბიტრაჟო მოთხოვნის განუხილველად დატოვება დაინტერესებულ მხარეს არ ართმევს უფლებას თავიდან დააყენოს იგივე საარბიტრაჟო მოთხოვნები.
- 45.7 DRC-ის სამდივნომ შეიძლება მიიღოს გადაწყვეტილება წინასწარ გადასახდელი საარბიტრაჟო ხარჯის ნაწილის დასაფარად საბანკო გარანტიის ან უზრუნველყოფის სხვა ფორმების გამოყენების თაობაზე.
- 45.8. თუ დადგინდება, რომ DRC-ს არა აქვს იურისდიქცია დავაზე ან დავა ცდება არბიტრაჟის კომპეტენციას და ამის საფუძველზე შეწყდება საარბიტრაჟო პროცესი, DRC გადახდილი ავანსიდან იტოვებს 100 ლარს და დარჩენილ თანხას უბრუნებს მხარეს, რომელმაც განახორციელა ამ მუხლით გათვალისწინებული ავანსის გადახდა.
- 45.8. ამ მუხლის 45.8. გათვალისწინებული ადმინისტრაციული ხარჯი არ მოიცავს სარეგისტრაციო მოსაკრებელს. სარეგისტრაციო მოსაკრებელი არ ექვემდებარება დაბრუნებას.

## მუხლი 46. საარბიტრაჟო ხარჯების გაანგარიშება

46.1. საარბიტრაჟო ხარჯი შედგება:

- ა) DRC-ის სარეგისტრაციო მოსაკრებელისა და ადმინისტრაციული საზღაურისაგან;
- ბ) არბიტრთა ჰონორარისა და მათი ხარჯისაგან;
- გ) საარბიტრაჟო განხილვასთან დაკავშირებული სხვა ხარჯებისაგან.

46.2. DRC-ის სამდივნო განსაზღვრავს არბიტრთა ჰონორარს, DRC-ის სარეგისტრაციო მოსაკრებელს და ადმინისტრაციულ საზღაურს საარბიტრაჟო განხილვის დღეს მოქმედი ხარჯების ცხრილების (დანართი #2) მიხედვით.

46.3. არბიტრის მიერ ვალდებულების არაჯეროვანი შესრულების შემთხვევაში DRC-ის სამდივნოს შეუძლია დაადგინოს არბიტრის ჰონორარი იმაზე ნაკლები ოდენობით, ვიდრე ეს გათვალისწინებულია დებულებით.

46.4. საარბიტრაჟო განხილვის ნებისმიერ სტადიაზე ტრიბუნალს შეუძლია მიიღოს გადაწყვეტილება იმ ხარჯებთან დაკავშირებით, რომელთა დადგენაზეც არ მიუღია გადაწყვეტილება DRC-ის სამდივნოს და დაავალოს მხარეებს მათი გადახდა.

46.5. თუ მხარეები არ შეთანხმდნენ საარბიტრაჟო ხარჯების განაწილებაზე, საბოლოო საარბიტრაჟო გადაწყვეტილებაში ტრიბუნალმა უნდა განსაზღვროს საარბიტრაჟო ხარჯების ოდენობა და მიუთითოს, თუ როგორი პროპორციით ნაწილდება ხარჯები მხარეთა შორის. როგორც წესი, საარბიტრაჟო ხარჯები ეკისრება წაგებულ მხარეს, თუმცა საარბიტრაჟო ტრიბუნალს შეუძლია ნებისმიერი ხარჯი გადაანაწილოს მხარეებს შორის, თუ საქმის გარემოებებიდან გამომდინარე, ხარჯების ამგვარ განაწილებას ჩათვლის სამართლიანად. ტრიბუნალმა ამ საკითხზე გადაწყვეტილების მიღებისას მხედველობაში უნდა მიიღოს საქმისათვის მნიშვნელოვანი გარემოებები, მათ შორის მხარეთა მოქმედებები იყო თუ არა მიმართული საქმის სწრაფი, მოქნილი და ნაკლებხარჯიანი გადაწყვეტის ხელშეწყობისკენ.

46.6. ამ მუხლის 46.5.-ე პუნქტის შესაბამისად გადასანაწილებელი ხარჯები შედგება:

- ა) ტრიბუნალის წევრთა ჰონორარისაგან;
- ბ) არბიტრთა მიერ გაწეული გონივრული სამგზავრო და სხვა ხარჯებისაგან;
- გ) ექსპერტთა გონივრული საზღაურის და ტრიბუნალის მიერ გაღებული სხვა დახმარების ხარჯებისაგან;
- დ) მოწმეთა სამგზავრო და სხვა აუცილებელი ხარჯებისაგან იმ ოდენობით, რა ოდენობითაც ეს ხარჯები მოწონებულია საარბიტრაჟო ტრიბუნალის მიერ;
- ე) იურიდიული მომსახურების და სხვა ხარჯებისაგან, რომელიც გაწეულია მხარეთა მიერ საარბიტრაჟო განხილვასთან დაკავშირებით, იმ ოდენობით, რა ოდენობითაც ტრიბუნალი მიიჩნევს მათ გონივრულად;
- ვ) DRC-ის ადმინისტრაციული გადასახადისა და ხარჯებისაგან.

46.7. ტრიბუნალი უფლებამოსილია გადაწყვეტილებით დაავალოს მხარეს ან მხარეებს დებულების 46.1. პუნქტით გათვალისწინებული ნებისმიერი ხარჯის გადახდა, რომელიც მეორე მხარემ გასწია.

## თავი VII. სხვა დებულებები

### მუხლი 47. საარბიტრაჟო განხილვის განახლება

- 47.1. თუ საერთო სასამართლო, რომელსაც მიმართეს საარბიტრაჟო გადაწყვეტილების გაუქმების თხოვნით აჩერებს საჩივრის განხილვას არბიტრაჟის მიერ გადაწყვეტილების გაუქმების საფუძვლის აღმოსაფხვრელად, ტრიბუნალი იღებს გადაწყვეტილებას საარბიტრაჟო განხილვის განახლების შესახებ. აღნიშნულის შესახებ ეცნობება საერთო სასამართლოს და საარბიტრაჟო განხილვის მხარეებს.
- 47.2. ტრიბუნალმა განახლებული საარბიტრაჟო წარმოების შემდეგ უნდა მიიღოს საბოლოო საარბიტრაჟო გადაწყვეტილება, რომლის მიმართაც სრულად გამოიყენება ამ დებულების 34-ე – 44-ე მუხლები.
- 47.3. იმ შემთხვევაში, თუ ტრიბუნალის გადაწყვეტილების ცნობასა და აღიარებას არ მოახდენს საერთო სასამართლო იმ მიზეზით, რომ ტრიბუნალის მიერ საარბიტრაჟო განხილვისას დარღვეული იყო ამ დებულებით ან/და მხარეთა საარბიტრაჟო შეთანხმებით გათვალისწინებული წეს(ებ)ი, დაინტერესებული მხარის მოთხოვნის საფუძველზე და ტრიბუნალის გადაწყვეტილებით შესაძლებელია განახლდეს საარბიტრაჟო დავის განხილვა. ამ შემთხვევაში სრულად გამოიყენება ამ მუხლის 47.1 და 47.3 პუნქტები.

### მუხლი 48. ვადების ცვლილება

- 48.1. მხარეებს შეუძლიათ შეთანხმდნენ დებულებით გათვალისწინებულისაგან განსხვავებულ ვადებზე. თუ ასეთი შეთანხმება მიღწეულია ტრიბუნალის ფორმირების შემდეგ, შეთანხმება ძალაში შედის საარბიტრაჟო ტრიბუნალის მიერ მისი დამტკიცების შემდეგ.
- 48.2. DRC-ის სამდივნოს შეუძლია გაზარდოს ნებისმიერი ვადა, თუ ჩათვლის, რომ ეს აუცილებელია ტრიბუნალის მიერ უფლებამოსილების სწორად და ეფექტურად განხორციელებისათვის.

### მუხლი 49. უარი შეპასუხებაზე

თუ მხარე მონაწილეობს საარბიტრაჟო განხილვაში და ამ დებულებით ან/და საარბიტრაჟო შეთანხმებით გათვალისწინებული, ან საარბიტრაჟო განხილვისას გამოსაყენებელი ნებისმიერი წესის დარღვევასთან დაკავშირებით არ განაცხადებს პრეტენზიას ამ დებულებით, ან საარბიტრაჟო შეთანხმებით, ან DRC-ის სასამართლოს, ან ტრიბუნალის მიერ განსაზღვრულ ვადაში, ჩაითვლება, რომ მან უარი თქვა შეპასუხების/პრეტენზიის განცხადების უფლების გამოყენებაზე.

#### **მუხლი 50. პასუხისმგებლობის შეზღუდვა**

DRC და მისი თანამშრომლ(ებ)ი, DRC-ის სასამართლო და მისი წევრ(ებ)ი, არბიტრ(ებ)ი, არბიტრაჟის მიერ დანიშნული ნებისმიერი პირ(ებ)ი არ აგებს პასუხს საარბიტრაჟო განხილვასთან დაკავშირებული ნებისმიერი ქმედების (მათ შორის შეცდომის) ან უმოქმედობისათვის იმ ფარგლებში, რა ზომითაც პასუხისმგებლობის ამგვარი შეზღუდვა დაშვებულია კანონმდებლობით.

#### **მუხლი 51. გაუთვალისწინებელი გარემოებები**

იმ საკითხთან დაკავშირებით, რომელიც არ არის მოწესრიგებული ამ დებულებით, DRC-ის სასამართლომ, ტრიბუნალმა და სამდივნომ უნდა იმოქმედონ დებულების პრინციპების შესაბამისად და მაქსიმალურად უზრუნველყონ საარბიტრაჟო გადაწყვეტილების აღსრულებადობა.

#### **მუხლი 52. დებულებაში ცვლილებებისა და დამატებების შეტანა**

დებულებაში ცვლილებები და დამატებები შეიძლება შეტანილი იქნას ნებისმიერ დროს. ამასთან, ამგვარი ცვლილებები და დამატებები არ გავრცელდება იმ საქმეზე, რომლის საარბიტრაჟო განხილვაც დაიწყო ცვლილებების/დამატებების ამოქმედებამდე.

#### **მუხლი 53. საარბიტრაჟო გადაწყვეტილებათა გამოქვეყნება**

DRC-ს აქვს უფლება გამოაქვეყნოს საარბიტრაჟო გადაწყვეტილებათა ამონარიდები იურიდიულ ლიტერატურაში ან DRC-ის პუბლიკაციაში იმ ფორმით, რაც არ იძლევა მხარეების იდენტიფიცირების საშუალებას, თუ საარბიტრაჟო განხილვის რომელიმე



მხარე გადაწყვეტილების მისთვის გადაცემიდან 30 დღის ვადაში არ გააპროტესტებს ამ უფლებას.

## **დანართი #1. DRC–ის სასამართლოს სტატუსი და შიდა რეგლამენტი**

### **მუხლი 1. ფუნქციები**

- 1.1. „დავების განმხილველი ცენტრი“-ს (შემდგომში – DRC) სასამართლოს იღებს გადაწყვეტილებას DRC–ის საქმის წარმოების წესებით (შემდგომში – დებულება) გათვალისწინებულ საკითხებზე.
- 1.2. DRC–ის სასამართლოს კომპეტენციაში შედის:
  - ა) DRC–ის არბიტრთა სიის დამტკიცება;
  - ბ) საარბიტრაჟო განხილვის პროცესში შექმნილი პრაქტიკის გამოქვეყნება;
  - გ) სპეციფიკური საქმეების საარბიტრაჟო განხილვის მეთოდის, სახელმძღვანელო წესების შედგენა;
  - დ) სასამართლოს წევრთა კანდიდატების შერჩევა და დირექტორთა საბჭოსთვის დასამტკიცებლად წარდგენა;
  - ე) დებულებაში ცვლილებათა პროექტების მომზადება;
  - ვ) დებულებით გათვალისწინებული კომპეტენციის ფარგლებში ცალკეული საკითხების გადაწყვეტა;
  - ზ) DRC–ის სამდივნოს ხელმძღვანელის (შემდგომში – გენერალური მდივანი) ანგარიშის მოხმენა საარბიტრაჟო განხილვის ადმინისტრირების, მათ შორის სამდივნოს მუშაობის საკითხებზე;
  - თ) გენერალური მდივნისათვის სარეკომენდაციო ხასიათის რჩევების მიცემა საქმეების სწორი და ეფექტური ადმინისტრირების უზრუნველყოფის მიზნით;
  - ი) UNCITRAL–ის საარბიტრაჟო რეგლამენტის, ან სხვა წესების, ან FIDIC–ის ხელშეკრულების შესაბამისად კომპეტენტური ორგანოსათვის მინიჭებული ფუნქციების შესრულება.

### **მუხლი 2. სასამართლოს შემადგენლობა**

- 2.1. სასამართლო შედგება თავმჯდომარის და სასამართლოს წევრებისაგან.
- 2.2. სასამართლოს საქმიანობაში დახმარებას უწევს DRC–ის სამდივნო.

### მუხლი 3. დანიშვნა

- 3.1. სასამართლოს შემადგენლობა განისაზღვრება მინიმუმ 4 წევრით.
- 3.2. სასამართლოს წევრები ინიშნებიან 4 წლის ვადით. სასამართლოს წევრთა უფლებამოსილების ვადა შესაძლებელია გაგრძელდეს უფრო ხანგრძლივი ვადით DRC-ის დირექტორთა საბჭოს გადაწყვეტილებით.

### მუხლი 4. სასამართლოს სხდომები

- 4.1. DRC-ის სასამართლოს სხდომას უძღვება თავმჯდომარე, ხოლო მისი არყოფნისას ან ამ დანართის მე-7 მუხლის შესაბამისად უფლებამოსილებათა შეზღუდვისას – თსასამართლოს ერთ-ერთი წევრი, სხდომა გადაწყვეტილებათაუნარიანია თუ მას ესწრება მის წევრთა ნახევარზე მეტი. გადაწყვეტილება მიიღება ხმათა უბრალო უმრავლესობით. ხმათა თანაბრად გაყოფისას, გადამწყვეტია სხდომის თავმჯდომარის ხმა.
- 4.2. DRC-ის სასამართლოს სხდომაზე განსახილველ საკითხებს, სხდომის მოწვევის და მისი საორგანიზაციო საკითხების შესახებ გადაწყვეტილებას იღებს DRC-ის სასამართლოს თავმჯდომარე, ხოლო მისი არყოფნისას ან მისი უფლებამოსილების ამ დანართის მე-7 მუხლის შესაბამისად შეზღუდვის შემთხვევაში, DRC-ის სასამართლოს წევრი.
- 4.3. DRC-ის სასამართლოს წევრს შეუძლია მონაწილეობა მიიღოს სასამართლო სხდომაში სატელეფონო, ვიდეო-კონფერენციის ან სკაიპის მეშვეობით.
- 4.4. სასამართლოს გადაწყვეტილება შესაძლებელია მიღებულ იქნას სასამართლოს წევრთა წერილობითი პოზიციის მიღებით, მათ შორის ელექტრონული ფოსტითაც.

### მუხლი 5. სასამართლოს შემადგენლობა სადაზღვევო დავებზე

1. სადაზღვევო დავებზე დებულებით გათვალისწინებულ შემთხვევებში, DRC-ის სასამართლო მოქმედებს 4 წევრის შემადგენლობით (შემდგომში „DRC-ის სასამართლო“), რომელშიც შედის DRC-ის სასამართლოს თავმჯდომარე და ერთი წევრი, საქართველოს სადაზღვევო კომპანიათა ასოციაციის 1 წევრისა და აკადემიური წრიდან წარდგენილი 1 წევრისაგან.
2. საქართველოს სადაზღვევო კომპანიათა ასოციაციისა და აკადემიური წრიდან წარდგენილ კანდიდატებს DRC-ის სასამართლო ინიშნავს 4 (ოთხი) წლის ვადით, რომელიც უფლებამოსილებას ახორციელებს DRC-ის სასამართლოს მიერ მისი უფლებამოსილების შეწყვეტამდე.
3. DRC-ის სასამართლოს ხელმძღვანელობს თავმჯდომარე. მისი არყოფნისას, ან სხვა მიზეზით მოვალეობის შესრულების შეუძლებლობის შემთხვევაში მის უფლებამოსილებას ახორციელებს სასამართლოს წევრი.

4. DRC-ის სასამართლოს შემადგენლობიდან სასამართლოს შემადგენლობაში შესული წევრის ინტერესთა კონფლიქტის, ან სხვა მიზეზით მოვალეობის შესრულების შეუძლებლობის შემთხვევაში მას ცვლის DRC-ის სასამართლოს მიერ კონკრეტული საქმისათვის დანიშნული წევრი.
5. სასამართლოს ქვორუმს ადგენს წევრთა ნახევარი.
6. სასამართლო გადაწყვეტილებას იღებს დამსწრე წევრთა უმრავლესობით, ხმების თანაბრად გაყოფის შემთხვევაში გადაწყვეტია თავმჯდომარის ხმა.

## **მუხლი 6. კონფიდენციალურობა**

- 6.1. სასამართლოს საქმიანობის კონფიდენციალურობა უნდა დაიცვას პირმა, რომელიც მის საქმიანობაში ნებისმიერი ფორმით იღებს მონაწილეობას.
- 6.2. დოკუმენტი, რომელიც წარედგინა DRC-ის სასამართლოს ან შეიქმნა სასამართლოს ან სამდივნოს მიერ სხდომის განმავლობაში, განკუთვნილია მხოლოდ DRC-ის სასამართლოს წევრებისა და სხდომაზე მონაწილე პირებისათვის.
- 6.3. DRC-ის სასამართლო არ არის ვალდებული თავის გადაწყვეტილებაში მიუთითოს ის საფუძვლები რომელსაც ის დაეყრდნო.

## **მუხლი 7. ინტერესთა კონფლიქტი**

- 7.1. DRC-ის სასამართლოს თავმჯდომარეს, სასამართლოს წევრებს და სამდივნოს წევრებს არა აქვთ უფლება გამოვიდნენ მხარის წარმომადგენლად იმ საქმეებში, რომლებიც განიხილება DRC-ის მიერ.
- 7.2. DRC-ის სასამართლოს წევრი შეიძლება დაინიშნოს არბიტრად, თუ რომელიმე მხარე არ დააყენებს მისი აცილების საკითხს დებულებით გათვალისწინებულ ვადაში.
- 7.3. თუ სასამართლოს თავმჯდომარე, ან სასამართლოს წევრი, გენერალური მდივანი ან სამდივნოს თანამშრომელი აღმოჩნდა ჩართული რომელიმე საარბიტრაჟო განხილვაში ან წარმოეშვა ინტერესთა კონფლიქტი საარბიტრაჟო საქმესთან დაკავშირებით საარბიტრაჟო განხილვის მხარესთან პირადი, ან საქმიანი ურთიერთობიდან ან საქმის შესაძლო შედეგებიდან გამომდინარე, მან:
  - ა) ამ ფაქტის შესახებ დაუყოვნებლივ უნდა აცნობოს DRC-ის სასამართლოს თავმჯდომარეს (ხოლო თუ თავმჯდომარეს აქვს ინტერესთა კონფლიქტი, სამდივნოს ხელმძღვანელს.
  - ბ) ვალდებულია არ მიიღოს მონაწილეობა ამ საარბიტრაჟო განხილვასთან დაკავშირებულ საკითხებზე სასამართლო სხდომებში, განხილვასა და DRC-ის სასამართლო გადაწყვეტილების მიღებაში;

გ) არ უნდა მიიღოს ამ საარბიტრაჟო განხილვასთან დაკავშირებული ინფორმაცია და დოკუმენტები, ხოლო მიღებული ელექტრონული ინფორმაცია (ასეთის არსებობის შემთხვევაში) უნდა წაშალოს, და მიღებული დოკუმენტაცია დაუბრუნოს სამდივნოს.

## **მუხლი 8. სასამართლოს მიერ არბიტრების დანიშვნა**

- 8.1. როდესაც დებულების შესაბამისად საარბიტრაჟო განხილვის მხარე არ იყენებს არბიტრობის კანდიდატურის წარდგენის უფლებას, ან არბიტრები ვერ თანხმდებიან მესამე არბიტრის (ტრიბუნალის თავმჯდომარის) დანიშვნის შესახებ, ან დებულებით გათვალისწინებულ სხვა შემთხვევაში, როდესაც სასამართლოს უწევს გადაწყვეტილების მიღება არბიტრის დანიშვნის შესახებ, DRC-ის სასამართლოს თავმჯდომარე, ან სამდივნო არჩევს არბიტრად დასანიშნი პირის კანდიდატს და სასამართლოს მინიმუმ 2 წევრთან შეთანხმების შემდეგ, უფლებამოსილია დანიშნოს არბიტრი.
- 8.2. დებულების 33-ე მუხლით გათვალისწინებულ საქმეებზე არბიტრობის კანდიდატ(ებ)ს სამდივნოს ხელმძღვანელი DRC-ის არბიტრთა სიიდან წარუდგენს სასამართლოს თავმჯდომარეს, რომელიც ერთპიროვნულად იღებს გადაწყვეტილებას არბიტრ(ებ)ის დანიშვნის შესახებ.

## **მუხლი 9. წარმომადგენლობა**

- 9.1. DRC-ის სასამართლოს წარმომადგენს და სასამართლოს სახელით გადაწყვეტილებებს ხელს აწერს თავმჯდომარე, ხოლო ამ დანართის მე-7 მუხლის შესაბამისად მისი უფლებამოსილებათა შეზღუდვის შემთხვევაში, სასამართლოს ერთ-ერთი წევრი.

## **მუხლი 10. სამდივნო ამოღებულია**

## **დანართი #2. საარბიტრაჟო ხარჯი, ჰონორარი და პირობები**

### **მუხლი 1. მოქმედების სფერო**

- 1.1. „დავების განმხილველი ცენტრი“-ს (შემდგომში – DRC) საქმის წარმოების წესების (შემდგომში – დებულება) დანართი #2 განსაზღვრავს საარბიტრაჟო ხარჯების და არბიტრთა ჰონორარის ოდენობას და გადახდის წესს.
- 1.2. DRC-ის შეუძლია გააკეთოს დანართი #2-ის ნორმათა განმარტება.

## **მუხლი 2. არბიტრის ჰონორარი**

- 2.1. არბიტრ(ებ)ის ჰონორარის გადახდას უზრუნველყოფს DRC მხარეთა მიერ დებულების 45 და 46 მუხლების შესაბამისად გადახდილი საარბიტრაჟო ხარჯებიდან.
- 2.2. არბიტრებისათვის ჰონორარის გადახდა განხორციელდება ქართულ ლარში.
- 2.3. საარბიტრაჟო დავის მხარეები თანაბრად არიან პასუხისმგებელნი არბიტრებისათვის ხარჯების ანაზღაურებასა და ჰონორარის გადახდაზე იმის მიუხედავად, თუ რომელი მხარის მიერ მოხდა არბიტრობის კანდიდატის წარდგენა.

## **მუხლი 3. ტრიბუნალის ხარჯები**

- 3.1. ტრიბუნალს უნდა აუნაზღაურდეს საარბიტრაჟო განხილვასთან დაკავშირებული გონივრული ხარჯი.
- 3.2. ტრიბუნალის ჰონორარი არ მოიცავს საარბიტრაჟო განხილვასთან დაკავშირებით ტრიბუნალის მიერ გაწეულ ხარჯებს.

## **მუხლი 4. ადმინისტრაციული ხარჯები**

მხარეებს შესაძლოა დაეკისროთ საარბიტრაჟო განხილვის ადმინისტრირებასთან დაკავშირებული გონივრული ხარჯების, მათ შორის სხდომის ოთახის დაქირავების, თარჯიმნის, ჩანაწერის წარმოების ხარჯების ანაზღაურება. ასეთი ხარჯები ანაზღაურებული უნდა იქნას დებულების 45-ე მუხლის შესაბამისად DRC-ის მიერ მიღებული ავანსებიდან.

## **მუხლი 5. სარეგისტრაციო მოსაკრებელი**

- 5.1. სასარჩელო მოთხოვნის DRC-ის სამდივნოსათვის მიწოდება (მათ შორის შემხვედრი სასარჩელო მოთხოვნის და მოთხოვნათა გაქვითვის შესახებ სასარჩელო მოთხოვნის) უნდა მოხდეს 1000 (ათასი) ლარის ოდენობით სარეგისტრაციო მოსაკრებლის გადახდის დამადასტურებელ დოკუმენტთან ერთად.

- 5.2.სარეგისტრაციო მოსაკრებლის გადაუხდელობის შემთხვევაში საარბიტრაჟო სარჩელს მსვლელობა არ მიეცემა და საარბიტრაჟო განხილვა არ დაიწყება.
- 5.3.ამ მუხლის 5.1. და 5.2. პუნქტები არ მოქმედებს დებულების 33-ე მუხლით გათვალისწინებული დავებისათვის.
- 5.4.სარეგისტრაციო მოსაკრებელი უკან დაბრუნებას არ ექვემდებარება.

## **მუხლი 6. ადმინისტრაციული ხარჯი და არბიტრთა ჰონორარი**

- 6.1.ადმინისტრაციული ხარჯების და ტრიბუნალისათვის ჰონორარის გამოთვლა, უნდა მოხდეს ქვემოთ მოცემული ცხრილი #1-ის მიხედვით, ხოლო დებულების 33-ე მუხლის 33.1. პუნქტის „ა.“ და „ბ.“ ქვეპუნქტებით გათვალისწინებული დავებისათვის ცხრილი #2-ის მიხედვით. ცხრილით გათვალისწინებულია ერთი არბიტრისთვის ან სამარბიტრიანი ტრიბუნალის თავმჯდომარისთვის გადასახდელი ჰონორარი. თუ საარბიტრაჟო ტრიბუნალის მიერ სხვა რამ არ არის დადგენილი, სამარბიტრიანი ტრიბუნალის არბიტრის ჰონორარი შეადგენს ტრიბუნალის თავმჯდომარისთვის განსაზღვრული ჰონორარის 50 პროცენტს.
- 6.2.სადავო მოთხოვნების მოცულობის გაანგარიშებისას გაითვალისწინება როგორც სასარჩელო მოთხოვნის, ასევე შემხვედრი სასარჩელო მოთხოვნის და დამატებითი მხარის სასარჩელო მოთხოვნის ჯამური მოცულობა.
- 6.3.საქართველოს ეროვნული ვალუტისაგან განსხვავებულ ვალუტაში საარბიტრაჟო მოთხოვნის შემთხვევაში, არბიტრის ჰონორარის გაანგარიშებისას გაითვალისწინება DRC-ის მიერ საარბიტრაჟო სარჩელის მიღების დღეს შესაბამისი ვალუტის მიმართ საქართველოს ეროვნული ბანკის მიერ დადგენილი ოფიციალური გაცვლითი კურსი.
- 6.4.იმ შემთხვევაში, თუ საარბიტრაჟო მოთხოვნები არ არის ფულად ერთეულში გამოხატული, DRC-ის სამდივნო დავის გარემოებათა გათვალისწინებით ადგენს დავის ღირებულებას ადმინისტრაციული ხარჯისა და არბიტრთა ჰონორარის განსაზღვრის მიზნებისათვის.
- 6.5. გამონაკლის შემთხვევაში, სამდივნომ შეიძლება დაადგინოს ადმინისტრაციული საზღაური 6.1. მუხლით გათვალისწინებულზე ნაკლები ოდენობით.
- 6.6.იმ შემთხვევაში თუ საარბიტრაჟო განხილვა შეწყდება საარბიტრაჟო სარჩელზე შესაგებლის მიღებამდე ან საქმის საარბიტრაჟო ტრიბუნალისათვის გადაცემამდე, DRC-ის ადმინისტრაციული საზღაური მცირდება 90%-ით, ხოლო არბიტრებს არ წარმოემოხაზებათ ჰონორარის მიღების უფლება.
- 6.7.იმ შემთხვევაში თუ საარბიტრაჟო განხილვა შეწყდება საარბიტრაჟო ტრიბუნალისათვის საქმის გადაცემის შემდეგ, მაგრამ პირველი სხდომის გამართვამდე ან პირველი პროცედურული ბრძანების გამოცემამდე, DRC-ის ადმინისტრაციული საზღაური მცირდება 70%-ით, ხოლო არბიტრები მიიღებენ მათთვის განკუთვნილი ჰონორარის 30%-ს.

- 6.8. იმ შემთხვევაში თუ საარბიტრაჟო განხილვა შეწყდება პირველი სხდომის გამართვის ან პირველი პროცედურული ბრძანების გამოცემის შემდეგ, DRC-ის ადმინისტრაციული საზღაური მცირდება 50%-ით, ხოლო არბიტრები მიიღებენ მათთვის განკუთვნილი ჰონორარის 50%-ს.
- 6.9. იმ შემთხვევაში თუ საარბიტრაჟო განხილვის შეწყვეტის საფუძველია დავის მორიგებით დასრულება ან სარჩელის გახმოზა DRC-ის ადმინისტრაციული საზღაური მცირდება 30%-ით, ხოლო არბიტრები მიიღებენ მათთვის განკუთვნილი ჰონორარის 70%-ს.
- 6.10. საარბიტრაჟო ტრიბუნალისათვის საქმის გადაცემამდე, ან საქმეზე საბოლოო საარბიტრაჟო გადაწყვეტილების მიღების შემდეგ, თუ მხარეები მიმართავენ DRC-ის მორიგების საარბიტრაჟო გადაწყვეტილების ფორმით გაფორმების შესახებ, მათ ასევე უნდა წარუდგინონ DRC-ის სამდივნოს ადმინისტრაციული ხარჯის, კერძოდ მორიგების საგნის (სადაო თანხა) ღირებულების 1%-ის გადახდის დამადასტურებელი დოკუმენტი, საიდანაც 50% შეადგენს DRC-ის ადმინისტრაციულ საზღაურს, ხოლო 50% შეადგენს არბიტრ(ებ)ის ჰონორარს.
- 6.10.<sup>1</sup> ამ მუხლის 6.10 პუნქტით გათვალისწინებული ადმინისტრაციული ხარჯი არ უნდა იყოს 150 ლარზე ნაკლები“.

6.11. საარბიტრაჟო ტრიბუნალის საზღაური მოიცავს საზღაურს საარბიტრაჟო ტრიბუნალის მუშაობისათვის, მისთვის საქმის გადაცემიდან საბოლოო საარბიტრაჟო გადაწყვეტილების მიღების ჩათვლით, ასევე დებულებით გათვალისწინებულ შემთხვევაში საარბიტრაჟო გადაწყვეტილების განმარტების, შესწორებისა და დამატებისათვის.

6.12. საგადასახადო მიზნებისათვის საქართველოს რეზიდენტი არბიტრებისათვის საზღაურის გადახდისას, თუ არბიტრი არ არის გადასახადის გადამხდელად რეგისტრირებული, DRC ასრულებს საგადასახადო აგენტის როლს, აკავებს საშემოსავლო გადასახადს და იხდის ბიუჯეტში.

6.13. არბიტრებისათვის ჰონორარის გადახდა ხდება საბოლოო საარბიტრაჟო გადაწყვეტილების ხელმოწერიდან 5 დღის ვადაში. საარბიტრაჟო ტრიბუნალის მოტივირებული მოთხოვნის საფუძველზე DRC-ის სამდივნოს შეუძლია გადაწყვიტოს ჰონორარის შუალედური ნაწილობრივი გადახდის შესახებ, მაგრამ არაუმეტეს 50%-სა.

6.14. DRC-ის სამდივნოს შეუძლია შეამციროს საარბიტრაჟო ტრიბუნალისათვის გათვალისწინებული ჰონორარი:

ა. 10%-ით თუ საარბიტრაჟო ტრიბუნალი გადააცილებს დებულების 35.2. მუხლით გათვალისწინებულ ვადას 10 დღეზე მეტი ვადით;

ბ. 20%-ით საარბიტრაჟო ტრიბუნალი გადააცილებს დებულების 35.2. მუხლით გათვალისწინებულ ვადას 20 დღეზე მეტი ვადით;

გ. 30%-ით საარბიტრაჟო ტრიბუნალი გადააცილებს დებულების 35.2. მუხლით გათვალისწინებულ ვადას 30 დღეზე მეტი ვადით.

6.15. ტრიბუნალის მოტივირებული შუამდგომლობის საფუძველზე DRC-ის სამდივნოს შეუძლია არ იხელმძღვანელოს ამ მუხლის 6.14.-ე პუნქტით.

მუხლი 6,1.

ამ მუხლის 6.6., 6.7., 6.8. და 6.9. პუნქტებით გათვალისწინებულ შემთხვევებში შემცირებას არ ექვემდებარება დებულების 33-ე მუხლის შესაბამისად საარბიტრაჟო განხილვისათვის გადახდილი საარბიტრაჟო მოსაკრებლის მინიმალური ოდენობა. შემცირებული საარბიტრაჟო მოსაკრებელი უბრუნდება მის შემომტანს, საარბიტრაჟო გადაწყვეტილების ძალაში შესვლის შემდეგ.“

## მუხლი 7. გადაყენებული არბიტრისათვის საზღაურის გადახდა

დებულების მე-17 ან მე-18 მუხლის შესაბამისად არბიტრის გადაყენების შემთხვევაში, DRC-ის სამდივნომ უნდა მიიღოს გადაწყვეტილება გადაყენებული არბიტრისათვის გადასახდელი ჰონორარის ოდენობისა და ასანაზღაურებელი ხარჯების შესახებ. გადაწყვეტილების მიღებისას გათვალისწინებული უნდა იქნას არბიტრად ყოფნის პერიოდი, არბიტრის მიერ გაწეული შრომა, არბიტრის გადაყენების საფუძველი და სხვა მნიშვნელოვანი გარემოებები.

7.1. თუ არბიტრის აცილების საფუძველი გახდა დებულების 13.2-13.3 პუნქტებით განსაზღვრული გარემოებების გაუმჟღავნებლობა, აცილებული არბიტრი არ მიიღებს ანაზღაურებას.

7.2. თუ არბიტრის გადაყენების საფუძველი გახდა დებულების 18.1 „დ“ პუნქტით გათვალისწინებული გარემოება, გადაყენებულ არბიტრი არ მიიღებს ანაზღაურებას.

7.3. თუ არბიტრი აცილებული იქნა პროცედურულ დადგენილებაზე ხელმოწერამდე, ან პირველი პროცედურული სხდომის გამართვამდე, არბიტრს აუნაზღაურდება მისაღები ჰონორარის 5%;

7.4. თუ არბიტრი აცილებული იქნა პროცედურულ დადგენილებაზე ხელმოწერის ან პირველი პროცედურული სხდომის გამართვის შემდეგ, არბიტრს აუნაზღაურდება მისაღები ჰონორარის 10%;

7.5. თუ არბიტრი აცილებული იქნა ზეპირი მოსმენის სხდომის გამართვის შემდეგ, მაგრამ გადაწყვეტილების მიღებამდე, არბიტრს აუნაზღაურდება მისაღები ჰონორარის 20%;

7.6. თუ არბიტრმა ხელი არ მოაწერა გადაწყვეტილებას და არც განსხვავებული აზრის დასაბუთება წარმოადგინა, მაშინ აუნაზღაურდება მისაღები ჰონორარის 25%.

## მუხლი 8. DRC, როგორც დამნიშვნელი ორგანო



- 8.1. იმ შემთხვევაში, როცა UNCITRAL-ის საარბიტრაჟო წესების ან FIDIC-ის ხელშეკრულების თანახმად ან მხარეთა შორის შეთანხმებული სხვა რომელიმე წესების შესაბამისად DRC-ს ირჩევენ, როგორც დამნიშვნელ ორგანოს, განმცხადებელმა უნდა გადაიხადოს განცხადების რეგისტრაციის საფასური 2,500 (ორი ათას ხუთასი) ლარის ოდენობით, რომელიც არ ექვემდებარება დაბრუნებას. რეგისტრაციის საფასურის გადახდამდე დანიშვნის პროცედურები არ იწყება.
- 8.2. მხარემ დამნიშვნელი ორგანოს ფუნქციის შესრულების განცხადებით უნდა მიმართოს DRC-ის სამდივნოს, რომელიც ამ განცხადებას უგზავნის საარბიტრაჟო დავის სხვა მხარეებს. განცხადებაში უნდა აღინიშნოს:
- ა) მოსარჩელის, სხვა მხარეებისა და მათი წარმომადგენლების (არსებობის შემთხვევაში) სახელები და საკონტაქტო ინფორმაცია;
  - ბ) დავის მიმოხილვა და ის ფაქტები, რომლებიდანაც გამომდინარეობს მოთხოვნა;
  - გ) მოსარჩელის მოთხოვნები;
  - დ) საარბიტრაჟო შეთანხმების სრული პირობები, რომელსაც ეყრდნობა საარბიტრაჟო მოსარჩელე მისი მოთხოვნ(ებ)ის დაყენებისას, აგრეთვე იმ ხელშეკრულების ან სხვა დოკუმენტების ასლი, რომელშიც მოცემულია აღნიშნული საარბიტრაჟო შეთანხმება.
- 8.3. არბიტრი ინიშნება UNCITRAL-ის საარბიტრაჟო წესების თანახმად ან მხარეთა შორის შეთანხმებული სხვა რომელიმე წესების ან ან FIDIC-ის ხელშეკრულების შესაბამისად. მხარეთა შეთანხმების არარსებობისას DRC-ის სასამართლო არბიტრ(ებ)ს ან მომრიგებელს ნიშნავს შესაბამისი მოთხოვნის მიღებიდან 60 (სამოცი) დღეში.
- 8.4. იმ შემთხვევაში, თუ მხარეები შეთანხმებულები არიან ამ მუხლით გათვალისწინებული წესით ტრიბუნალის ან მომრიგებლის დანიშვნაზე და ამავდროულად შეთანხმებულები არიან საარბიტრაჟო დავის ჯეროვანი ადმინისტრირების მიზნით DRC-ის (DRC-ის სამდივნოს) მომსახურების მიღებაზე, DRC-ის სამდივნოს შეუძლია განსაზღვროს საზღაურის ოდენობა, რომლის გადახდის შემდეგაც განახორციელებს შესაბამის მხარდაჭერას. ამ პუნქტით გათვალისწინებული საზღაურის ოდენობა არ შეიძლება აღემატებოდეს 2,500 (ორი ათას ხუთასი) ლარს.

**მუხლი 9. ადმინისტრაციული საზღაური სარჩელის უზრუნველყოფის ღონისძიებისათვის**

9.1. მხარე, რომელიც ითხოვს სარჩელის უზრუნველყოფის ღონისძიების სახით მოპასუხე მხარისათვის გარკვეული უფლების შეზღუდვას, იმ აქტივების შესანარჩუნებლად, რომლებიდანაც შესაძლოა აღსრულდეს საარბიტრაჟო გადაწყვეტილება, ვალდებულია გადაიხადოს საარბიტრაჟო ხარჯი ქვემოთ მოცემული ცხრილის შესაბამისად:

სარჩელის უზრუნველყოფის ღონისძიება	ადმინისტრაციული საზღაური ლარში (დღგ-ს გარეშე)
- ნივთზე ყადაღის დადება, ან ნივთის გასხვისების, გაქირავების, გარდაქმნის, გაყოფის, გაერთიანების ან	100 ლარი - ერთ ნივთზე

ნებისმიერი სხვა ფორმით სახის შეცვლის ან სამართლებრივი ბუნების შეცვლის შეზღუდვა.	200 ლარი - ორ ან მეტ ნივთზე
– საბანკო ანგარიშებზე ყადაღის დადება, ან საბანკო ანგარიშებზე აქტიური ოპერაციების, კერძოდ, თანხის ანგარიშიდან გატანის, გადარიცხვის, კონვერტაციის უფლების შეზღუდვა გარკვეული თანხის ფარგლებში.	100 ლარი – ერთ კონკრეტულ საბანკო დაწესებულებაში ანგარიშებთან დაკავშირებით;  200 ლარი – ორ ან მეტ საბანკო დაწესებულებაში ანგარიშებთან დაკავშირებით.

### მუხლი 10. ამოღებულია

### მუხლი 11. გადაწყვეტილების დაკავება

DRC–ის სამდივნოს შეუძლია დააკავოს საარბიტრაჟო გადაწყვეტილება და არ გადასცეს ის მხარეებს, მანამ სანამ მხარეთა მიერ სრულად არ იქნება გადახდილი საარბიტრაჟო ხარჯები და არბიტრთა ჰონორარი.

### მუხლი 12. გამოსაყენებელი სამართალი

ამ დანართის პირობები და აღნიშნულთან დაკავშირებული ან მისგან გამომდინარე ნებისმიერი არასახელშეკრულებო ვალდებულება განიმარტება და რეგულირდება საქართველოს კანონმდებლობის შესაბამისად.

## ცხრილი #1

სარეგისტრაციო მოსაკრებელი, ადმინისტრაციული საზღაური და არბიტრთა ჰონორარი (ეს ცხრილი არ ეხება დებულების 33-ე მუხლის 33.1.-ე პუნქტის (1)-ლი და მე-(2) ქვეპუნქტებით გათვალისწინებულ დავებს)

(1) სარეგისტრაციო მოსაკრებელი შეადგენს 1000 ლარს.

(2) ადმინისტრაციული საზღაური შეადგენს:

დავის ღირებულება (ლარში)		ადმინისტრაციული საზღაური ლარში (დღგ-ს ჩათვლით)
-დან	-მდე	
100,000	ლარამდე	ცხრილი #2-ის მიხედვით
100,001	200,000	2000 + 100,000-ზე ზევით თანხის 2%
200,001	500,000	4,000 + 200,000-ზე ზევით თანხის 1,5%
500,000	1,000,000	8,500 + 500,000-ზე ზევით თანხის 1%
1,000,001	2,000,000	13,500 + 1,000,000-ზე ზევით თანხის 0,75 %
2,000,001	5,000,000	20,500 + 2,000,000-ზე ზევით თანხის 0,5%
5,000,001	10,000,000	35,500 + 5,000,000-ზე ზევით თანხის 0,25%, მაგრამ არაუმეტეს 50,000 ლარისა

შენიშვნა: ერთი ქვეყნის რეზიდენტებს შორის დავის შემთხვევაში DRC-ის ადმინისტრაციული საზღაურის მაქსიმალური თანხა შეადგენს 30,000 (ოცდაათი ათასი) ლარს (დღგ-ს ჩათვლით).

(3) ჰონორარი ერთი არბიტრით ფორმირებული ტრიბუნალისათვის და 3 არბიტრით ფორმირებული ტრიბუნალის თავმჯდომარისათვის შეადგენს:

დავის ღირებულება (ლარში)		ერთი არბიტრის/არბიტრაჟის თავმჯდომარის ჰონორარი ლარში (გადასახადების ჩათვლით)
-დან	-მდე	
100,000	ლარამდე	ცხრილი #2-ის მიხედვით
100,001	200,000	1500 + 100,000-ზე ზევით თანხის 1,5%
200,001	500,000	3,000 + 200,000-ზე ზევით თანხის 1,25%
500,000	1,000,000	6,750 + 500,000-ზე ზევით თანხის 1%
1,000,001	5,000,000	11,750 + 1,000,000-ზე ზევით თანხის 0,5 %
5,000,001	10,000,000	31,750 + 5,000,000-ზე ზევით თანხის 0,25%
10,000,001-ზე მეტი	თანხის შემთხვევაში	44,250 + 10,000,000-ზე ზევით თანხის 0,01%

შენიშვნა: ერთი ქვეყნის რეზიდენტებს შორის დავის შემთხვევაში საარბიტრაჟო ტრიბუნალის ჰონორარის მაქსიმალური თანხა შეადგენს 30,000 (ოცდაათი ათასი) ლარს (გადასახადების ჩათვლით).

## ცხრილი #2

საარბიტრაჟო ხარჯი (ადმინისტრაციული საზღაური და არბიტრთა ჰონორარი)

(ცხრილი ეხება დებულების 33-ე მუხლით გათვალისწინებულ დავებს)

1) საარბიტრაჟო ხარჯი (ადმინისტრაციული საზღაური და არბიტრთა ჰონორარი) განისაზღვრება დავის ღირებულების 3,0% ოდენობით დღგ-ს ჩათვლით. საარბიტრაჟო მოსაკრებლის მინიმალური ოდენობა შეადგენს 300 (სამასი ) ლარი დღგ-ს ჩათვლით, ხოლო მაქსიმალური ოდენობა შეადგენს 15,000 (თხუთმეტი ათასი) ლარს დღგ-ს ჩათვლით.

ა) თუ მხარეთა შეთანხმება ითვალისწინებს საარბიტრაჟო განხილვას ზეპირი მოსმენით, საარბიტრაჟო ხარჯის მინიმალური ოდენობა შეადგენს 590 (ხუთას ოთხმოცდაათი) ლარს დღგ-ს ჩათვლით.

ბ) საარბიტრაჟო შეთანხმებით გათვალისწინებულია დავის განხილვა სამი არბიტრით ფორმირებული ტრიბუნალის მიერ, საარბიტრაჟო ხარჯის მინიმალური ოდენობა შეადგენს 708 (შვიდას რვა) ლარს დღგ-ს ჩათვლით და მაქსიმალური ოდენობა შეადგენს 20,000 (ოცი ათასი) ლარს დღგ-ს ჩათვლით.

გ) თუ საარბიტრაჟო შეთანხმება არ ითვალისწინებს საარბიტრაჟო განხილვას ზეპირი მოსმენით, მხარე, რომელიც შუამდგომლობს ზეპირი მოსმენის დანიშვნის შესახებ, ვალდებულია გადაიხადოს დამატებითი საარბიტრაჟო ხარჯი დავის ზეპირი მოსმენისათვის გათვალისწინებული მინიმალური ოდენობის შესავსებად. აღნიშნული დამატებითი ხარჯი არ დაეკისრება საარბიტრაჟო განხილვის მეორე მხარეს, მიუხედავად იმისა, თუ როგორ გადაწყდება დავა.

დ) თუ მხარეთა შეთანხმება არ ითვალისწინებს საარბიტრაჟო განხილვას ზეპირი მოსმენით, მაგრამ არბიტრი მიზანშეწონილად ჩათვლის დავაზე ზეპირი მოსმენის დანიშვნას, მაშინ საარბიტრაჟო მოსაკრებლის ოდენობა არ გაიზრდება.

2) არბიტრის, ასევე საარბიტრაჟო ტრიბუნალის თავმჯდომარის ჰონორარი განისაზღვრება საარბიტრაჟო მოსაკრებლის 10%-ის ოდენობით (მოიცავს გადასახადებს), მაგრამ არანაკლებ 150 (ასორმოცდაათი) ლარისა (მოიცავს გადასახადებს), ხოლო ამ ცხრილის 1-ლი პუნქტის „ა“ ქვეპუნქტით გათვალისწინებულ შემთხვევაში არანაკლებ 200 ლარისა (მოიცავს გადასახადებს). ამასთან, იმ შემთხვევაში თუ ტრიბუნალი დაკომპლექტდება სამი არბიტრით, თანაარბიტრის ჰონორარი შეადგენს ტრიბუნალის თავმჯდომარისათვის გათვალისწინებული ჰონორარის 50%-ს

(მოიცავს გადასახადებს), რომელიც არ შეიძლება იყოს 150 (ასორმოცდაათი) ლარზე ნაკლები (მოიცავს გადასახადებს).

- 3) DRC-ის სამდივნოს შეუძლია ამ ცხრილის მე-2 მუხლით გათვალისწინებული არბიტრის ჰონორარი გაზარდოს საარბიტრაჟო ხარჯის 10%-დან 25%-მდე ოდენობით კონკრეტული საქმის გარემოებების გათვალისწინებით.
- 4) მუხლი: თუ დადგინდება, რომ DRC-ს არა აქვს იურისდიქცია დავაზე ან დავა ცდება არბიტრაჟის კომპეტენციას და ამის საფუძველზე შეწყდება საარბიტრაჟო პროცესი, DRC გადახდილი მოსაკრებლიდან იტოვებს 100 ლარს და დარჩენილ თანხას უბრუნებს მხარეს, რომელმაც განახორციელა ამ მუხლით გათვალისწინებული გადახდა.
- 5) თუ საარბიტრაჟო სარჩელის წარდგენის გარეშე მხარეები მიმართავენ DRC-ის მორიგების დამტკიცების შუამდგომლობით, მათ ასევე DRC-ის სამდივნოს უნდა წარუდგინონ საარბიტრაჟო მოსაკრებლის, კერძოდ მორიგების საგნის (სადაო თანხა) ღირებულების 2%-ის გადახდის დამადასტურებელი დოკუმენტი (რომელიც არ უნდა იყოს 1-ლი მუხლით გათვალისწინებულ საარბიტრაჟო მოსაკრებლის მინიმუმზე 300 (სამასი) ლარი ნაკლები), საიდანაც 50% შეადგენს DRC-ის ადმინისტრაციულ საზღაურს, ხოლო 50% შეადგენს არბიტრ(ებ)ის ჰონორარს.
- 6) იმ შემთხვევაში თუ საარბიტრაჟო განხილვა შეწყდება საარბიტრაჟო სარჩელზე შესაგებლის მიღებამდე, ან საქმის საარბიტრაჟო ტრიბუნალისათვის გადაცემამდე, DRC-ის ადმინისტრაციული ხარჯი მცირდება 90%-ით, ხოლო არბიტრებს არ წარმოეშობათ ჰონორარის მიღების უფლება.
- 7) თუ საარბიტრაჟო განხილვა შეწყდება საარბიტრაჟო ტრიბუნალისათვის საქმის გადაცემის შემდეგ, მათ შორის, საარბიტრაჟო მოთხოვნის გახმობის საფუძველზე, საარბიტრაჟო მოსაკრებელი მცირდება 50%-ით.
- 8) იმ შემთხვევაში თუ საარბიტრაჟო განხილვის შეწყვეტის საფუძველია დავის მორიგებით დასრულება და ტრიბუნალი საარბიტრაჟო გადაწყვეტილებით ამტკიცებს მხარეთა შეთანხმებას, DRC-ის საარბიტრაჟო მოსაკრებელი მცირდება 50%-ით.
- 9) „საარბიტრაჟო წარმოების წესების“ დანართი #2, ცხრილი #2-ის („საარბიტრაჟო ხარჯი, ჰონორარი და პირობები“) მე-6 და მე-7, პუნქტებით გათვალისწინებულ შემთხვევაში საარბიტრაჟო მოსაკრებლის შესაბამისი ნაწილი უბრუნდება მის შემომტანს საარბიტრაჟო გადაწყვეტილების ძალაში შესვლის შემდეგ. ამასთან, ამ პუნქტებით გათვალისწინებულ შემთხვევაში საარბიტრაჟო მოსაკრებელი, რომელიც რჩება DRC-ის, არ შეიძლება იყოს „საარბიტრაჟო წარმოების წესების“ დანართი #2, ცხრილი #2-ის (1) პუნქტით განსაზღვრული საარბიტრაჟო მოსაკრებლის მინიმუმზე ნაკლები თანხა, ხოლო დავების ონლაინ განხილვისათვის მე-11 პუნქტით გათვალისწინებულ მოსაკრებელზე ნაკლები თანხა.

- 10) საქმეზე საბოლოო საარბიტრაჟო გადაწყვეტილების მიღების შემდეგ, თუ მხარეები მიმართავენ DRC-ის მორიგების საარბიტრაჟო გადაწყვეტილების ფორმით გაფორმების შესახებ, მათ ასევე უნდა წარუდგინონ DRC-ის საარბიტრაჟო მოსაკრებლის, მორიგების საგნის (სადაო თანხა) ღირებულების 2%-ის გადახდის დამადასტურებელი დოკუმენტი, (რომელიც არ უნდა იყოს 1-ლი მუხლით გათვალისწინებულ საარბიტრაჟო მოსაკრებლის მინიმუმზე 300 (სამასი) ლარი ნაკლები), საიდანაც 50% შეადგენს DRC-ის ადმინისტრაციულ საზღაურს, ხოლო 50% შეადგენს არბიტრ(ებ)ის ჰონორარს.
- 11) დავების ონლაინ წესით განხილვისათვის საარბიტრაჟო მოსაკრებლის მინიმალური ოდენობა შეადგენს 200 ლარს (დღგ-ს ჩათვლით).
- 12) იმ შემთხვევაში, თუ საარბიტრაჟო გადაწყვეტილების მიღების შემდეგ მხარე მიმართავს DRC-ის სამდივნოს უფლებამონაცვლის დადგენის შესახებ შუამდგომლობით, მან უნდა გადაიხადოს საარბიტრაჟო მოსაკრებელი 200 (ორასი) ლარის ოდენობით. საიდანაც 50% შეადგენს DRC-ის ადმინისტრაციულ საზღაურს, ხოლო 50% შეადგენს არბიტრ(ებ)ის ჰონორარს.
- 13) იმ შემთხვევაში, თუ საარბიტრაჟო გადაწყვეტილების მიღების შემდეგ მხარე მიმართავს DRC-ის სამდივნოს საარბიტრაჟო წარმოების განახლების მოთხოვნით მან უნდა გადაიხადოს საარბიტრაჟო მოსაკრებელი 200 (ორასი) ლარის ოდენობით. საიდანაც 50% შეადგენს DRC-ის ადმინისტრაციულ საზღაურს, ხოლო 50% შეადგენს არბიტრ(ებ)ის ჰონორარს.
- 14) მხარემ რომელმაც DRC-ის სამდივნოს სარჩელი (განცხადება) წარუდგინა ელექტონულად და/ან სურს ასლები დაამზადოს სამდივნომ, მან უნდა გადაიხადოს ასლების დამზადების საფასური 20 ლარის ოდენობით თითოეული ასლისათვის.

